

≤ 58

А.ХОЖИЕВ



ХОЗИРГИ  
ЎЗБЕК  
ТИЛИДА  
ФОРМА  
ЯСАЛИШИ

А. ҲОЖИЕВ

ҲОЗИРГИ  
ЎЗБЕК ТИЛИДА  
ФОРМА ЯСАЛИШИ

Педагогика институтларининг филология  
факультетлари студентлари учун  
„махсус курс“ материали

ЎзССР Маориғ министрлиги таедиқлаган

ТОШКЕНТ— „ЎҚИТУВЧИ“—1979

*Жамоатчилик асосида  
филология фанлари доктори, профессор  
Мазлума Асқарова  
тахрир қилган*

*На узбекском языке*

**ХОДЖИЕВ АЗИМ**

**ФОРМООБРАЗОВАНИЕ  
В УЗБЕКСКОМ ЯЗЫКЕ**

*Ташкент — „Ўқитувчи“ — 1979*

Редактор *М. Мадалиева*  
Бадиий редактор *П. Б. Бродский*  
Тех. редактор *О. Белляева*  
Корректор *Д. Умарова*

ИБ № 1076

Теришга берилди 4.29.1979 й. Босишга рухсат этилди 12.07. 1979 й. Формат 84×108<sup>1/32</sup>.  
Тип. қозғози, № 3 Кёгли 10. Шпонсиз. Юқори босма усулида босилди. Шартли  
б. л. 4,20. Нашр. л. 4,6. Тиражи 8000. Зак. № 36. Баҳоси 15 т.

„Ўқитувчи“ нашриёти. Тошкент, Навоий кӯчаси, 30. Шартнома № 126—78.

Ўзбекистон ССР нашриёлар, полиграфия ва китоб савдоши ишлари давлат комитети.  
Тошкент „Матбуот“ полиграфия ишлаб чиқариш бирлашмасига қарашли 1-бос-  
махона, Тошкент, Ҳамза кӯчаси, 21. 1979 й.

Типография № 1 Ташкентского полиграфического производственного объедине-  
ния «Матбуот» Государственного комитета УзССР по делам издательств,  
полиграфии и книжной торговли. Ташкент, ул. Ҳамзы, 21.

© „Ўқитувчи“ нашриёти, 1979

X 60602 243 115 — 79 4602000000  
353 /04/ — 79

## СҮЗ БОШИ

Бу иш олий ўқув юртлари филология факультетлари студентларига ўқиладиган маҳсус курслар учун мўлжалланган. Ишдан кузатилган мақсад ўзбек тилида форма ясалиши ҳодисаси ва у билан боғлиқ масалалар бўйича яхлит маълумот бериш, форма ясалишининг бошқа ҳодисалардан фарқини, шунингдек, ҳар бир сўз туркумига хос формалар, уларнинг маъно ва вазифаларини конкрет белгилашдир.

Хозирги ўзбек тили морфологиясидан дарслик, қўлланмалар яратишда, шунингдек, программалар тузишда шу вақтгача давом этиб келаётган хато ва камчиликларни бартараф этишга ёрдам беради деган мақсад билан, ишда форма ясалиши билан боғлиқ масалалар бўйича мавжуд фикрларга муносабат, танқидий мулоҳазалар ҳам билдирилди.

Ўзбек тили грамматикаларида ҳозирга қадар ҳам сўз ясалиши ва форма ясалиши ҳодисаси морфология баҳсида бериб келинмоқда. Лекин сўз ясалиши тилшуносликнинг лексикология, грамматика каби алоҳида бўйими экани ҳозирда тан олинган<sup>1</sup>.

Сўз ясалиши ва форма ясалиши ҳодисаларининг шу вақтга қадар морфология баҳсида ўрганилишига сабаб, буларнинг ҳар иккисида морфема иштирок этишидир. Морфема ва унинг хусусиятлари ҳақида ҳам морфология баҳсида гапирилар эди. Ваҳоланки, морфема ҳақидаги таълимот (морфемика) ҳам алоҳида соҳа сифатида ажратила бошланди<sup>2</sup>.

Морфемика, сўз ясалиши ва форма ясалиши морфологик ҳодиса сифатида қаралиб, морфология баҳсида берилиши бу тил ҳодисаларининг ҳақиқий моҳиятини тўғри белгилашга халал бериб, бир қатор хато ва қарама-қарши фикрларни келтириб чиқарди. Бинобарин,

<sup>1</sup>Грамматика современного русского литературного языка, издано „Наука“, М., 1970, 37—301-бетлар. Ўзбек тили грамматикаси, 1 том, Морфология, ЎзССР „Фан“ нашриёти, Тошкент, 1975, 7—52-бетлар.

<sup>2</sup>Юқоридаги грамматикаларнинг 30—36 ва 11-бетларига қаранг.

буларнинг ҳар бирини маҳсус бўлимлар сифатида ажратиш ва уларнинг ўзига хос хусусиятларини очиш тил ҳодисаларининг ҳақиқий моҳиятини тўғри ва осон англашга ёрдам беради. Шуни назарда тутиб, сўз ясалиши билан форма ясалиши тамомила фарқли ҳодисалар экани ҳақида конкрет тасаввур ҳосил этиш, ҳар бирининг ўзига хос хусусиятлари билан таништириш мақсадида уларни алоҳида олиб текширищни лозим топдик.

Сўз ясалиши ва форма ясалиши мураккаб ҳодисалар бўлиб, улар билан боғлиқ барча масалаларни кичик ҳажмдаги ишда ҳал этиб бериш мумкин эмас. Шу сабабли бу ишда фақат форма ясалиши ва унга боғлиқ масалалар ўрганилади.

Форма ясалиши ҳодисаси ўзбек тили морфологиясига оид деярли барча ишларда у ёки бу даражада тилга олинади. Маълум бир сўз туркуми ўрганилганда, шу туркумда форма ясалиши ва бу формаларга хос маънолар ҳақида ҳам фикр юритилади. Лекин форма ясалиши ҳодисаси (умуман, сўз формаси) яхлит ҳолда ўрганилмаганлигидан, у билан боғлиқ бир қатор масалалар шу вақтгача аниқ белгиланмаган. Масалан, от туркумда шу туркумга оид грамматик категорияларга хос формалар ўрганилади. Бу туркумга мансуб бошқа типдаги, грамматик категория ҳосил қилмайдиган, бир қатор формалар ҳануз эътибордан четда қолиб келяпти. Еу формаларнинг айримлари ҳақида билдирилган фикрлар эса турли ишларда турличадир. Кўринадики, от морфологиясида шу туркумга оид формалар тўла ўрганилмаяпти. Яна бир факт: ўзбек тилида сўзнинг синтетик ва аналитик формаси борлиги маълум. Лекин бирор ишда аналитик форма ҳақида тўлиқ маълумот йўқ. Феъл туркуми формаларга ниҳоятда бой. Лекин шу вақтга қадар бирорта ишда ҳам феълнинг қай турдаги аналитик формалари борлиги конкрет кўрсатилмаган.

Форма ясалиши билан боғлиқ бўлган бир қатор умумий ҳодисалар ҳам етарли ёритилган эмас. Бу масалаларни тўғри ўрганмай туриб, форма ясалиши (сўз формаси) нинг бошқа томонларини тўла ва тўғри белгилаш мумкин бўлмайди. Шуларни назарда тутиб, бу ишда асосий эътибор форма ясалишининг умумий хусусиятларига, бу ҳодиса бўйича ноаниқ, тортишувли бўлиб келаётган масалаларга қаратилади.

## Бириңчи бўлим

### СЎЗ ФОРМАЛАРИ ҲАҚИДА

#### Грамматик маъно ва грамматик форма

Ҳар бир мустақил сўз лексик маънодан ташқари, грамматик маънога ҳам эга бўлади. Мустақил сўзлар объектив борлиқдаги маълум бир предмет, белги, ҳаракат кабиларни англатади. Еу—сўзнинг лексик маъноси. Сўзда лексик маънодан ташқари грамматик маънолар ҳам ифодаланади. Масалан: *Ҳашарчиларга дурустроқ хоналар ажратамиз* гапида ҳашарчи, хона сўзлари англатган шахс, нарса, дуруст сўзи ифодалаган белги, ажратмоқ феъли билдирган ҳаракат шу сўзларнинг лексик маъносидир; *ҳашарчиларга, хоналар* сўзида шахс, нарсанинг кўплиги (сон маъноси), ҳаракатнинг йўналганилиги (келишик формасига хос маъно); *яхшироқ* сўзида белгининг даражা маъноси; *ажратамиз* сўзида ҳаракатнинг бажарувчи шахси (I шахс), замони (келаси замон) маъноси ифодаланади. Бу маънолар сўзларнинг грамматик маънолариdir.

Грамматик маъно сўзнинг лексик маъносини ўзгартиромайди, лексик маънога қўшимча тарздаги маъно бўлади ҳамда маҳсус воситалар (масалан, аффикслар) орқали ифодаланади. Грамматик маъно ифодаловчи воситалар олган шакли сўзнинг грамматик формаси ҳисобланади.

Грамматик маъно ва грамматик форма (сўз формаси) деганда, мустақил сўзларгина назарда тутилади. Чунки мустақил маъноли сўзларгина грамматик маъно ва грамматик формага эга.

Форма ясалиши ҳам мустақил сўз туркумларига хос хусусият. Мустақил сўз туркумлари ичида от ва феъл туркуми формалар системасига бойлиги билан ажralиб туради.

Одатда сўзнинг ҳар бир формаси маҳсус восита—аффикс ёки ёрдамчи сўз ёрдамида ҳосил қилинади. Лекин ўзбек тилида сўзнинг маҳсус кўрсаткичга эга

бўлмаган формалари ҳам бор. Масалан, отларда кўплик формаси *-лар* аффикси ёрдамида ясалгани ҳолда, бирликнинг маҳсус кўрсаткичи йўқ: *китоб* (бирлик формаси), *китоблар* (кўплик формаси); феълларда бўлишсизлик (инкор формаси) *-ма* аффикси орқали ясалади. Лекин бўлишиликнинг маҳсус кўрсаткичи йўқ: *ишла* (бўлиши форма), *ишлама* (бўлишсиз форма) ва бошқалар.

Сўзнинг маълум бир тиپдаги формалари системасида форма кўрсаткичига эга бўлмаган кўриниши ҳам шу сўзнинг маҳсус формаси—ноль кўрсаткичли формаси ҳисобланади: *ўқиди+m*, *ўқиди+нг*, *ўқиди+Ø*; *келган+ман*, *келган+сан*, *келган+Ø* каби.

## ГРАММАТИК МАЪНО ВА ГРАММАТИК ФОРМАНИНГ ГРАММАТИК ҚАТЕГОРИЯГА МУНОСАБАТИ

Грамматик маъно ва грамматик формасиз грамматик категория ҳақида гапириш мумкин эмас. Грамматик маъно билан грамматик форманинг бирлигигина грамматик категорияни юзага келтира олади. Лекин ҳар қандай грамматик маъно билан шу маънони ифодаловчи форманинг бирлиги грамматик категория бўлавермайди.

Бир-бирига қиёсан олинадиган (оппозиция ҳосил қиласидиган) икки ёки ундан ортиқ грамматик маъно билан шу маъноларни ифодаловчи формалар биргаликда грамматик категорияни ҳосил қиласиди<sup>1</sup>. Масалан, ҳаракатнинг ўтган, ҳозирги ва келгуси вақтга оидлиги маъноси ва бу маъноларни ифодаловчи формалар биргаликда феълнинг замон категориясини ҳосил қиласиди: *келди*—ўтган замон, *келяпти*—ҳозирги замон, *келади*—келаси замон.

Бирор сўз туркуми маълум грамматик маъно ва шу маънони ифодаловчи формага эга бўлиши мумкин. Лекин бу маъно ва форма бошқа бирор маъно ва форма билан бирликда бўлмаса, оппозиция ҳосил қилмаса, у ҳолда грамматик категория ҳақида гапириб бўлмайди. Масалан, *-ники* аффикси отнинг ҳослик (қарашлилик) маъносини ифодаловчи формасини ясади: *ўзимники*,

<sup>1</sup>Қаранг: О. С. Ахмanova. Словарь лингвистических терминов, М., 1966, 191-бет; Грамматика современного русского литературного языка, изд-во „Наука“, М., 1970, 317-бет; Д. Э. Розенталь, М. А. Теленкова. Словарь-справочник лингвистических терминов, изд. 2<sup>е</sup>, М., „Просвещение“, 1976, 81-бет.

*укамники, мактабники* ... Демак, бунда қарашлилик маъноси ва шу маънони ифодаловчи форма бутунлиги бор. Лекин шу маъно ва формага қарама-қарши қўйилиб, у билан маълум бирлик (бутунликни) ҳосил қиласидиган бошқа маъно ва форма йўқ. Шунга кўра, отнинг -ники аффикси ёрдамида ясалувчи қарашлилик ифодалайдиган формаси бўлса ҳам, лекин отлар қарашлилик категориясига эга деб бўлмайди.

Демак, грамматик маъно ва шу маънони ифодаловчи форма бор жойда грамматик категория ҳам бор дейиш тўғри бўлмайди. Бир-бирига қарама-қарши қўйилиши (бир-бири билан оппозиция ҳосил қилиши) мумкин бўлган икки ёки ундан ортиқ грамматик маъно ва шу маъноларни ифодаловчи формалар бутунлигигина грамматик категорияни ҳосил қила олади.

Шу жиҳатдан қараганда, ўзаро оппозицияда бўлиб, грамматик категория ҳосил қилувчи формаларнинг бирига нисбатан „грамматик категория“ ёки „категория“ терминини қўллаш тўғри бўлмайди. Масалан, лингвистик адабиётларда „тушум келишиги категорияси“, „ўтган замон категорияси“ каби терминлар учрайди. Ваҳоланки, тушум келишиги формаси бошқа келишик формалари билан бирликда келишик категориясини, ўтган замон феъли формаси эса бошқа замон формалари билан бирликда замон категориясини ҳосил қиласиди. Шунга кўра „нисбат категорияси“ дейиш асосли, лекин „орттирма нисбат категорияси“ ёки „мажхул нисбат категорияси“ дейиш тўғри эмас, „сон категорияси“ дейиш тўғри, лекин „кўпллик категорияси“ ёки „бирлик категорияси“ дейиш тўғри бўлмайди.

## ФОРМА ЯСАЛИШ УСУЛИ

Ўзбек тилида форма ясовчи воситалар икки асосий турга бўлинади: 1) форма ясовчи аффикслар; 2) форма ясовчи ёрдамчи сўзлар. Аффикслар ёрдамида форма ясаш усулини *аффиксация усули*, ёрдамчи сўзлар воситасида форма ясалишини эса *композиция усули* дейилади.

Аффиксация усули билан *синтетик формалар*, композиция усули билан *аналитик формалар* ҳосил қилинади: *ўйда, уйлар, уйларимизни; ўқияпти, ўқиса, ўқимоқчи* — синтетик формалар, *уй, томон, туни билан, еб кўр, ола қол* — аналитик формалар.

Булардан ташқари, жамлик, умумлаштириш ифодаловчи қозон-товорқ, катта-кичик каби, кўплик, такрорийликни ифодаловчи баланд-баланд (иморат), сўраб-сўраб (топмоқ) каби формалар ҳам мавжуд. Буларни жуфт ва такрорий форма деб аташ мумкин.

### СИНТЕТИК ФОРМА

Синтетик форма тилдаги бошқа ҳодисалардан аниқ фарқланиб туради.

Аффиксал морфемалар ҳақида лингвистик адабиётлардан жуда кўп умумий маълумотлар топиш мумкин. Лекин аффиксал морфема ва у билан боғлиқ бўлган тил ҳодисалари кўргина тилларда, жумладан, ўзбек тилида ўрганиб етилмаган.

Аффиксал морфемалар ўз хусусиятларига кўра икки асосий турга бўлинниб келар эди: 1) сўз ясовчи аффикслар; 2) форма ясовчи аффикслар. Кейинги вақтларда яратилган ишларда аффикслар асосий хусусиятларига кўра уч турга — сўз ясовчи, форма ясовчи ва сўз ўзгартувчи аффиксларга ажратила бошлиди. Бу ҳол, шубҳасиз, рус тилига оид адабиётларнинг таъсирида бўлди. Бунда форма ясовчи аффикслар синтактик муносабат кўрсатиш ёки синтактик муносабат кўрсатмаслигига кўра икки турга: 1) форма ясовчи, 2) сўз ўзгартувчи аффиксларга бўлинади.

Рус тилига оид айрим адабиётларда сўз формаси доирасида ўзаро фарқли ҳодиса сифатида икки нарса ажратилади: 1) форма ясалиши (*формообразование*); 2) сўз ўзгариши (*словоизменение*). Худди шу қараш асосида сўз формасини ҳосил қилувчи аффиксларнинг маълум бир тури форма ясовчилар (*формообразующие*), бошқалари эса сўз ўзгартувчилар (*словоизменяющие*) деб икки турга ажратилади. Лекин форма ясалиши (*формообразование*) ва сўз ўзгариши ( *словоизменение*) ҳодисаларига бўлган қарашлар ва бу терминларнинг қўлланиши рус тилига оид адабиётларнинг ўзида бир хил эмас. Далил сифатида рус тили лингвистик терминларининг изоҳига бағишиланган икки муҳим луғатда формообразование ва словоизменение терминларига берилган изоҳни келтирамиз: „**СЛОВОИЗМЕНЕНИЕ**“. Образование того или иного ряда грамматических форм или всех грамматических форм одного и того же слова.

**ФОРМООБРАЗОВАНИЕ.** Образование форм слова, выражающих несintаксических категорий<sup>1</sup>.

**„СЛОВОИЗМЕНЕНИЕ.** Образование грамматических форм одного и того же слова, выражающих его отношение другим словам.

**ФОРМООБРАЗОВАНИЕ.** Образование форм одного и того же слова<sup>2</sup>.

Кўриниб турибдики, бир лугатда сўз ўзгариши (словоизменение) деганда, бир сўзнинг барча турдаги грамматик формасининг ясалиши назарда тутилса, иккинчи лугатда форма ясалиши (формообразование) деганда, худди шундай ҳодиса назарда тутилади. Яна шу нарса ҳам сезилиб турибдики, иккала ишда ҳам сўз формасини форма ясалиши ва сўз ўзгариши каби икки турга ажратишда бу формаларнинг бошқа сўз билан синтактик муносабат кўрсатиши ёки кўрсатмаслиги назарда тутилади. Бу қараш таъсирида ўзбек тилшунослигига ҳам форма ясовчи аффикслар, юқорида кўриб ўтганимиздек, форма ясовчи ва форма ўзгартувчи (ёки сўз ўзгартувчи) каби икки турга ажратила бошланди.

Форма ясовчи аффиксларни (шунингдек, сўз формасини) бу типда классификация қилиш ўзбек тили нуқтаи назаридан назарий асос ва амалий аҳамиятга эга эмас. Чунки аффиксал морфеманинг асосий вазифаси икки хил: 1) сўз ясаш; 2) форма ясаш. Аффиксал морфеманинг ана шундан бошқа вазифаси йўқ<sup>3</sup>

<sup>1</sup> О. С. Ахманова. Словарь лингвистических терминов, М., 1966, 423- ва 502- бетлар.

<sup>2</sup> Д. Э. Розенталь, М. А. Теленкова. Словарь-справочник лингвистических терминов, М., 1976, 414- ва 512- бетлар.

<sup>3</sup> Рус тилига оид кейинги вақтларда нашр этилган ишларда ҳам аффиксларнинг икки асосий тури мавжудлиги ва улардан бир тури сўз ясалишининг, иккинчи тури форма ясалишининг предмети экани қайд этилади. Фақатгина шуни айтиш керакки, сўз ясовчи аффикслардан бошқа турдаги аффикслар айрим ишларда „сўз ўзгартувчилар“, айрим ишларда эса „форма ясовчилар“ деб аталади. Лекин икки ҳолатда ҳам бир ҳодиса назарда тутилади: Қаранг: Грамматика современного русского литературного языка. Изд- во „Наука“, М., 1970, 30- бет.

Шуниси ҳам характерлики, бирида *словоизменяющие*, иккисида *формообразующие* терминлари кўлланилишидан қатъи назар, юқоридаги лугатларнинг иккаласида ҳам сўз ясовчи аффикслардан бошқа барча аффикслар бир турга киритилади. (Ўша лугатларнинг 61-, 31- бетларига қаранг.)

(-ли ва -лик аффикслари бундан мустасно бўлиб, бу ҳақда қўйида тўхталамиз).

Форма ясовчи аффиксларни форма ясовчи ва сўз ўзгартувчи аффиксларга ажратишда форма ясовчиларнинг бошқа бирор сўз билан синтактик муносабат кўрсатиши ёки кўрсатмаслиги асосга олинишини кўрдик. Тўғри, форма ясовчиларнинг баъзилари бошқа бирор сўз билан синтактик алоқадаликни кўрсатади. Масалан, *китобни ўқиди* гапида тушум келишиги формаси орқали шу формадаги от билан феълнинг синтактик муносабати ўз ифодасини топади. Айрим форма ясовчилар (шу форма ясовчини олган сўз формаси) эса бошқа бирор сўз билан синтактик муносабат кўрсатмайди. Масалан, отларнинг кўплик формаси (*болалар, китоблар*), феълнинг замон формалари (*келди, келган, келяпти*) шундай хусусиятга эга.

Лекин айтиб ўтилганидек у ёки бу аффикс ёрдамида ясалган форманинг синтактик муносабат кўрсатиши ёки синтактик муносабат кўрсатмаслигига қараб форма ясовчи аффиксларни икки турга ажратишнинг назарий ва амалий аҳамияти йўқ. Чунки ўзбек тилида форма ясалишидан фарқланадиган „сўз ўзгариш“ ҳодисаси ва шундай ҳодисани юзага келтирадиган аффикслар мавжуд эмас. Шундай экан, синтактик алоқа кўрсатадиган форма ясовчиларни алоҳида тур сифатида ажратиш ва алоҳида ном билан („сўз ўзгартувчилар“ деб) аташ ҳам тўғри бўлмайди. Агар синтактик муносабат кўрсатадиган форма ясаши ёки синтактик муносабат кўрсатмайдиган форма ясашига кўра форма ясовчи аффикслар икки турга бўлинадиган бўлса, у ҳолда шу аффикслар ёрдамида ясалган формаларни ҳам икки турга бўлиш ва икки хил ном билан аташ талаб этилади. Лекин форма ясовчи аффикслар икки турга бўлинган ишларда, нима учундир масаланинг бу томонига эътибор берилмайди.

Хозирги ўзбек тилида *-ли* ва *-лик* аффикслари сифат ва от ясашдан ташқари яна бошқа вазифага ҳам эга.

*-ли* аффикси сифат ясовчи энг унумли аффикс эканни маълум: *завқли,ibratли, ёғли, кўнгилли, одобли...* Шунингдек, у от бирикмаларни сифатловчи бирикмаларга айлантириш вазифасида ҳам жуда кенг қўлланади: *Бу распада минг хил кийимли оломон йўқ,*

*шошилиш йўқ... (Ойбек.) Яқинда колхозларга ўрта, олий маълумотли агрономлар, зоотехниклар, иргаторлар, механизаторлар раҳбарлик қиласди.* (Ш. Рашидов.) *Усти брезент ёпқиичли машина ёнидан ер ўлчайдиган аппаратнинг уч оёғи чиқиб турибди.* (Саид Аҳмад.)

Бу мисолларда ҳам -ли аффикси „эга“, „бор“ деган маъно ифодалайди. Лекин янги сўз ҳам, сўзнинг формасини ҳам ясаётгани йўқ, от бирикмага қўшилиб, шу бирикмаларни сифтловчи (белги кўрсатувчи) бирикмага айлантиряпти. Бунда бирикма компонентлари лексик мустақиллигини сақлади, шунингдек, улар ўртасидаги синтактик алоқа ҳам сақланади: *минг хил кийим+ли, брезент ёпқиич+ли, бир юз ўн қават+ли...*

Хозирги ўзбек тилида -лик от ясовчи кўп маъноли аффикс: *яхшилик, шаҳарлик, қумлик, тезлик*. Бундан ташқари у гапга teng конструкцияларга қўшилиб, уни гапнинг бирор бўлаги функциясидаги конструкцияга айлантиради: *бир-икки кундан кейин Ёзёвон масаласида катта тигин бўлиши кераклигини англади.* (С. Аҳмад.) *Вақти тигизлигидан аввалги сафар синглесиникига йўлни яқинроқдан солган, қамоқхона орқасидаги кўчадан юрмаганди.* (И. Содиков.) Бу мисолларда -лик аффикси қўшилган „*катта тигин бўлиши керак*“, „*вақт тигиз*“ гапга teng конструкциялар. -лик аффиксининг қўшилиши натижасида улар турли келишик формасида қўлланиб, гап бўлаги вазифасида келиш имконига эга бўляпти. -лик аффикси бунда бирор маъно ифодаламайди, балки фақат гапга teng конструкцияни гапнинг бирор бўлаги вазифасида келишга ҳозирлаш вазифасини бажаради.

Хуллас, сўз ясовчи аффикслардан ташқари аффиксларнинг маълум бир группасини „форма ясовчилар“, бошқаларини „сўз ўзгартувчилар“ деб аташ морфологик жиҳатдан бир хил ҳодисани икки хил ҳодиса деб тан олиш бўлади. Ваҳоланки, бу ерда биргина ҳодиса— форма ясалиш ҳодисаси бор.

### АНАЛИТИК ФОРМА

Аналитик формада ёрдамчи сўз мустақил сўзнинг лексик маъносига қўшимча тарздаги грамматик маънони ифодаловчи восита ҳисобланади. Агар шундай маъноюзага келмаса, у ҳолда аналитик форма ҳақида

гапириш мумкин бўлмайди. Буни қўйидаги икки мисолда аниқ қўриш мумкин: *Тоға унинг кечадан бери ухламаганини, ўша мудҳиш хабарни эшиштгандан бери шу аҳволда телба бўлиб юрганини сезди-да, бошқа бирор нарсага алаҳситмоқчи бўлди.* (Саид Аҳмад.) *Кўнгиллари учун бир-икки қошиқ томинган бўлдим.* (М. Қориев.)

Биринчи мисолда *бўлди* ёрдамчиси мақсад тарзидағи ҳаракатнинг (*алаҳситмоқчи* феълига хос маънонинг) ўтган замонга оидлигини билдирияпти. Лекин ўтган замон маъноси ундаги *-ди* аффиксига хос. „*Бўл*“ нинг ўзи бирор қўшимча маъно (грамматик маъно) ифодалайтгани йўқ. Шунинг учун *алаҳситмоқчи бўлди* аналитик форма эмас. Бундаги *бўл*-боғлама вазифасини бажаряпти. Иккинчи мисолда эса *бўл* ҳаракатнинг нормал даражада эмас, номига бажарилишини билдирияпти, қўшимча маъно ифодалаяпти. Демак, бу мисолдаги *томинган бўлдим* аналитик форма ҳисобланади.

Одатда, *ўқиган бўлса* типидаги формани шарт майлиниңг аналитик формаси, *ўқимоқчи бўлди* типидаги формани мақсад майлиниңг аналитик формаси деб таърифлайдилар. Лекин фалон майлнинг ёки замоннинг аналитик формаси дейиш учун бу форма шу майл ёки замонга хос маънони реаллаштирувчи бўлиши керак. Масалан, *ишлаб турибди* формасида *турибди* ёрдамида ҳозирги замон маъноси ифодаланади. *Ишлар эди* формасида *эди* ўтган замон маъносини реаллаштиради. Демак, *ишлаб турибди* ҳозирги замон феълининг, *ишлар эди* ўтган замон феълининг аналитик формалари ҳисобланади. Шу жиҳатдан қараганда, *ўқиган бўлса* типидаги формани шарт майлиниңг аналитик формаси деб бўлмайди. Чунки шарт маъноси *бўл* ёрдамида ифодаланаётгани йўқ, балки *-са* аффиксининг ўзи шу маънони ифодалайди. *Ўқимоқчи бўлди* типидаги формада ҳам мақсад маъносини бевосита-*моқчи* аффиксининг ўзи ифодалайди. Булардаги *бўл* боғлама вазифасини бажаради.

Аналитик формалар ташқи кўринишдан баъзан қўшма сўз, шунингдек, сўз биримасига ўхшаб қетади. Лекин уларнинг ҳар иккисидан ҳам кескин фарқ қиласади.

Аналитик форма қўшма сўздан қўйидаги икки хусусияти билан фарқланади: 1. Аналитик форма муста-

қил ва ёрдамчи сўзниг бирикўвидан ҳосил бўлади: *келса керак, ўйлаб кўр* каби... Қўшма сўзниг компонентлари мустақил маъноли, ҳозирги ўзбек тилида мустақил сўз сифатида қўллана оладиган бўлади. 2. Аналитик форма ҳосил қилувчи ёрдамчи сўз мустақил сўзниг маълум бир формасига бирикади. Қўшма сўзниг компонентлари эса мустақил шаклланган бўлмайди. *Киёсланг; кечга томон—эрксевар.*

Ёрдамчи сўзниг мустақил сўзга маълум форма ёрдамида бирикишига кўра аналитик формалар сўз бирикмаларига ўхшайди. Лекин сўз бирикмаси бирдан ортиқ мустақил сўздан ташкил топади: *колхоз боғи* каби. Аналитик форма эса, кўриб ўтганимиздек, мустақил ва ёрдамчи сўздан ташкил топади.

Форма ясалишида юқорида кўриб ўтилган воситалардан ҳар иккиси, яъни аффикс ва ёрдамчи сўз иштирок этиши мумкин. Масалан, *ўқиб кўрдим* сўзида *кўр*—аналитик форма ясовчи кўмакчи феъл. *-ди, -м* замон ва шахс-сон формасини ясовчи аффикслар.

Демак, сўз формаси синтетик, аналитик ва буларнинг ҳар иккиси ўз ифодасини топган мураккаб форма кўринишида бўлиши мумкин.

Аналитик форманинг ясалишида ёрдамчи сўз қўшиладиган мустақил сўзниг ўзи ҳам бирор формада бўлади: *мактабга қадар* (*мактабга*—жўналиш келишик формасида), *ўрганиб қолди* (*ўрганиб*—равишдош формасида). Демак, ёрдамчи сўз сўзниг маълум бир формасига бирикиб аналитик форма ҳосил қиласиди. Лекин бунда ёрдамчи сўз билан бириккан сўз ўзича мустақил форма ҳисобланмайди, балки у ёрдамчи сўз билан биргаликда яхлит бир форма бўлади. Масалан, *айтиб қўйди*, *айта қолди* каби бирикүвларда *айтиб* ва *айта* мустақил форма эмас, балки улар *қўй* ва *қол* кўмакчи феъллари билан бирга бир форма ҳисобланади. Буларда равишдош формаси фақат кўмакчи феълнинг етакчи феълга бирикиши учун восита ролини ўйнайди, унинг шундан бошқа вазифаси ҳам, маъноси ҳам йўқ. *Уйга қадар* формасида ҳам *уйга* ўзига мустақил форма эмас. Бунда *уйга қадар* яхлитлигича маълум бир маъно ифодаловчи, маълум бир вазифа бажарувчи форма ҳисобланади. Масалан, *уйга қадар борди* гапидан *қадар* кўмакчиси тушириб қолдирилса ҳам *уйга* сўзи *борди* сўзи билан боғланаверади. Шунга кўра, *уйга қадар борди*

гапида *уўга* мустақил формадек кўринади. Лекин, биринчидан, *уўга* формаси ифодалайдиган маъно билан *уўга қадар* формаси ифодалайдиган маъно бошқа-бошқа: *уўга* — йўналиш („направление“) ифодалайди, *уўга қадар* — чегара маъносини билдиради.

Иккинчидан, *уўга қадар* формаси бирикадиган ҳар қандай сўз билан *уўга* формаси бирикавермайди: *уўга қадар шундай* („*уўга шундай*“ дейилмайди).

Демак, аналитик формадаги мустақил сўз қандай форма кўринишида бўлмасин, бу форма ўз асл маъно ва вазифасида бўлмайди, у фақат ёрдамчи сўзнинг мустақил сўзга боғланишини таъминлайди. Мустақил сўз билан ёрдамчи сўз яхлитлигича бир формани ҳосил қиласди.

### ЖУФТ ВА ТАҚРОРИЙ ФОРМА

Ўзбек тилида, шунингдек, бошқа туркий тилларда сўз ясалиши ҳақида гапирганда, одатда, жуфт ва тақрорий сўзлар ҳам сўз ясалиши ҳодисаси сифатида таърифланади, композиция усули билан сўз ясалиши деб қаралади. Ҳатто, қўшма, жуфт ва тақрорий сўзларнинг ҳаммаси „қўшма сўзлар“ номи билан юритилаверади. Аввало, қўшма, жуфт ва тақрорий сўзлар бир-биридан бутунлай фарқли ҳодисалар. Қўшма сўз ҳақиқий лексик ҳодиса, унинг ясалиши эса сўз ясалиши ҳодисаси. Жуфт ва тақрорий сўз эса тўла маънода лексик ҳодиса эмас ва унинг ясалиши ҳам сўз ясалиши ҳодисаси бўла олмайди. Щундай экан, қўшма, жуфт ва тақрорий сўзларни бир ном билан аташга эҳтиёж йўқ ва уларга бирон умумий ном бериш тўғри эмас.

Жуфт ва тақрорий сўзларнинг қўшма сўзлардан фарқини ва уларнинг қандай ҳодиса эканини белгилаш учун ҳар бирининг ўзига хос хусусиятларини кўриб ўтишга тўғри келади.

**Жуфт сўзлар.** Булар қўйидаги хусусиятлари билан характерланади:

1. Қўшма сўз бирдан ортиқ мустақил маъноли морфеманинг биринишидан ҳосил бўлади. Бошқача айтганда, қўшма сўз таркибида, албатта, бирдан ортиқ ўзак морфема бўлади. Жуфт сўзнинг компонентлари (компонентларидан бири ёки ҳар иккиси) мустақил маъноли бўлмаслиги мумкин: *бог-rof*, *упа-элик*, *бозор-*

*ўчар, маза-матра, хом-хатала, азза-базза, апилтапиил, лаш-луш, икир-чикир, ўлда-жўлда* каби.

2. Қўшма сўзларда икки мустақил маъноли морфеманинг бирикувидан албатта янги сўз ҳосил бўлади: *белбоғ, ҳар бир, тоголча* каби. Жуфт сўзларда унинг иккала компонентига хос маънодан тамомила фарқли, янги маъно ифодаловчи янги сўзнинг ҳосил бўлиши жуда кам процентни ташкил этади: *олди-қочди* (гап), *бўлар-бўлмас* (нарса) каби.

3. Қўшма сўзнинг қандай морфемаларнинг бирикшидан ҳосил бўлишини бирор қолипга тушириб, группалаб бўлмайди. Шунингдек, қўшма сўзни ҳосил қи́лувчи компонентлар бир сўз туркумига ёки турли сўз туркумига оид бўлиши мумкин: *отқулоқ* (от+от), *кўк-қарға* (сифат+от), *қирқоғайни* (сон+от) каби. Жуфт сўзларнинг компонентлари эса бир туркумга оид бўлади: *бахт-саодат, ота-она, келин-куёв, катта-кичик, баланд-паст, аччиқ-чучук, аста-секин*.

4. Бир туркумга оид ҳар қандай икки сўз жуфтлашавермайди. Бунда жуфтлашувчи сўзларнинг маъно муносабати муҳим роль ўйнайди. Ўзбек тили фактларининг кўрсатишича, ўзаро қўйидагича муносабатда бўлган сўзлар жуфтлаша олади: 1) синонимлар жуфтлашади: *сарсон-саргардон, фаҳм-фаросат* каби; 2) антонимлар жуфтлашади: *катта-кичик, яхши-ёмон, баланд-паст* каби; 3) бирор тўдага, турга оид (умумийлиги бўлган) нарсаларни билдирувчи сўзлар жуфтлашади: *қозон-товоқ, кўрпа-ёстиқ* каби.

5. Жуфт сўз ифодалайдиган маъно компонентларининг мустақил маънога эга ёки эга эмаслигига, жуфт сўзнинг қандай характердаги сўзлардан ташкил топганига ҳам боғлиқ:

1. Компонентлари мустақил маъноли бўлган жуфт сўзларда жамлик, умумлаштириш каби маънолар ифодаланади. Жумладан: а) синонимлар жуфтлашганда: *иззат-ҳурмат, шон-шуҳрат, бахт-саодат, ошна-оғайни, қариндош-уруг* каби; б) антонимлар жуфтлашганда: *Душман бор-йўғини бой берди. (Н. Сафаров.) Овқат устиди Хадиҷа хола қишлоқда бўлиб ўтган ҳамма катта-кичик ҳодисалар ҳақида гапириб берди.* (А. Қаҳҳор.); в) маълум тўдага, умумий бирликка эга бўлган нарсаларни билдирувчи сўзлар жуфтлашганда: *Ўлмас идиш-товоқларни йигиштириди. (Ё. Шукуров.)*

*Эркаклар, хотинлар кўрпа-ёстиқларини кўтариб дала шийлонларига чиқишиди.* (Х. Назир.)

Хуллас, мустақил маъноли сўзлардан ташкил топган жуфт сўзларнинг асосий хусусияти жамлик, умумлаштиришни ифодалашдир. Мустақил маъноли сўзларнинг жуфтлашишидан янги маъноли сўз ҳосил бўлиши жуда кам учрайди. Шунда ҳам жуфт сўзниң компонентлари ўз асл маъносида қатнашмайди: *Отам ҳам уйғонгач, нари-бери чой ишиб, кўчага чиқдик.* (Гайратий.) Аммо у гўдак эди, дунёниң **борди-келдисини ҳам**, бу одамларнинг чақириқларида самимият йўқлигини ҳам билмасди. (П. Турсун.) **Унда-мунда** бу манзараларни хира қилиб турган қамишзор тўйайлар, кўкатлари қовжираган шўрхок ерларга кўзи тушаркан... (Х. Назир.)

Мустақил маъноли сўзлардан тузилган жуфт сўзниң компонентлари нутқда уюшиқ бўлак ҳолида қўлланиши мумкин. Бироқ бу ҳолда, биринчидан, икки сўз орасидаги пауза узоқ бўлади; жуфт сўз компонентлари орасидаги пауза эса қисқа бўлади. Қиёсланг: *бахт-саодат—бахт, саодат (бахт ва саодат); уй-жойли—уйли, жойли; паст-баланд—паст, баланд* каби. Иккинчидан, жуфт сўз жамлик, умумлаштириш ифодалайди. Унинг компонентлари уюшиқ ҳолда қўлланса, бу маъно ифодаланмаслиги мумкин. Қиёсланг: *ота-она—ота, она (ота ва она), катта-кичик—катта, кичик (катта ва кичик)* каби.

Демак, жуфт сўзларда бир бутунлик бор. Бу унинг форма бутунлигидир. Шунинг учун ҳам форма ясовчи аффикслар жуфт сўзниң охирига (иккинчи компонентга) қўшилади: *Кўсак қуртини йўқотиб, ҳосилни сақлашда колхозчи ота-оналаримизга ёрдам берайлик.* (Х. Назир.) Тақсир, у киши тўртинчи осмонда бўлсалар **нон-сувларидан** ким хабар олиб туради? („Афанди латифалари“.) Агар форма ясовчи аффикслар ҳар бир компонентга қўшилса, орадаги пауза узаяди, жуфт сўз уюшиқ бўлакка айланади. Қиёсланг: *ота-оналаримизга — оталаримизга, оналаримизга, нон-сувларидан — нонларидан, сувларидан.*

2. Жуфт сўзларнинг мустақил маънога эга бўлмаган компоненти ҳозирги ўзбек тилида мустақил қўлланмайди: *тўс-тўполон, бозор-ӯчар, важ-карсон, латта-путта, мева-чева* каби.

Бир компоненти мустақил қўлланмайдиган жуфт сўзларда икки ҳодисани кўриш мумкин: а) иккала компоненти аслида мустақил маъноли бўлиб, ҳозирда бир компоненти мустақил маъносини йўқотган жуфт сўзлар. Бундай жуфт сўзлар умумлаштириш маъносини ифодалайди: *гина-кудурат, боғ-роғ, темир-терсак, тўс-тўполон*; б) иккинчи компоненти биринчи компонентининг фонетик ўзгаришидан иборат бўлган жуфт сўзлар: *чала-чулла, майдада-чуйда, ош-пош, нон-пон, қора-қура; азрҳ-сазраб*. Бунда фонетик ўзгаришнинг қўйидаги асосий кўринишлари бор: а) бир товуш (биринчи товуш) ўзгаради: *мева-чева, бурда-сурда, чой-пой*; б) бир товуш ортирилади: *ишим-сирим (ишим-чирим), ора-чора, ун-пун, ош-пош* каби; в) унли товуш ўзгаририлади: *хашак-хушак, жар-жур, дон-дун, калта-култа*; г) бош товуш ҳам, унли товуш ҳам ўзгаририлади: *майдада-чуйда, ола-кула*; д) товуш ҳам ортирилади, унли ҳам ўзгаради: *ора-сира, алдаб-сулдаб*.

Мустақил қўлланадиган компонент ўз маъносида қўлланмаса, янги маъно ифодаланиши (янги сўз ҳосил бўлиши) мумкин. Лекин бундай сўзлар ҳам саноқли даражада: *майдада-чуйда* (баъзи арзимас нарсалар), *ора-сира* каби.

Иккинчи компонентини фонетик ўзгариши орқали ҳосил қилинган жуфт сўзларда иккинчи компонент биринчи компонентдан фонетик жиҳатдан бутунлай ўзгариб кетмайди, балки унга яқин (ўхшашроқ) кўринишда бўлади. Шунинг учун *мева-чева* сўзидан мева ва шунга яқин, шунга ўхшаш нарсалар англашилади. *Ун-пун, нон-пон, чой-пой* кабиларда ҳам худди шундай.

3. Нутқимизда иккала компоненти мустақил маънога эга бўлмаган жуфт сўзлар ҳам учрайди: *ғиди-биди, ўлда-жўлда, алпон-талпон, адид-бади, икир-чикир, азза-базза, апил-тапил, аланг-жаланг, ажси-бужси, апоқ-чапоқ, ими-жимида, лаш-луш*. Бундай жуфт сўзлар бир лексик маъно ифодалаши билан бирга, уларда ҳам умумлаштириш, жамлик сезилади.

Бу типдаги жуфт сўзларнинг иккала компоненти аслида ҳам мустақил қўлланмайдиган бўлган дейиш мумкин эмас. Чунки тилда умуман бўлмаган „сўзлар“ дан жуфт сўз ҳосил қилиб бўлмайди. Бундай жуфт сўзлар ё аслида икки мустақил қўлланадиган сўздан

ташкил топган бўлиб, кейинчалик унинг компонентлари мустақил маъносини йўқотган бўлиши мумкин. Ёки биринчи компоненти мустақил маъноли бўлиб, иккинчи компоненти унинг фонетик ўзгарган шакли бўлган, кейинчалик биринчи компоненти ҳам мустақил маъносини йўқотган бўлади. Бу ҳодисани *аланг-жаланг* жуфт сўзи мисолида аниқ кўриш мумкин. Мазкур жуфт сўзниңг биринчи компоненти мустақил қўлланмайди. Лекин ҳозирги ўзбек тилида ундан -ла аффикси ёрдамида ясалган *алангламоқ* феъли бор. Демак, *аланг* ҳам аслида мустақил қўлланувчи сўз бўлган деб қараш керак бўлади.

Иккала компоненти мустақил маъноли сўзлардан бўлган жуфт сўзлар компонентларининг маъноси сақланишини кўрдик. Лекин бу жуфт сўз компонентлари жуфт сўз доирасида тамомила мустақил ҳолатда бўлади деган сўз эмас. Жуфт сўз компонентлари ўзаро бир бутунликда бўлади. Бу бутунлик (ажралмас ҳолатдалик) жуфт сўз компонентларининг жойлашиши тартибида ҳам кўринади.

Жуфт сўз компонентларининг ўрни (биринчи ёки иккинчи ўринда қўлланиши) асосан қатъий бўлади. Масалан, *қариндош-уруг*, *ошна-оғайни*, *салом-алик*, *яхши-ёмон*, *катта-кичик*, *беш-ўнта* каби жуфт сўзларнинг ўрнини алмаштириб бўлмайди (уруг-қариндош каби). Баъзи жуфт сўзлардагина компонентларнинг ўрнини алмаштириб қўллаш мумкин: *эсон-омон—омон-эсон*, *ёзин-қишин—қишин-ёзин*, *секин-аста—аста-секин* каби.

Жуфт сўз компонентларининг тартибланишида (биринчи ёки иккинчи ўринда қўлланишида) маълум қонуниятлар бор. Бунинг асосийлари сифатида қўйидагиларни айтиш мумкин:

1. Ҳажм, ёш жиҳатдан каттасини, вазифасига (мав-қеига) кўра асосийсини билдирувчи сўз олдин (биринчи компонент сифатида) қўлланади: *Ота-бала*, *ака-ука*, *она-сингил*, *хотин-қиз*, *невара-чевара*, *сигир-бузоқ*, *қўй-қўзи*, *кўрпа-ёстиқ*, *қозон-товоқ*, *товоқ-қошиқ*, *ўтин-чўп*, *тоғ-тош*, *катта-кичик*, *узун-қисқа* каби-лар.

2. Маъноси кенгроқ бўлган (умумийроқ тушунчани ифодалайдиган) сўз иккинчи ўринда қўлланади. Бундай қўлланиш жуфт сўзниңг умумлаштириш, жамлик

ифодалаш хусусиятига жуда мос келади: *от-улов, хат-хабар, бева-бечора, соя-салқын* кабилар. Умуман олганда, от ҳам улов, лекин улов сўзи отдан бошқа юқташийдиган, миниладиган ҳайвонларни ҳам билдиради. Шунга кўра *от-улов* жуфт сўзида улов сўзи албатта иккинчи ўринда қўлланади.

3. Жуфт сўз ҳосил қилувчи сўзлардан бири иккинчисига нисбатан маънони кучли оттенка билан ифодалайдиган бўлади. Шундай хусусиятга эга бўлган сўз иккинчи компонент бўлиб қўлланади: *якка-ягона, тош-метин, камбағал-қашшоқ, дод-фарёд, чанг-тўзон*.

4. Баъзи жуфт сўз компонентларининг тартибланиши улар ифодалайдиган ҳаракат-ҳолат, вақт, миқдор ва шу кабиларнинг қонуний кетма-кетлиги билан боғлиқ бўлади: *салом-алик, савол-жавоб, эрта-индин, беш-олти* кабилар. Алик саломдан, жавоб саволдан, индин эргадан, олти бешдан кейин бўлади. Шу сабабли юқоридаги жуфт сўзларда *алик, жавоб, индин, олти* сўзлари иккинчи ўринда қўлланади.

Демак, жуфт сўз компонентларининг тартибланиши шу компонентлар ифодалайдиган маънонинг ўзаро муносабати асосида бўлади. Компонентлар ўртасида фарқли хусусият сезиларсиз бўлса ёки умуман бўлмаса, уларнинг ўрнини алмаштириб қўллаш мумкин бўлади: *паст-баланд—баланд-паст, аста-секин—секин-аста* каби. Лекин бундай жуфт сўзлар кам миқдорда<sup>1</sup>.

Юқорида кўриб ўтилганлардан маълум бўладики, иккала компоненти мустақил маъноли, шунингдек, бир компоненти маънога эга бўлмаган жуфт сўзларда икки компонентнинг бирликда (жуфт ҳолда) қўлланиши янги лексик бирликни (лексемани) юзага келтирмайди. Шундай экан, уни сўз ясалиш ҳодисаси деб ҳам бўлмайди. Жуфт сўзлар ифодалайдиган жамлик, умумлаштириш каби маънолар ҳам уларни сўз ясалиш ҳодисасидан кўра морфологик ҳодиса деб қараш тўғри бўлишини кўрсатади. Чунки жамлик, умумлаштириш маънолари,

<sup>1</sup>Жуфт сўз компонентларининг тартиби ҳақида қаранг: Н. К. Дмитриев. Парные словосочетания в башкирском языке, Известия АН СССР, отд. гуманитарных наук, №7, 1930, 502—510- бетлар; А. Ф. Гуломов. Ўзбек тилида сўз ясаш йўллари ҳақида. А. С. Пушкин номидаги тил ва адабиёт институти асарлари, 1- китоб, Тошкент, 1949, 67-68- бетлар.

маънони кучайтириш кабилар сўз формаларига (сўз-нинг у ёки бу формасига) хос хусусиятдир. Бу маънолар лексик маъно таркибида кирмайди, балки лексик маънога қўшимча тарздаги маънолар бўлади. *Унда-мунда, ора-сира, ўлда-жўлда* кабиларнинг янги маъно ифодалаши жуфт сўз ясалишидан кейинги ҳодиса, маълум вақтлар ўтиши билан юз берган ҳодиса деб қаралиши керак. Чунки, *тўс-тўполон, ондх-сонда, лаш-луш* каби жуфт сўзларни ҳозирги кундаги актив ясалиш деб баҳолаш учун уларнинг компонентлари ҳозирги кунда ҳам қўлланаётган бўлиши керак.

**Такрорий сўз.** Лексик-грамматик жиҳатдан бир бутунликни ташкил қилувчи, такрор ҳолда қўлланган сўз такрорий сўз дейилади: *ба ғанд-блхчд* (иморат), *омбор-омбор* (фалла), *жой-жойга* (қўймоқ), *ӯши-ӯша, минг-минг* (томушабин) каби.

Бир сўзниңг такрор ҳолда қўлланиши билан (бир сўз кетма-кет икки марта қўлланса) ҳамма вақт такрорий сўз (сўзниңг такрорий формаси) ҳосил бўлавермайди, яъни такрор ҳолда қўлланган сўз такрорий форма бўлавермайди. Айни бир сўзни такрор қўллаш билан сўзниңг лексик маъносидан ташқари яна бошқа маънолар ифодалаш мўмкин. Бирор маънони ифодалаш учун қўлланган бундай такрорий сўзлар лексик ва грамматик жиҳатдан бир бутунликни ташкил этади: *Қуюқ япроқлар орасидан шода-шода осилib, муралаб турган олчалар яшил гиламга нуқта-нуқта қизил гулчалар тикиб қўйганга ўхшаб товланади.* (Х. Назир.) *Шамол бу ерда мастди, Гулларни қуча-қуча.* (Ойбек.) Келтирилган мисоллардаги *шода-шода, нуқта-нуқта* такрорий сўзлари кўплик маъносини, қуча-қуча жуфт сўзи ҳаракатнинг такрорийлигини билдиради.

Айни бир сўз такрор (ёнма-ён) қўллангани билан, унинг ўз лексик маъносидан бошқа маъно ифодалан-маслиги мумкин. Бундай ҳолда такрорий форма ҳосил бўлмайди, балки у бир сўзниңг оддий такрори ҳисобланади: *Қўрқма, қўрқма!* — деб такрорлади Асрлон ака. (Ё. Шукуров.) — Э, келинг, келинг! Қандай бўлиб кириб қолдингиз, директор опа? (С. Зуннунова.)

Икки компонентдан ташкил топиши, маълум бир лексик-грамматик маънони ифодалashi каби хусусиятлари билан такрорий сўзлар жуфт сўзларга жуда яқин

туради. Лекин жуфт сўзлар билан такрорий сўзлар ўзларига хос хусусиятлари билан бир-биридан фарқланади. Буларнинг ўзаро фарқли белгилари сифатида қуидагиларни кўрсатиш мумкин:

1. Жуфт сўз ҳамма вақт бошқа-бошқа сўздан ташкил топади: *ақл-ҳуш*, *ёзин-қишин* каби. Такрорий сўз айни бир сўзниң тақоридан ҳосил бўлади: *баланд-баланд*, *қумоқ-қумоқ*.

2. Жуфт сўзниң бир, ҳатто, иккала компоненти ҳозирги ўзбек тилида мустақил маъносини йўқотган бўлиши мумкин: *апил-тапил*, *икир-чикир* каби. Тақрорий сўзниң иккала компоненти ҳам мустақил маъноли бўлади: *баланд-баланд*, *қатор-қатор*, *тез-тез* каби.

3. Жуфт сўзлар, асосан, умумлаштириш, жамлик маъноларини ва турли маъно оттенкаларини ифодалайди. Тақрорий сўзлар кўплік, давомлилик, тақрор каби маъноларни ифодалайди.

Тақрорий сўзларда янги сўз ясалиши ҳолати деярли учрамайди, яъни айнан бир сўзни тақрорий ҳолда қўллаш билан янги бир сўз ясалмайди. Тақрорий сўзлар кўплік, тақрор, давом каби маъноларни ифодалаш учун, маънони кучайтириш учун қўлланади: *у ҳујрасда тўкилиб-сочилиб ётган нарсаларни йиғиштириб, жой-жойига қўйди.* (И. Раҳим.) *Суяқ-суягидан ўтиб кетган совуқ, очлик, ўз таъсирини кўрсата бошлади.* (Ҳ. Шамс.) *Баъзи-баъзида қушлардан қўрқмаган катта балиқлар кўкка сакрап, қумуш ранг тангачаларини ҳавода ялтиратиб, яна сувга шўнгирдилар.* (О. Ёқубов.) *Кўччи югуриб келиб уни бўйнидан қулоқлаб олди, хўрлиги келиб ҳўнг-ҳўнг йиглади.* (М. Исмоилий.)

Кўринадики, тақрорий сўзлар ифодалайдиган маънолар ҳам лексик маъно таркибига кирмайди, балки лексик маънога қўшимча тарздаги маънолар ҳисобланади. Тақрорий сўзлар ифодалайдиган кўплік, давом, тақрор каби маънолар грамматик маънолар, сўз формасига хос маънолардир. Шунинг учун ҳам тақрорий сўзларни сўз ясалиши ҳодисаси ғәмас, балки морфологик ҳодиса деб қараш тўғри бўлади.

Хуллас, жуфт ва тақрорий сўз ясалиши аффикслар ва ёрдамчи сўзлар воситасида форма ясалиш ҳодисасидан тубдан фарқ қилса-да, яъни улар ҳақиқий маъ-

Нодаги форма ясалишдан маълум даражада фарқланса-да, лекин, барибир, улар лексик ҳодиса эмас, балки грамматик ҳодиса ҳисобланади. Шунга кўра улар тил-шуносликнинг сўз ясалиши бўлимининг эмас, балки морфология бўлимининг ўрганиш обьекти бўлиши ке-рак.

Ҳозирги ўзбек тилида *-ба*, *-ма* элементлари ёрда-мида боғланган *ранг-баранг*, *дам-бадам*, *кетма-кет*, *бетма-бет*, *далама-дала*, *уйма-уй*, *йўлма-йўл* каби сўзлар анчагина бор.

*-ба* ва *-ма* элементлари аслида форс-тожик тилла-рига хосдир. Ўзбек тилида аввал шу элементлар ёрда-мида ясалган форс-тожик тилларига хос бирикмалар-гина қўлланган бўлиб, кейинчалик *-ба* ва *-ма* элемент-лари ёрдамида ўзбек тилига оид сўзлардан ҳам шу типдаги бирикувлар ҳосил қилина бошлаган.

Ўзбек тилида жуфт ва такрорий сўзларнинг компо-нентлари ҳеч қандай боғловчи элементсиз бириккан бўлади, яъни ўзбек тилида жуфт ва такрорий сўзлар-нинг ташкил топишида бирор аффикс ёки боғловчилар қатнашмайди. Сўзларнинг бирор аффикс ёки боғловчи-лар ёрдамида боғланishiдан жуфт ёки такрорий сўз ҳосил бўлмайди. Шунга кўра, *ранг-баранг*, *кўчама-жўча*, *бетма-бет* кабиларда икки сўз *-ба*, *-ма* элемент-лари ёрдамида боғланган экан, ўз-ўзидан, уларни жуфт ёки такрорий сўзлар қаторига киритиш тўғри бўл-майди.

*-ма* элементи икки сўзни ўзаро боғлаш учун хиз-мат қиласа ҳам, лекин уни ҳозирги ўзбек тилида боғловчилар қаторига киритиб бўлмайди. Чунки, бирин-чидан, ўзбек тилида боғловчилар турли маънога эга бўл-ган бошқа-бошқа сўзларни, сўз бирикмаси, ҳатто гап-ларни бир-бири билан боғлаш учун хизмат қиласди. *-ма* элементи эса айни бир сўзнинг такрор ҳолатини боғ-лаш учун хизмат қиласди. Иккинчидан, ўзбек тилида боғловчилар ёрдамида боғланган сўзлар ҳамма вақт ўз маъносини сақлайди ва гапнинг уюшиқ бўлаги ҳи-собланади. Бунда шу сўзларнинг маъносига қўшимча маъно юкланмайди: *ака ва ука*, *дафтар ва қалам* ка-би. Айни бир сўзнинг такрори *-ма* элементи ёрдамида боғланганда, шу сўзнинг маъносига қўшимча турли маънолар англаради ва улар гапда бир бўлак вазифа-сида келади.

Ўзбек тилида -ма элементи ёрдамида боғланган сўзлар янги лексик маъно касб этиб, янги сўзга айланиши мумкин: *Бу ер ўртоқ Холназаровга ёқди шекилли, анча очилиб...* йўл билмасалар ҳам ашуулаларга кўшилиб, *пойма-пой* бўлса ҳам асқияларга луқма ташлаб ўтирилар. (С. Абдулла.) Бир-биримизга айтган илик-иссиқ гапларимизни *сўзма-сўз* эсладим. (Сайд Аҳмад.) Бу мисоллардаги *пойма-пой*, *сўзма-сўз* сўzlари сўз ва *пой* сўzlаридан фарқланувчи янги сўzlардир.

Икки сўзниг -ма элементи ёрдамида боғланишидан янги сўз ҳосил бўлмай, шу сўзниг маъносига қўшимча маънолар ифодаланган ҳолатларда, бу маънони -ма элементи ўрнида бошқа воситаларни (аффикс ёки кўмакчиларни) қўллаш орқали ҳам ифодалаш мумкин: *Бу команда тонгдаги хўрозлар қичқиришидай тезда бирини бири илиб, оғизма-оғиз* мудофаанинг у бошигача ўтиб кетди. (Шуҳрат.) Хотинлар бир-бирига гап бермасдан чувиллашар, катта оқ пиёла *қўлма-қўл* айланарди. (С. Зуннунова.) Саида боргандা, раис ҳамон ўшандай, сўрида оёғини осилтириб, *навбатма-навбат* гапираётган икки кишининг сўзига дикқат билан қулоқ солиб ўтирас эди. (А. Қаҳҳор.) Келтирилган мисоллардаги -ма элементи ёрдамида боғланган *оғизма-оғиз* ўтиб, *қўлма-қўл* ифодалаган маънони *оғиздан оғизга ўтиб, қўлдан қўлга* тарзида ифодаласа ҳам бўлади. „*Навбатма-навбат*“ ифодалаган маънони эса „*навбат билгн*“ формасида ифодалаш мумкин.

Маълум бўладики, жуфт ва такрорий сўzlар жамлик, умумлаштириш, такрор, давом каби маъноларни ифодалаш учун хизмат қиласди. -ма (-ба) элементи билан бириккан сўzlарда ифодаланган маъно турлича бўлиб, бу маъноларни умумлаштириб бўлмайди. Шу жиҳатдан ҳам уларни жуфт ёки такрорий сўzlар қаторига киритиб бўлмайди. Уларни алоҳида бир ҳодиса деб қараш керак. Шунингдек, бу типдаги ясалишни ҳақиқий маънода янги сўз ясалиш усули деб бўлмайди. Булардан маълум бир қисми янги маъно касб этиши (лексикализацияга учраши) мумкин.

Жуфт ва такрорий сўzlарнинг компонентлари бирон грамматик форма ёрдамида бирикмайди. Компонентлари орасидаги паузанинг қисқалиги ва маълум бир маъно

ифодалаши жуфт ва такрорий сўз компонентларининг яхлитлигини, бир бутунликка эгалигини кўрсатади. Худди ана шу бутунликнинг ифодаси сифатида ёзувода компонентлар орасига дефис қўйилади.

Хозирги ўзбек тилида маҳсус бирикиш формасига эга бўлган баъзи бирикмалар ҳам жуфт ёки такрорий сўз деб тасаввур этилиб, дефис билан ёзилмоқда. Бу ўқиш-ўқитиш ишларида қатор қийинчилик ва чалкашликларнинг юз беришига сабаб бўлади. Турли манбалардан олинган қуйидаги мисолларга мурожаат этайлик: *Яйловда ўтлаб юрган қўй, сигир подалари, уюр-уюр ийлқилар дала-нинг ҳуснига-ҳусн қўшди.* (Н. Фозилов.) Мебелларни айтмайсизми? *Вой ўлай, бири-биридан томоша, бири-биридан чиройли...* (М. Исмоилий.) Ойиси ўсмали қошларини эгар қилиб, қизарив-бўзарив, *лаби-лабига* тегмай директорга алланималардан арз қиласарди. (Ҳ. Назир.) Уларнинг таржимаси ҳоллари, қилган ишлари бир-бирига *ишидан-игнасигача* мавлум бўлади. (Ҳ. F.) Собир чамадончасини кўлтиқлаб, офтоб тифида терлаб-пишганича у ёқдан-бу ёққа танда қўйди. (Ҳ. Назир.) *Бекордан-бекорга* мукофотдан маҳрум этиб юборди. (М. Кориев.) Нокоратупроқ ерларни ўзлаштиришда бошқирд изи Р. Зокирова, рус йигит А. Бусак, ... ўзбек ўғлони монтажчи Ж. Истроилов *қўлни-қўлга* берив меҳнат қилишмоқда. („Сов. Ўзб“.)

Келтирилган мисоллардаги ҳуснига-ҳусн, бири-биридан, лаби-лабига, ишидан-игнасигача, у ёқдан-бу ёққа, қўлни-қўлга кабилар жуфт ёки такрорий сўз эмас ва уларни дефис билан ёзишга ҳеч қандай асос йўқ. Чунки буларда ҳар бир сўз ўзининг маҳсус формасига, яъни боғланишни кўрсатувчи формал белгига эга. Дефис эса ўзаро боғланишни (бутунликни) кўрсатувчи ҳеч қандай формал кўрсаткич бўлмаган ҳоллардагина, шу боғланиш (бутунликнинг) ёзуводаги ифодаси сифатидагина қўлланади. Дефисни ўринсиз қўллаш фаят „ортиқчалик“кина эмас, балки қатор назарий чалкашлик, амалий заرار келтирувчи ҳолат сифатида қаралиши керак.

Хуллас, икки компонентнинг бирикиши маҳсус вонита (форма) ёрдамида бўлганида улар жуфт ёки такрорий сўз бўлмайди ва дефис қўллашга эҳтиёж қолмайди. Шу жиҳатдан қараганда белгининг кучли дара-

жасини билдирувчи (кучайтирувчи) *кўпдан кўп*, узундан узок, қуюқдан қуюқ, текиндан текин, янгидан янги, очиқдан очиқ каби формани, шунингдек, ўзига мустақил формага эга бўлган компонентли қирдан қирга, йилдан йилга, қўлни қўлга, ҳосилга ҳосил (қўшмоқ), кучига куч (қўшилмоқ), кўнгилга кўнгил (тўғри келмоқ), бири бирига (ўхшамоқ) каби бирималарни дефис билан ёзишга эҳтиёж ҳам, асос ҳам йўқ. Булар жуфт сўз ҳам, такрорий сўз ҳам эмас. Уларни ажратиб ёзиш тўғри бўлади. Агар бундай боғланишдаги биримув компонентларидан бирининг (одатда, биринчисининг) формаси ўзгарса ва у ўз мустақиллигини йўқотса, биримув бир бутун ҳолга келиши сабабли, уларни дефис билан ёзиш мумкин: *бири бирига* (*бири*—бош келишик, III-шахс формасида)—*бир-бирига* (яхлитлигича) жўналиш келишиги формасидаги бир сўз.

Юқорида айтилганлар ва келтирилган фактлардан маълум бўладики, композиция усули билан сўз ясалиши дёганда, ҳақиқий маънода, қўшма сўз ясалишинигина назарда тутиш мумкин. Жуфт ва такрорий сўзлар, асосан, турли грамматик маъноларни ифодалаш учун ҳизмат қиласади<sup>1</sup>.

### КАТЕГОРИАЛ ВА НОКАТЕГОРИАЛ ФОРМАЛАР

Юқорида бирор грамматик маъно ва шу маънони ифодаловчи форма бошқа грамматик маъно ва форма билан бирликда грамматик категория ҳосил қилиши ёки бундай хусусиятга эга бўлмаслиги мумкин эканлиги кўрилди. Шу хусусиятга кўра сўз формалари иккни асосий турга бўлинади: 1) *категориал формалар*; 2) *нокатегориал формалар*.

Категориал формалар маълум бир сўз туркумидаги бирор грамматик категорияга ҳос форма лардир. Бундай формални ясовчи аффикслар категориал форма ясовчи аффикслар ҳисобланади. Масалан, отлардаги келишик ва эгалик формалари (*китобни, китобим*), феъллардаги замон, шахс-сон формалари (*ўқиянман, ўқидим*) категориал формаларга киритилади.

<sup>1</sup>Ўзбек тилидаги қўшма, жуфт ва такрорий сўзлар ҳақида қаранг: А. F. Гуломов. Юқорида кўрсатилган асар; А. Ҳожиев. Ўзбек тилида қўшма, жуфт ва такрорий сўзлар, Тошкент, 1963; Б. Мадалиев. Ҳозирги ўзбек тилида қўшма сўзлар, Тошкент, 1966.

Нокатегориал формалар бирон-бир грамматик категорияга оид бўлмайди. Улар сўзнинг маълум бир грамматик маъно ифодаловчи, маълум бир синтактик вазифага хосланган формасидир. Бундай формани ясовчи аффикслар нокатегориал форма ясовчи аффикслар ҳисобланади. Масалан, отларнинг кичрайтиш (*уйча*, *қуашча*), эркалаш (*укажон*), феълнинг сифатдош ва рашидош формаси нокатегориал формалар ҳисобланади.

### „Модал ёки субъектив баҳо формалари“ ҳақида

Ўзбек тили грамматикасига оид ишларда баъзи сўз формалари „модал форма“ ёки „субъектив баҳо формаси“ номи билан берилиб, сўз формасининг алоҳида тури сифатида таърифланиб келмоқда. Бунда, асосан, кичрайтиш, эркалаш маъноси ва субъектнинг бошқа хилдаги муносабатларини ифодаловчи *қуашча*, *қуёнча*, *қўзичноқ*, *акажон*, *қизалоқ* каби типдаги формалар назарда тутилади. Лекин ана шундай формаларни таърифлашда, унга бўлган муносабатда бир қатор хото ва нуқсонлар, чалкашликлар кўзга ташланади.

Ишнинг аввалги бўлимларида форма ясовчи аффиксларнинг икки асосий турга бўлиниши (категориал форма ясовчи аффикслар ва нокатегориал форма ясовчи аффикслар), демак, сўз формаларининг ҳам икки асосий тури—категориал формалар ва нокатегориал формалар каби турлари борлиги айтилган эди. Сўз формаларини бу типда иккига бўлиш ўз принципига эга, яъни бунда сўз формаларининг грамматик категорияга бўлган муносабати асосга олинади. Сўз формаларини „модал форма“ ёки „субъектив баҳо формаси“ каби турларга ажратишида эса бундай умумий принцип йўқ, улар ўз маъноларига кўра шундай турларга ажратилмоқда.

Эътибор берилса, „модал форма“, „субъектив баҳо формаси“ деб таърифланиб келаётган формалар сўз ясалишига ҳам, грамматик категорияларга ҳам алоқаси бўлмаган ҳодисалар экани маълум бўлади. Бу жиҳатдан қараганда, „модал форма“, „субъектив баҳо формаси“ терминлари „нокатегориал форма“ маъносида қўлланандек кўринади. Аслида эса бундай эмас.

Биринчидан, нокатегориал формалар ҳозирги ўзбек тилида жуда кўп миқдорни ташкил этади. „Субъектив баҳо формаси“, „модал форма“ ҳақида гапирилган ишларда эса саноқли формалар ҳақидагина гап боради.

Иккинчидан, нокатегориал формалар деярли барча мустақил сўз туркумларида бор. Модал форма ёки субъектив баҳо формаси ҳақида гап борган баъзи ишларда улар фақат от<sup>1</sup> ёки сифат<sup>2</sup> туркумида ёки ҳар иккисида<sup>3</sup> берилса, айрим ишларда бошқа туркумларда ҳам шундай формалар берилади<sup>4</sup>.

Ниҳоят, учинчидан, яна шуниси ҳам характерлики, айрим ишларда „модал форма“, „субъектив баҳо формаси“ сўз ясалиши баҳсида берилса<sup>5</sup>, баъзи ишларда „модал форма“ ва „субъектив баҳо формаси“дан ташқари, яна „функционал форма“ ҳам берилади<sup>6</sup>.

Бу фактлар, бир томондан, „модал форма“, „субъектив баҳо формаси“ деб қаралаётган ҳодисанинг сўз ясалиш ёки форма ясалиш ҳодисаси экани ҳақида шу вақтга қадар аниқ бир фикрга келинмаганини кўрсатса, иккинчи томондан, бу формалар сўз формасининг қандай тури экани масаласида ҳам аниқ ва тўғри бир фикрга келинмаганини кўрсатади. Буларнинг асосий сабаби ўзбек тилида сўз ясалиши ва форма ясалиши ҳодисаларининг ўзига хос хусусияти етарли ўрганилмаганинига, шунингдек, форма ясалишига алоқадор умумий назарий масалаларнинг деярли ўрганилмаганинига дадир.

Сўз ясалиши ва форма ясалиши икки хил ҳодиса бўлганидан, аввало, „модал форма“, „субъектив баҳо формаси“ деб қаралаётган тил ҳодисаларини конкрет белгилаб олиш ва уларни тилшуносликнинг ўзлари оид соҳасида бериш асосий масала ҳисобланади.

---

<sup>1</sup>Хозирги ўзбек адабий тили (коллектив), 1, Фонетика, лексикология, морфология, ЎзССР „Фан“ нашриёти, Тошкент, 1966, 225-бет.

<sup>2</sup>Ўзбек тили грамматикаси (коллектив), 1, Морфология, ЎзССР „Фан“ нашриёти, Тошкент, 1975, 300-бет.

<sup>3</sup>У. Турсунов, Ж. Мухторов, Ш. Раҳматуллаев. Хозирги ўзбек адабий тили, „Ўқитувчи“ нашриёти, Тошкент, 140-, 154-бетлар.

<sup>4</sup>М. Мирзаев, С. Усмонов, И. Расулов. Ўзбек тили, „Ўқитувчи“ нашриёти, 1966, 112-, 120-, 144-, 161-бетлар.

<sup>5</sup>Хозирги замон ўзбек тили (коллектив), Фахри Камол таҳрири остида, Тошкент, 1957, 338-бет; Хозирги ўзбек адабий тили, 1, Фонетика, лексикология, морфология, Тошкент, 1966, 226 бет.

<sup>6</sup>М. Мирзаев, С. Усмонов, И. Расулов. Кўрсатилган асар, 112-120-, 138-, 144-, 161-бетлар. У. Турсунов, Ж. Мухторов, Ш. Раҳматуллаев. Кўрсатилган асар, 140-, 154-, 188-бетлар.

Баъзи ишларда „модал форма“, „субъектив баҳо формаси“ сўз ясалиши ичидаги берилса-да, лекин „модал форма“, „субъектив баҳо формаси“ терминлари таркибида „форма“ сўзининг қўлланиши булар форма ясалishi ҳодисаси эканини кўрсатади.

Ўзбек тили морфологияси бўйича шу вақтга қадар асосан категориал формалар ўрганилганидан, кўпгина нокатегориал формалар сўз ясалиши баҳсида бериб келинган (бу ҳол *-даги*, *-дек*, *-ники* аффикслари ёрдамида ясалувчи формаларнинг берилishiда ҳам кўрилади).

Масаланинг муҳим томони—шу формаларнинг қандай турдаги форма эканини белгилашдир.

Ҳар қандай грамматик форма (сўз формаси) грамматик маъно ифодалайди. Демак, бу нарса барча грамматик формалар учун умумий хусусият. Ана шу грамматик формалар ифодалайдиган маъно эса турли-туман. Лекин сўз формалари билдирадиган маъноларига қараб умумий турларга бўлинмайди. Сўз формаларини бу тарзда турларга ажратишнинг на назарий асоси, на амалий аҳамияти бор.

Сўз формалари, қандай маъно ифодалашидан қатъи назар, грамматик категорияга бўлган муносабатига кўра икки асосий турга бўлинади: 1) категориал формалар, 2) нокатегориал формалар<sup>1</sup>. Ўзбек тилида ҳар қандай сўз формаси шу икки турдан бирига мансуб. „Модал форма“, „субъектив баҳо формаси“, „кичрайтиш-эркалаш категорияси“ деб таърифлаб келинётган қушча, қўзичоқ, қизалоқ, акажон каби формалар нокатегориал формалар қаторига киради. Чунки улар бирон бир форма билан оппозиция ҳосил қилмайди, бинобарин, грамматик категория ҳам ҳосил қилмайди.

„Модал форма“, „субъектив баҳо формаси“, „кичрайтиш-эркалаш категорияси“ терминлари айнан бир типдаги ҳодисаларга нисбатан қўлланиб келмоқда. Баъзи ишларда „модал форма“, бошқаларида „субъектив баҳо формаси“, яна бошқа ишда „кичрайтиш-эркалаш формаси“ термини қўлланса-да, лекин уларда көлтириладиган формалар, фактлар асосан бир хил. Шундай бўлиши ҳам табиий. Чунки сўзловчининг ўз фикрига

<sup>1</sup>Қаранг: „Ўзбек тили ва адабиёти“ журнали, 1977, 1-сон, 42-бет.

муносабатини ифодаловчи маънога модал маъно дейлади<sup>1</sup>, шу маънони ифодаловчи форма эса (маъноси асосида номланса) модал форма ёки субъектив баҳо формаси бўлади.

Энди ўзбек тилига оид адабиётларда „модал форма“ ёки „субъектив баҳо формаси“, „кичрайтиш-эркалаш формаси“ деб таърифланаётган формалар ҳақида икки оғиз гапириб ўтишга тўғри келади.

Сўзловчининг субъектив муносабатини ифодаловчи форма модал форма (субъектив баҳо формаси) ҳисобланар экан, ўз-ўзидан, айрим нокатегориал формаларнигина модал маъно ифодаловчи форма (субъектив баҳо ифодаловчи форма) деб қараш мумкин бўлади. Чунки нокатегориал формаларнинг маъно ва вазифа доираси жуда кенг бўлиб, улардан жуда саноқлисигина субъектив баҳо (модал маъно) ифодалайди. Ҳатто ўзбек тилига оид адабиётларда модал форма (субъектив баҳо формаси) деб таърифланаётган уч-тўртта форманинг ҳам ҳаммаси модал форма (субъектив баҳо формаси) эмас.

Масалан, модал форма (субъектив баҳо формаси) ҳақида гапирилган ишларнинг деярли ҳаммасида кичрайтиш билдирувчи -ча аффикси ёрдамида ясалувчи форма модал формалар (субъектив баҳо формалари) қаторига киритилади ва унинг кичрайтиш маъносини ифодалаши айтилади. Ваҳоланки, кичрайтиш маъносини модал маъно (субъектив баҳо) деб бўлмайди. Чунки, масалан, кичик стулни *стулча*, кичик қушни *қушча* деганда ҳеч қандай субъектив баҳо (субъектив муносабат, модал маъно) йўқ. Кичиклик белгиси шу предметнинг ўзида бор (объектив) нарса. Шундай экан, бундай хусусиятли формани модал форма ёки субъектив баҳо формаси деб бўлмайди. Тўғри, сўзни -ча аффиксли формада қўллаш билан эркалаш, камситиш каби муносабатлар ифодаланиши мумкин. Лекин бундай муносабатлар -ча аффиксининг кичрайтиш маъноси асосида сўзнинг лексик маъноси, интонация ва шу каби факторларнинг таъсирида реаллашади. Қўйидаги мисолларга мурожаат этайлик: *Поезд бир неча соат йўл юргандан*

<sup>1</sup>Каранг: Ўзбек тили грамматикаси, 1, Морфология (коллектив), ЎзССР „Фан“ нашриёти, Тошкент, 1975, 582- бет.

*кейин ана шундай бекатчалардан бирiga келиб түхтади.* (А. Қаҳҳор.) Далалар, боғлар, темир йўл ёқасидаги ҳовли ва ҳовличалар.. — ҳаммаси ям-яшил. (О. Ёқубов.) Новларнинг чеълакчаларига тўлган сув баландликдаги ариқчага қўйилади-да бобосини соғиниб келган боғбон набирачадай боғ ичига чопади... (Ҳ. Ғулом.) Сал шошмай турсанг, яхшилаб ўйлаб кўрардик-да, жиоянча. (Ҳ. Назир.) Чунки у кичик хотиннинг дўптиларини қайтариб олиб борса, жанжал бўлишини, нега меники ўтмас экан, етим-ча, деб уришини биларди. (Ё. Шукуров.)

Демак, -ча аффиксининг кичрайтиш хусусияти ҳар қандай ҳолатда ҳам сақланади. Шундай экан, -ча аффикси ҳамма вақт кичрайтиш ифодаловчи формант бўлиб қолади. Бу аффикс ёрдамида ясалган формани (айнан бир формани) кичрайтиш формаси, эркалаш формаси, камситиш формаси каби номлар билан аташ (шундай формалар сифатида баҳолаш) тўғри бўлмайди.

Маълум бўладики, -ча аффикси кичрайтиш маъносини ифодаловчи нокатегориал форма ясади. Бу формани модал маъно (субъектив баҳо) ифодаловчи формалар қаторига киритиб бўлмайди.

Умуман, ҳозирги ўзбек тили фактларининг кўрсатишича, маълум сўзларгагина қўшилиб, эркалаш, суйиш каби муносабат ифодаловчи -жон (ука-жон), -хон (отахон), -лоқ (қизалоқ) каби аффикс ва аффиксоидларни ҳисобга олмагандан, бу тилда у ёки бу сўз туркуми доирасида универсал тарзда, субъектив муносабат ифодаловчи форма ясайдиган аффикс (сўзнинг универсал тарзда қўлланувчи шундай маъноли формаси) йўқ. Бундай формаларнинг қўлланиш доираси уч-тўртта сўз ёки маълум типдаги сўзлар билан чегараланган. Шундай экан, субъектив баҳо ифодаловчи саноқли формаларни форма ясалишининг асосий тури сифатида алоҳида ажратиш, айниқса, уларга нисбатан „субъектив баҳо категорияси“, „кичрайтиш-эркалаш категорияси“ терминини қўллаш тўғри эмас. Биронта ҳам мустақил сўз туркуми бундай грамматик категорияга эга эмас.

Ўзбек тили грамматикасидан дарслик ва қўлланмаларда от ва сифатларнинг укагинам, болагинам, яхшигина, юмшоққина типидаги -гина (-кина, -қина) аффиксли қўлланиши шу сўз туркумларининг „модал

формаси" ёки „субъектив баҳо формаси“ деб таърифланади.

Дарслик ва қўлланмалардан ташқари модал маъно ифодаловчи, субъектив баҳо ифодаловчи формаларга бағишиланган ишларда ҳам -гина шундай форма ясовчилар қаторида келтирилади. Ҳатто -гина элементининг хусусиятларини ўрганишга бағишиланган маҳсус мақолалар ҳам бор. Бу ишларнинг ҳаммасида -гина омоним-аффикс сифатида берилади, яъни: 1) модал форма (субъектив баҳо формаси) ясовчи аффикс, 2) таъкид, чегаралаш ифодаловчи юклама-аффикс деб таърифланади. Бунинг исботи сифатида, биринчидан, -гина ифодалайдиган кучайтирув, чегаралаш маъноси билан унинг субъектнинг турли муносабатини ифодалаши бошқабошқа ҳодисалар экани кўрсатилса, иккинчидан, бу маъноларни ифодалашда „-гина“нинг сўзга қўшилиш тартиби ҳар хил бўлиши кўрсатилади: *укамгина—ука-гинаам, қизимгина—қизигина* каби.

Професор А. Гуломов -гина юкламасининг урғу олмаслиги, -гина аффиксининг урғули бўлиши уларни фарқловчи белгилардан деб кўрсатади.

-гина элементига хос хусусият деб юқорида айтилганларга, ҳақиқатда ҳам, ўзбек тилидан жуда кўплаб мисоллар келтириш мумкин: *Бу оҳанг эшитилишдан дағал, койиганга ўхшаса ҳам аслида ўқитувчи лар-гагина* хос бўлган меҳрибонлик, самимият туйғуси билан тўла эди. (С. Абдуқаҳҳор.) *Фақат ўшаларгина* гуноҳингдан кеча олади. (А. Мухтор.) Али Малик орадан бир неча йил ўтиб *кетгачгина* ўз шаҳрига қайтиб келди. (С. Абдуқаҳҳор.) Вой, шошманг, *дийдоргинасиға* бир тўйволай. (Саид Аҳмад.) У шуларни ўйлар экан, гўё эриса бир кор-ҳол бўлиб, *ўғилгинасидан* ажralиб қоладигандай қўрқиб кетди. (Н. Фозилов.) Чой ичмадинг-ку, *чойгинангни* ичмадинг-ку, тентагим. (Саид Аҳмад.) Толеимга сотувчи *сергапгина* йигит экан. (Саид Аҳмад.)

Бироқ бу фактлар -гина элементи ҳозирги ўзбек тилида ҳам юклама, ҳам от ва сифатнинг модал формаси (субъектив баҳо формаси) ясовчи аффикс, ўзбек тилида от ва сифат туркуми шундай нокатегориал формага эга дейиш учун асос бўла олмайди.

Аввало шуни айтиш керакки, -гина элементини

субъектив муносабат ифодаловчи восита сифатида от ва сифат туркумiga хос форма ясовчи аффикс деб қарашнинг ўзи тўғри эмас. Чунки ўзбек тилида икки мустақил сўз туркуми учун умумий тарзда бир хил маъно ва вазифадаги форма ясалиш ҳодисаси ва шундай формани ясовчи аффикс йўқ. Шу қонуниятнинг ўзиёқ болагинам, яхшигина типидаги қўлланишларни от ва сифатнинг ўзига хос форма ясалиши (от ва сифатнинг субъектив баҳо формаси) деб баҳолашга имкон бермайди.

Бундан ташқари, -гина элементининг чегаралаш (айириш) маъноси билан таъкид маъноси ва субъективнинг тўрли субъектив муносабати маъноси тамомила бир-биридан фарқли (узилган) маънолар эмас, балки бу маънолар ўртасида озми-кўпми боғланиш бор. Масалан: *Оқариб турган ўркачларни ёнгинасига борганда кўришди*. (А. Мухтор.) *Фатҳиддин aka нимадандир шошиб, ҳовлиқиб кириб келганида Рихсхон бир бўйрагина ерга экилган пиёзни ўтоқ қилаётган эди*. (С. Зуннунова.) Мен ҳам кўчанинг чангидан қочиб *четдангина велосипедни тез ҳайдай бошладим*. (Ойдин.) Бу мисолларда -гина элементи қатъий айириш маъносини („фақат“ деган маънони) ифодаламаса ҳам, лекин шунга яқин маъно, таъкид маъноси борлиги сезилиб турибди. Қуидаги мисолларда яна бир оз бошқачароқ ҳолни кўрамиз: *Менгинани куйдирив, шақларда юрибман дегин*. (Сайд Аҳмад.) Аксига олиб эрталаб лиммо-лим оқаётган сув тиниб қолибди, ариқнинг *таккинасида жилдираб ётибди*. (Р. Файзий.) Қадаҳлар бир-икки кўтарилигунича *одамлар-оеккина ўтиришган* эди. (С. Зуннунова.) Матниёз бу *пахтадаккина юмшоқ, илиқ вужудни яна бағрига олди*. (А. Мухтор.) Кечроққа борганда у икки марта *таксининг яқингинасидан ғувиллаб ўтиб кетди*. (А. Мухтор.)

Бу мисолларда айириш (чегаралаш) маъноси йўқ даражада, лекин таъкид маъноси сезилади. Шу билан бирга субъективнинг турлича муносабати ҳам ифодаланади. Қуидаги мисолларда эса айириш (чегаралаш), таъкид маънолари ўмуман сезилмайди, субъективнинг турлича муносабатини кўрсатувчи маънолар ифодаланади: *Ҳой, бу ким десам, сенмидинг, сўйлоққинам? Вой айланиб кетай дарозгинамдан!* (О. Ёқубов.)

**Жақжигина, чуваккина, иссиққина шу вужуд унга дархол қувват бағишилади.** (А. Мухтор.)

Келтирилган фактлардан маълум бўладики, -гина элементининг айириш (чегаралаш), таъкид маъноси билан субъектнинг турли муносабатини ифодаловчи маъноси ўртасида боғланиш бор<sup>1</sup>. Шу ҳодисанинг ўзиёқ -гина элементини икки ҳодиса—юклама ва форма ясовчи аффикс деб қарашга имкон бермайди.

Маълумки, форма ясалиши морфологик ҳодиса. Ҳар бир сўз туркуми ўзига хос форма ясалиш системасига, ўзига хос форма ясовчиларига эга. Сўз туркумлари бўйича умумий тарзда форма ясовчилар йўқ. Сўз туркумлариаро умумий тарзда қўлланиш юкламаларга хос хусусият. Шу қонуният асосида ёндашилганда ҳам субъектив баҳо ёки модал маъно ифодаловчи -гина элементини форма ясовчи аффикс деб бўлмайди. Чунки -гина бу маъно ва вазифада деярли барча мустақил сўз туркумлари доирасида қўллана олади: *Биттаси анчагина ёшга бориб қолган, иккинчиси ёшроқ, қотмагина.* (Ойдин.) *Тоҳирнинг эшиги олдига етиб келишганида улар сўзсизгина хайрлашиши.* (Э. Усмонов.) Каменка қишлоғи Белостокнинг *шундайгина* ўнг пинжига жойлашган. (С. Абдуқаҳҳор.) Улар ўша пайтларда ёзилган ва ҳозир танқидчилар рўйхатида пъесалардан фарқ қиласа, *салгинаёқ* фарқ қиласди. (О. Ёқубов.) Куни билан бир фойдали фикр кетида юриб, қорни очганини ҳам сезмаган Тўра, онасининг гапини эшиштагач, *бўшашибгина* супа четига ёнбошлиди. (Н. Фозилов.) Гулсанам *тезгина* орқасига қайрилиб уйига кетаверди. (Ойдин.)

-гина элементи таъкид-чегаралаш ифодаланмаган ҳолларда бир умумий хусусиятга эга бўлади, яъни нарса, белги кабиларга субъектив муносабат кўрсатади. Ана шу субъектив муносабат асосида -гина элементи қўшиладиган сўзнинг хусусияти ва бошқа факторлар таъсирида эркалаш, кучайтириш, сусайтириш каби маънолар реаллашувий мумкин.

<sup>1</sup> Проф. А. Фуломовнинг кўрсатишича, -гина элементининг чегаралаш маъноси кичрайтиш маъносининг тури (види) модификациясидир.

-гина элементи отларга қўшилиб субъектив баҳо формасини ясайди дейилган ишларнинг барчасида бу „форма“нинг кичрайтиш маъносини билдириши кўрсатилади. Лекин у отларга қўшилганда, ҳеч вақт кичрайтиш билдирмайди, балки субъектнинг турлича ҳис-туйғуси нуқтаи нázаридан муносабатини билдиради, шу ҳис-туйғуни кучайтириб, таъкидлаб кўрсатади: Чой ичмадинг-ку, **чойгинанинги** ичмадинг-ку, тентагим. (Саид Аҳмад.) Вой, шошманг **дийдоргинасига** бир тўйволай. (Саид Аҳмад.) У шуларни ўйлар экан, гўё эрига бир кор-хол бўлиб, азамат **ўғилгинасидан** ажралиб қоладигандай қўрқиб кетди. (Н. Фозилов.)

-гина элементи белги билдирувчи сўзларга қўшилганда ҳам субъектнинг шу белгига бўлган муносабатини таъкидлаб кўрсатади. Бунда белги кучли ёки кучсиз даражада бўлиши мумкин. Бу нарса турли факторлар: сўзнинг маъноси, интонация таъсирида реаллашади; Кечроққа борганде у икки марта таксининг ёнгинасидан ғувиллаб ўтиб кетди. (А. Мухтор.) Куни билан бир фойдали фикр кетида юриб, қорни очганини ҳам сезмаган Тўра, онасининг гапини эшиштгач, бўшашибгина супа четига ёнбошлиди. (Н. Фозилов.) Бир куни менинг ҳузуримга **маданийгина** кийинган бир кекса кириб келди. („Ўзб. маданияти“ газ.)

Демак, -гина элементи белги билдирувчи сўзларга қўшилганда, белгининг конкрет бир даражасини (кучли, ўрта ёки кучсиз даражасини) кўрсатмайди, балки, умуман, субъектнинг муносабатини кўрсатади. Белгининг даражаси бошқа факторлар таъсирида реаллашади. -гина элементининг кичрайтиш, эркалаш билдирмаслиги, шунингдек, белги даражасини кўрсатмаслиги, балки, умуман, субъектив муносабат ифодалаши қўйидаги бир мисолда яна ҳам аниқ кўринади: *Интернатда катта бўлган етимгина бола экан.* (Ў. Хошимов.)

Кўринадики, таъкид, чегаралаш ифодаламаган -гина элементи кичрайтиш билдирмайди, белгининг у ёки бу тарздаги аниқ даражасини ҳам кўрсатмайди, балки субъектив муносабат ифодалайди, холос. Бу ҳол -гина субъектив баҳо формасини ясайди дейишга асос бўла олмайди. Чунки умумий тарздаги субъектив муносабат ифодалаш сўз формасига эмас, балки кўпроқ юкламаларга хос хусусиятдир.

Юқорида айтилганлар ва көлтирилган фактлар күр-  
сатадики, биринчидан, ҳозирги ўзбек тилида *-гина*  
элементи ифодалайдиган айриш (чегаралаш), таъкид  
ва субъектив баҳо маънолари ўртасида маълум боғла-  
ниш бор. Бу нарса *-гина* элементи ҳозирги ўзбек ти-  
лида икки хил функциядаги (юклама ва форма ясовчи  
аффикс бўлган) тил ҳодисаси деб қарашга имкон бер-  
майди. Иккинчидан, *-гина* элементининг айриш (чега-  
ралаш) маъноси билан унинг бошқа маънолари ўртаси-  
да алоқа бўлмаган (узилган) тақдирда ҳам, ҳозирги  
аффикс дейишга асосимиз йўқ. Чунки кўриб ўтгани-  
миздек, *-гина* элементининг айриш (чегаралаш) маъ-  
носидан бошқа маъно, яъни субъектив муносабат ифода-  
лаши барча сўз туркумлари доирасида умумий ҳо-  
лат. Демак, субъектив муносабат ифодаловчи восита  
сифатида ҳам *-гина* юкламадан бошқа нарса бўла  
олмайди.

### СЎЗНИНГ МОРФОЛОГИК СТРУКТУРАСИ

Шу вақтга қадар ўзбек тили грамматикаси бўйича  
яратилган дарслик ва қўлланмаларда, илмий граммати-  
каларда, шунингдек, сўзнинг морфологик структураси  
ҳақида гап борган монография ёки мақола тарзидағи  
ишларда сўзнинг морфема структураси унинг (сўзнинг)  
морфологик структураси тарзида таърифланиб келмоқ-  
да. Масалан, *ишиларимиздан* сўзнинг морфологик  
структураси *иши + чи + лар + имиз + дан*, *ишляяпти*  
сўзнинг морфологик структураси *иши + ла + яп + ти*  
деб кўрсатилади. Лекин бундай қараш ҳақиқатга мос  
келмайди.

Сўзнинг структураси (сўз состави, сўз таркиби) ма-  
саласи ўзбек тилшунослигида шу вақтга қадар тўла ва  
тўгри ёритилмаган мураккаб ва мунозарали масалалар-  
дан бири бўлиб келмоқда. Бунга сабаб тилшунослик-  
даги айrim умумий назарий масалаларнинг етарли ҳаз  
этилмаганлигидир.

Ўзбек тилида сўз структураси жиҳатидан жуда сод-  
да ёки ниҳоятда мураккаб кўринишли бўлиши мумкин:  
*иши + чи, тер + им + чи + лар + имиз + нинг* каби. Сўз  
структураси ўзак, сўз ясовчи аффикс ва форма ясовчи

аффиксдан тузилиши мүмкін. Ҳатто бир сұзда бирдан ортиқ сұз ясовчи ва бирдан ортиқ форма ясовчи аффикслар иштирок этиши мүмкін:

ўзак                    сўз. яс.                    фор. яс. аф.  
афф.

*тер + им + чи + лар + имиз + га.*

Сўз структурасига, қандай компонентлардан ташкил топишидан қатын назар, морфологик структура деб қаралиб, шу асосда қисмларга ажратилади ва маҳсус номлар билан аталади. Бунда сўз таркибидаги ўзак ва аффикс деб аталувчи қисмларни тушунишдагина мутахассислар ўртасида бир хил қарашиб мавжуд, шу ўзак ва аффикслардан иборат структурани қисмларга ажратиш, номлаш ва таърифлашда эса ҳар хилликлар, қарама-қаршиликлар бор. Масалан, *пахтакорлар*, *терим-ииларни* сўзларида „*пахта-*“ ва „*тер-*“ барча томонидан ўзак деб, -кор, -им, -чи, -лар эса аффикс деб тан олинади. Лекин, масалан, *терим-ииларни* сўзини қисмларга ажратиш, номлаш ва таърифлашда бир хилликка келинмаган.

Сўз структураси бўйича зиддиятлар „негиз“ деб тан олинаётган „ҳодиса“ни тушуниш ва таърифлашдадир.

Кўпчилик ишларда „негиз“ сўзниң лексик маъно ифодаловчи қисми, сўздан форма ясовчилар олиб ташлангандан қолган қисми сифатида қаралади. Лекин шундай умумий нуқтаи назар бўлгани билан „негиз“ нинг тушунишидаги конкретликда яна ҳар хилликлар юзага келади. Масалан, баъзилар „негиз“ни лексик маъно ифодаловчи қисм сифатида таърифлаб, унинг туб ёки ясама бўлишини тан оладилар. Демак, бунда „негиз“нинг ўзакка тенг бўлиши мумкинлиги эътироф этилади. Айрим ишларда эса „сўзниң ўзак шаклларига сўз ясовчи аффикслар қўшилиши билан ҳосил бўлган янги форма негиз дейилади“. Демак, бунда негизниң ўзакка тенг келиши мумкинлиги инкор этилади. Озод Қосимхўжаева ҳам негизни худди шундай тушунади. Автор сўзда қанча ясама қисм борлигига қараб негизларни бирламчи негиз, иккиламчи... негиз деб атайди ва сўзда еттиламчи негиз бўлиши мумкинлигини айтади. Лекин сўзниң ўзак шаклига сўз ясовчи аффикс қўшилишидан ҳосил бўлувчи қисм не-

гиз дебтан олингани ҳолда, нима учундир, сўзниг форма ясовчи аффиксларга эга бўлган қисми ҳам негизлар қаторига киритилади. Масалан, *озиқлантирилмаганидан* сўзида олтида негиз борлиги кўрсатилади (*озиқла-*; *озиқлан-*; *озиқлантир-*; *озиқлантирил-*; *озиқлантирилма-*; *озиқлантирилмаган-*).

Буңдай қараганда, „негиз“ни сўзниг лексик маъно ифодаловчи қисми, сўздан форма ясовчи аффикслар олиб ташлагандан қолган қисм, деб тушуниш ва таърифлашда тўғри илмий-назарий асос (принцип) бордек кўринади, яъни бунда форма ясалишига асос бўладиган қисм негиз деб қаралади. Лекин қўйидаги икки фактнинг ўзиёқ юқоридаги принцип билан сўз таркибидан „негиз“ деган қисм ажратишнинг асосли бўла олмаслигини кўрсатади. Биринчидан, сўзниг форма ясовчи аффикслар қўшиладиган қисмининг ўзи ҳам таркибий қисмларга ажралиши мумкин. Масалан, *теримчилаrimизга* сўзининг *теримчи* қисми *тер+им+чи* каби таркибий қисмларга бўлинади. Демак, *терим* сўзида *тер* ўзак экан, ўз-ўзидан, *теримчи* сўзига нисбатан унинг *терим* қисми нима бўлади, деган савол туғилади ва бу саволга жавоб берилиши ҳам шарт. Иккичидан, *теримчилаrimизга* сўзининг форма ясовчиларни олган қисми ҳам таркибий қисмларга бўлинади: *теримчилаr+имиз+га*. Демак, сўз таркибий қисмларга бўлинар экан, бу қисмларнинг ҳам нима бўлиши, қандай ҳодиса экани ёритилиши керак бўлади. Таркиби нуқтаи назаридан сўз ўзак ва негизларга ажратиладиган ишларда бу саволларга жавоб топилмайди. Шундай экан, сўз структурасини юқоридаги типда қисмларга ажратиш ва таърифлаш тўла ва тўғри (асосли) бўла олмайди.

Ясама сўзниг морфема нуқтаи назаридан структураси ҳам анча мураккаб бўлиши мумкинлигини кўриб ўтдик (*тер+им+чи+лик*). Ана шу структурадаги қисмларни ажратиш кераклигига эътибор бериб, айрим авторлар, юқорида кўриб ўтганимиздек, негизни бирламчи, иккиламчи, учламчи...деб атайдилар. Лекин буни ҳам тўғри деб бўлмайди. Чунки „негиз“ деб тан олинаётган нарса форма ясалишига асос бўлувчи қисм экан, сўз структурасида „негиз“ бирдан ортиқ (бирламчи, иккиламчи...) бўла олмайди.

Негиз ҳодисасини яна бошқачароқ тушуниш ва таъ-

Рифлаш ҳолларини учратиш мумкин. Масалан, С. Усмонов сўз структурасида негизнинг уч тури бўлиши мумкинлигини айтади ва унинг таърифича „Ҳар бир морфологик қўшилиш учун асос бўлган қисм негиз дейилади... Сўз ясовчи аффикс оладиган негиз лексик негиз дейилади... Форма ясовчи аффикс оладиган негиз морфологик негиз дейилади... Форма ўзгартувчи аффикс оладиган негиз синтактик негиз дейилади... Бир турдаги аффикс бирдан ортиқ келса, негизлар ўз ичидаги биринчи лексик негиз, иккинчи лексик негиз каби; биринчи морфологик негиз, иккинчи морфологик негиз каби; биринчи синтактик негиз, иккинчи синтактик негиз каби белгиланади“<sup>1</sup>.

Кўриниб турибдики, „негиз“ни турларга ажратишда сўз структурасида у ёки бу қисмнинг аффикс турларидан қайси бирининг қўшилишига асос бўлиши на зарда тутилади. Шу жиҳатдан, негизни бу тарзда тушуниш тўғридек ва аниқ илмий назарий асосга эгадек кўринади. Ҳақиқатда эса аввалги бўлимларда кўриб ўтганимиздек, биринчидан, ўзбек тилидаги аффикслар ўз вазифаларига кўра уч турга эмас, балки икки турга (сўз ясовчи ва форма ясовчиларга) бўлинади. Шундай экан, С. Усмонов кўрсатган „синтактик негиз“, ўз-ўзидан, йўқ нарса. Иккинчидан, сўзнинг морфологик структураси таҳлилида „лексик негиз“, „синтактик негиз“ ҳақида гапиришнинг ҳам ўрни йўқ.

Ниҳоят, учинчидан, „ҳар бир морфологик қўшилиш учун асос бўладиган қисмни „негиз“ деб қараш ва „негиз“ деб аталаётган нарсани биринчи, иккинчи... каби қисмларга ажратиш асосли эмас.

Юқорида келтирилган фактлардан маълум бўладики, сўз структураси масаласи ўзбек тилшунослигида тўла ва тўғри ҳал этилмаган. Сўз структураси масаласида давом этиб келаётган барча чалкашликларнинг асоси шу вақтга қадар сўзнинг ўзак ва аффикслардан ташкил топган ҳар қандай структурасини морфологик структура деб қараш ва шу асосда уни таҳлил этиш эди.

Сўз ўзак ва аффиксал морфемалардан ташкил топган бўлиши мумкин. Бундай сўзларнинг структураси мор-

<sup>1</sup>М. Мирзаев, С. Усмонов, И. Расулов. Ўзбек тили, Тошкент, 1966, 86-87-бетлар.

фемика, сўз ясалиши ва форма ясалишининг (мёрфологиянинг) ўрганиш объекти бўла олади.

Морфемика сўз структурасида морфемаларнинг турини, ҳар бир турга хос хусусиятларини ўрганади. Масалан, *ишиларимиздан* сўзининг морфема структураси *иши + чи + лар + имиз + дан*. Морфемика ана шу структурадаги ҳар бир морфеманинг хусусияти ҳақида баҳс юритади.

Аффиксал морфеманинг сўз ясовчи ва форма ясовчи тури борлиги маълум. Демак, булар тилшуносликнинг икки соҳаси—сўз ясалиши ва морфологиянинг ўрганиш обьектидир (сўз ясалиши тилшуносликнинг алоҳида бўлими экани кейинги вақтда эътироф этилган).

Сўз ясалиши баҳсида ясама сўз ҳосил қилувчи компонентлар ўрганилади. Ясама сўз ҳосил қилувчи компонентлар шу сўзининг сўз ясалиш структурасини ташкил этади. Масалан, *унумдорликни* сўзининг *унумдорлик* қисмида учта сўз ясовчи аффикс бор (-ум, -дор, -лик). *Унумдорликни* сўзининг *унумдорлик* қисмига хос структура сўз ясалишига оид структурадир. Шу сабабли бу структура (қисм) сўз ясалиши баҳсида ўрганилади. Сўз ясалиши таҳлилида сўзининг шу қисмидан кейинга ўтилмайди (ундан кейинги ҳодиса форма ясалиши ҳодисасидир).

Сўз ясалиши таҳлилида фақат сўз ясалишига оид структура ўрганилганидек, морфологик таҳлилда ҳам сўзининг фақат форма ясалишига оид структураси ўрганилади. Масалан, *унумдорликни* сўзининг морфологик структураси *унумдорлик+ни*. *Унумдорлик* қисми структурасининг морфологияга дахли йўқ. Морфологик структура тушум келишиги формасининг ясалишига асос бўлаётган қисм (*унумдорлик*) билан тушум келишиги формасини ясовчи аффикс (-ни) дан иборат. *Планлаштиряпмиз* сўзининг морфологик структураси *планлаштир+яп+миз*.

Сўзининг морфологик структураси шу сўз формасини ҳосил қилувчи компонентлардан иборат бўлар экан, ўз-ўзидан, аналитик форма ҳосил қилувчи ёрдамчи сўзлар ҳам сўзининг морфологик структурасига киради. Масалан, *ёзила бошладик* феъли кўмакчи феъл (бошла) ва аффикслардан (-ил, -ди, -к) ташкил топган мураккаб форма кўринишига эга (бунда *ёзила* охиридаги а форма

ма ясаш вазифасини эмас, етакчи феъл билан күмакчи феълни боғлаш вазифасини бажаради): *ёз+ил+(a)+бошли+ди+к.*

Кўринадики, сўзниг морфологик структураси морфемалардангина иборат эмас. Форма ясалишида (сўзниг морфологик структурасида), морфемалардан ташқари, сўз ҳам қатнашуви мумкин. Бу ҳодиса ҳам сўзниг морфологик структураси сўзниг морфема структураси эмаслигини тасдиқлайди.

Хулоса қилиб айтганда, сўзниг морфологик структураси умуман сўзниг таркибий қисмларидан эмас, балки форма ясалишида қатнашувчи қисмларидан иборат.

Сўз туркумларининг қандай формаларга эгалигини, бу формаларга хос жусусиятларни аниқроқ тасаввур этиш учун уларни сўз туркумлари бўйича қараб чиқиш мақсадга мувофиқ.

---

## Иккинчи бўлим

### АСОСИЙ СЎЗ ТУРКУМЛАРИДА ФОРМА ЯСАЛИШИ

Сўз туркумлари синтетик, аналитик, жуфт ва такрорий формаларга эга. Бу формалар ичидаги эса категориал ва нокатекориал формалар бўлиши мумкин. Шунга кўра ҳар бир сўз туркумига хос формалар қуидаги тартибда берилади: 1) синтетик формалар, 2) аналитик формалар, 3) жуфт ва такрорий формалар. Ҳар бир форма ичидаги эса аввал категориал формалар, сўнгра нокатекориал формалар таҳлил этилди.

#### ОТ ФОРМАЛАРИ

От туркуми грамматик формаларга жуда бой. Бу туркумда категориал формалар ҳам, нокатекориал формалар ҳам анчагина миқдорни ташкил этади. Шунингдек, от туркуми синтетик формаларга ҳам, аналитик формаларга ҳам эга.

#### СИНТЕТИК ФОРМАЛАР

От туркумидаги сўз формаларининг асосий қисмини синтетик формалар ташкил этади. Аффиксация усули билан отнинг бир қатор категориал ва нокатекориал формалари ясалади.

#### Категориал формалар

От туркумидаги уч турли грамматик категория—сон, келишик ва эгалик категориялари бор. Ана шу категорияларга хос формалар категориал формалар ҳисобланади.

**Сон категориясининг** икки формаси—бирлик ва кўпллик формаси бор. Кўпллик формаси **-лар** аффикси ёрдамида ясалади. Бирликнинг эса маҳсус кўрсаткичи йўқ (ноль кўрсаткичли форма): **ўқувчи** (бирлик)—**ўқувчилар** (кўпллик).

Ўзбек тилига оид адабиётларда **келишикнинг олти тури**—бош, қаратқич, тушум, чиқиш, ўрин ва жўналиш келишиклари берилади. Булардан фақат бош келишик формаси маҳсус кўрсаткичга эга эмас (ноль кўрсаткичи). Қолган келишикларнинг ҳар бири маҳсус аффикслар ёрдамида ясалади: *гул* (бош келишик формаси); *гулнинг* (қаратқич келишиги формаси); *гулни* (тушум келишиги формаси); *гулдан* (чиқиш келишиги формаси); *гулда* (ўрин келишиги формаси); *гулга* (жўналиш келишиги формаси). Олти келишик формасининг маъно ва вазифалари ўзбек тили грамматикасига оид адабиётларда яхши баён этилгани учун бу ўринда улар ҳақида маҳсус тўхтаб ўтирумаймиз.

**Чегара формаси ва чегара келишиги ҳақида.** Ўзбек тилида отларнинг *мактабгача*, *қишигача* типида ясалувчи формаси борлигига шубҳа йўқ. Бу типдаги ясалиш лингвистик адабиётларда, ўзбек тили дарслик ва қўлланмаларида равиш ясалиши деб таърифланар, лекин ҳеч бир ишда форма ясалиши сифатида қаралмас эди. Бироқ кейинги вақтда айрим ишларда *-гача* аффиксини олган сўз отларнинг алоҳида бир формаси сифатида ажратила бошлади. Масалан, Ҳамид Неъматов ўзбек тилида отларнинг *-гача* аффикси ёрдамида ясалувчи (*Самарқандгача* каби) маҳсус формаси борлигини ва бу форма алоҳида бир келишик—чегара келишиги формаси деб қаралиши кераклигини таъкидлайди<sup>1</sup>. Шавкат Раҳматуллаев эса *даҳлизгача*, *алламаҳалгача* каби форма алоҳида бир келишик формаси эмас ва буларда *-гача* бир аффикс эмас, балки *-га* мустақил аффикс, *-ча* эса чегара маъносини билдирувчи юклама деб қарайди<sup>2</sup>.

Демак, *Самарқандгача*, *колхозгача*, *уйгача* типидаги форманинг келишик формаси бўла олиши ёки бундай форма эмаслиги ҳақида гапиришдан олдин, аввало, қандай форма бўлишидан қатъи назар, у отнинг алоҳида бир (маҳсус) формаси бўла олиш ёки бўла`олмаслигига тўхталиш, шу нарсани белгилаб олиш керак.

<sup>1</sup>Х. Неъматов. Чегара келишиги. „Ўзбек тили ва адабиёти“ журнали, №4, 1971, 33-39-бетлар.

<sup>2</sup>Ш. Раҳматуллаев. От лексемага қўшиладиган баъзи форма ясовчилар, „Ўзбек тили ва адабиёти“ журнали, №2, 1975, 39-40-бетлар.

Бунинг учун эса, биринчи навбатда, *Самарқандгача, мактабгача, уйгача* каби сўзлардаги -гача нинг яхлитлигича бир аффикс ёки ундаги -га ва -ча ўзича мустақил эканини белгилаб олиш лозим бўлади.

Ҳамид Нематовнинг ишида, гарчи ҳеч қандай исбот келтирилмаса-да, -гача бир аффикс деб тан олинади. Шавкат Раҳматуллаев эса *мактабгача, даҳлизгача* каби сўзлардаги -га ва -ча ҳар жиҳатдан ўз мустақиллигини сақлаганлигининг, бунда яхлит бир -гача аффикси йўқлигининг исботи учун бир қатор (беш пунктдан иборат) далиллар келтиради.

Шавкат Раҳматуллаев *уйгача, мактабгача* каби сўзларда бир бутун -гача аффикси йўқлиги, буларда -га ва -ча мустақил тил бирликлари экани ҳақида гапирганда аввало, буларда -га ва -ча ўз маънолари билан қатнашишини, жумладан чегара маъносига бевосита -ча элементига хослигини далил қилиб кўрсатади. Ҳақиқатда ҳам бундай сўзларда ифодаланадиган чегара маъносини -ча сиз тасаввур этиб бўлмайди: *Нақ төғлар төпасидаги қорларгача чўзилиб кетувчи ноёб Сан-Тош ўрмонзори мана шу ердан бошланарди.* (Ч. Айтматов.) *Отнинг баданлари дигиллар, бўйинни чўзиб томогининг тагларигача сувга тутиб берарди.* (Сайд Аҳмад.) *Бу қўнғироқ Иссиккўл бешикларида ҳозиргача ҳам янграб турибди.* (Ч. Айтматов.)

Ҳатто, сўз таркибида жўналиш келишиги кўрсаткичи (-га) бўлмаган ҳолларда ҳам -ча ёрдамида „чегара“ маъносига ифодаланадиган ҳолатлар бор: *Очил бува ҳозирча воқеаларни батағсил гапирмай, кўрганлардан дуойи салом топширди.* (А. Мухтор.) *Тоққа қараб ўрлаб кетган асфальт йўлнинг икки ёни кўз илғагунча ҳайдалган ерлар, ариқлар, зовурлар...* (О. Ёкубов.) *Онам билан келин аям айвонни сал йиғиштириб, жой ҳозирлагунларича биз ҳовлида бирпас гаплашиб турдик.* (П. Қодиров.) *Ўша, Ботирни кузатиб қайтган кечаси ечиб қўйганича таққани йўқ.* (Р. Файзий.)

Шу факторлар, яъни чегара маъносининг бевосита -ча га хослиги ва унинг ўрнида шу маънони ифодалай оладиган қадар кўмакчисини қўллаш мумкинлиги (сўз таркибида -ча нинг ажралиши мумкинлиги) *уйгача, тиззасигача, ҳозиргача* каби сўзларда -ча ни ўзига мустақилдек кўрсатади. Лекин бундай сўзларда -ча

нинг ўзига мустақиллигини ёки -гача бир бутун ҳолда бир аффикс эканини белгилашда, бизнингча, қуидагиларни ҳисобга олиш керак бўлади.

Аввало, *уйгача*, *ёзгача* кабиларда -ча ўзига мустақил тил бирлиги деб қараладиган бўлса, у ҳолда -ча нинг вазифаси, *уйгача*, *ёзгача* формаси *уйга* ва *ёзга* формасидан фарқланадиган алоҳида бир формами ёки йўқми экани белгиланиши керак бўлади. Агар алоҳида форма бўлса, қандай форма экани, алоҳида форма бўлмаса, -ча нинг қандай вазифани бажариши аниқлашини керак. Демак, -ча ўзича мустақил деб қаралганда, у форма ясовчими ёки бошқа вазифани бажарувчими экани ҳақида гапириш керак бўлади. Бу масала бўйича фақат Шавкат Раҳматуллаевгина аниқ ўз қарашини билдирган. Олимнинг фикрича, бундай сўзлардаги -ча чегара маъносини ифодаловчи юклама. Демак, -ча ҳеч қандай форма ясовчи эмас ва *уйгача*, *ёзгача* типидаги сўзлар *уйга*, *ёзга* типидаги формадан фарқли маҳсус форма эмас деб қаралади. Чунки юклама, гарчи у аффикс кўринишида бўлса-да, сўз формасини ҳосил қилмайди.

Лекин кўриб ўтилган типидаги сўзларда -ча бутун хусусиятлари билан юкламадан фарқланади. Биринчидан, юкламаларнинг қўлланиши, одатда, маълум бир сўз туркуми доираси билан чегараланмайди. -ча эса от ёки от типидаги сўзларга қўшилади. Иккинчидан, -ча нинг бирор юкламага эмас, балки қадар (*довур*) кўмакчисига синонимлиги ҳам (*уйгача* — *уйга қадар*) уни юкламалар қаторига киритиб бўлмаслигини кўрсатади. Учинчидан, юкламалар сўзнинг маълум бир грамматик маъно ифодаловчи формасини ҳосил қилмайди. Шунга кўра ўлар синтактик муносабат ҳам кўрсатмайди. *Уйгача*, *кечгача* кабилардаги -ча эса, маҳсус грамматик маъно (чегара маъносини) ифодалаш билан бирга, сўзнинг синтактик муносабатига ҳам таъсири қиласиди. Унинг кўмакчи билан синонимлиги ёқ буни аниқ кўрсатади (кўмакчиларнинг от ёки отлашган сўзнинг бошқа сўз билан синтактик муносабатини кўрсатиши маълум: қалам билан *ёзмоқ*, *дўсти учун олмоқ* каби). Бир мисол: *Қулоқларигача* пўстинга ўранган, *Халқ комиссарлиги* эшиги олдидағи қоровул қаршисида турған иккى хотинни таниб сўрашди. (*Ойдин.*) Бу тапда қулоқ сўзининг ўранмоқ феълига боғланиши бевосита -ча нинг ёрдамида бўляпти. -ча қўлланмаса,

жўналиш келишиги формасининг ўзи бу феълга боғланмайди (*қулогига ўранмоқ* дейилмайди).

Ана шу белгиларнинг ўзиёқ-ча нинг юклама эмаслигини, у ҳар жиҳатдан форма ясовчи аффиксга хос хусусиятга эга эканини кўрсатади. Энди масаланинг қийин томони *уйгача, кузгача* каби сўзларда -ча мустақил аффикс ёки мустақил аффикс эмаслигини белгилашдир.

Кўриб ўтилган типдаги (*уйгача, кузгача*) сўзларда чегара маъносининг бевосита -ча га хослиги ва уни чегара маъносини ифодалай оладиган қадар кўмакчиси билан алмаштириш мумкинлиги (*уйгача – уйга қадар*) буларда -ча билан -га мустақиллигини сақлагандек, ҳар бири ўз мустақил маъно ва вазифасига эгадек қилиб кўрсатади. Айниқса, -гача қўшилган от мақон ва вақт билдирувчи сўзлардан бўлганида ана шундай туюлади: *У станциядан Олтинсойгача бўлган узоқ йўлда бир сўз ҳам айтмай жисм ва маъюс келди.* (Ш. Рашидов.) *Бу атрофларга автобус келмас экан, марказгача пиёда кетишга тўғри келди.* (Х. Тўхтабоев.) *Хайда, – деди чол, – тонггача қишлоққа борайлик.* (Л. М.)

Лекин қуйидаги икки асосий ҳодиса юқоридаги типдаги сўзларда -га ва -ча мустақил аффикслар эмаслигини, -гача бир бутун ҳолда бир аффикс эканини кўрсатади.

Биринчидан, *уйгача, кузгача* кабиларда -ча аффикси ўзига мустақил бўлса, ўз-ўзидан -га аффикси ҳам ўз маъно ва вазифасида (жўналиш келишиги формасига хос маъно ва вазифада) қўлланган бўлади. Ваҳоланки, бу типдаги формада жўналиш келишиги формасига хос хусусият маълум даражада сезилиб турса-да, унда жўналиш келишиги формасига хос асосий маъно ва вазифа бўлмайди, яъни бу формадаги сўз йўналиш маъносини билдиримайди ва гапда жўналиш келишиги формасига хос вазифада ҳам келмайди: *Буларнинг ҳар мўйидан тер оқиб томаётганини томдаги қиз-жувонларгача куради.* (Ойдин.) *Беҳи уруғидан тортиб ялпиз уруғигача қайнатиб ичиришиб кампирлар ўша куни.* (Р. Азизхўжаев.) *Софлигимизни сўрайди, бола-чақаларимизгача суриштиради.* (Х. Гулом.)

Иккинчидан, -гача ёрдамида ясалувчи форма жўналиш келишиги формасидан фарқланувчи, ўзига мустақил форма бўлганидан у боғланиб келадиган феъллар ҳам кўп ҳолларда, жўналиш келишиги формаси боғланадиган феъллардан фарқланади: *Ўзимизнинг таомлар-*

ни — кабоб ва паловдан тортуб то ҳалимгача дүндириб юборади. (Ойбек.) Фарғона иқлими-ю, бу ер берадиган нозу-неъматлари, бу ернинг қушларигача у китобда яхши таърифланган. (Мирмуҳсин.) Бу вақт Азиз онаси ва дўстлари билан Мирзачўлдаги „Самарқанд“ совхозига кўчиб келган, пахтачиликда экишдан *теришгача* ҳамма ишни мукаммал машиналаштирган... (Х. Гулом.) Ҳатто дурбиндан уй олдидағи дераза остида ўтириб олиб, қўлда қалава йигираётган *кампиргача* кузатса бўларди. (Ч. Айтматов.) Бу мисоллардаги -гача аффиксли отлар дўндиримоқ, таърифланмоқ, машиналаштиримоқ, кузатмоқ феъллари билан боғланиб келган. Жўналиш келишиги формасида эса боғлана олмайди: ҳалимга дўндиримоқ, қушларга таърифланмоқ, *теришга* машиналаштиримоқ, кампирга кузатмоқ дейилмайди.

-гача аффиксли от феълдан бошқа сўзга ҳам боғланиши мумкин. Лекин бундай сўзлар билан ҳам жўналиш келишиги формаси боғлана олмайди: *Йўл қишлоғимизгача* шундай кенг ва текис. Бизнинг салтанатимиз остидаги ерларда нимаики қимирланган, учган тирик жонзот бўлса, пашшадан тортуб туягача — ҳаммаси бизники. (Ч. Айтматов.)

Кўриб ўтилган ана шу икки фактнинг ўзиёқ уйгача, кузгача, ўқувчиларгача каби формада -ча ва -га мустақил аффикслар эмаслигини, улар бир бутун аффикс эканини кўрсатади.

Чегара маъносини ифодалашда -ча аффикси отнинг жўналиш келишиги формасида қўлланишини талаб этади. Демак, бунда жўналиш келишиги формаси -ча аффикси орқали чегара маъносининг ифодаланишида восита ролини ўйнайди. Натижада, чегара маъносининг реаллашувида доим иштирок этадиган -га ва -ча аффикслари бир бутунлик касб этади, бир бутун ҳолда чегара маъносини ифодаловчи формантга айланади. Шундай бўлиши ҳам табиий. Чунки, масалан, *уйга қадар*, *кузга қадар* кабиларда ҳам жўналиш келишиги билан қадар кўмакчиси бирликда бир формани—чегара маъносини ифодаловчи аналитик формани ҳосил қиласди. Агар, айтайлик, тил тараққиёти процессида қадар кўмакчиси аффиксга айланадиган бўлса, шунда ҳам у ўзига ҳос алоҳида бир формани ясовчи мустақил аффикс бўлмайди, балки у -га аффикси билан бир бутун-

ликни ҳосил қиласи ва иккаласи бирликда чегара маъносини ифодаловчи формани ясайди (шундай формани ясовчи аффиксга айланади).

Навбатдаги масала *-гача* аффикси ёрдамида ясалувчи форма алоҳида бир келишик формасими ёки йўқми деган масаладир.

*-гача* аффикси отнинг ўзига хос грамматик маъно (чегара маъноси) ифодаловчи маҳсус формасини ҳосил қилишини кўрдик. Энди гап шу форманинг категориал форма ёки нокатегориал форма эканини белгилашда. Чунки ҳар қандай сўз формаси, юқорида кўриб ўтганимиздек, ё маълум грамматик категорияга хос бўлади, ёки грамматик категория ҳосил қилмайдиган нокатегориал форма бўлади.

*-гача* аффиксли сўзнинг маъно ва вазифасига эътибор берилса, бу форманинг ҳар жиҳатдан келишик формалирига хос хусусиятга эгалигини кўриш мумкин. Масалан, отнинг феъл ёки бошқа туркумга оид сўзга тобе алоқасини (боғланишини) кўрсатиш ва муносабат ифодалаш барча келишик формаларирига (умуман келишик категориясига) хос хусусият<sup>1</sup>. *-гача* аффикси ёрдамида ясалган форма ҳам отнинг феълга ёки бошқа туркумга оид сўзга тобе алоқасини кўрсатади ва ҳаракат, белги-хусусият кабиларнинг чегарасини билдиради. Бу чегара макон ва вақтдаги чегарагина эмас, балки бошқа нарса-ҳодисаларнинг ўзаро боғланишидаги чегара бўлиши ҳам мумкин: *Оқ кўйлагининг енгларини билагигача шўмарган Аҳмаджон кабинага эгилиброқ кирди-да, рулга ўтириб, машинани ҳайдаб кетди.* (Х. Гулом.) *Наҳотки пунктда шу вақтгача иш бўлса?* (Х. Гулом.) *Шофер... Мехри опанинг тугунини кўтариб, квартира эшигигача келди ва у берган пулнинг ортиқасини тийинигача қайтариб, иссиққина хайрлашиб чиқиб кетди.* (Х. Гулом.) ...мартабали меҳмонларни қарши олиб отдан тушириш, чой узатиш-у, ўтин ёриб, сув *келтиришгача* ҳамма ишни унга топшираверишарди. (Ч. Айтматов.)

Хуроса қилиб айтганда, биринчидан, ҳозирги ўзбек тилидаги *уйгача*, *ҳозиргача*, *болаларгача* каби фор-

<sup>1</sup>Қаранг: Грамматика современного русского литературного языка, изд-во „Наука“, М., 1970. стр. 326; М. Мирзаев, С. Усмонов, И. Расолов. Ўзбек тили, „Ўқитувчи“ нашриёти, Тошкент, 1966, 99- бет.

мадаги *-гача* яхлитлигича бир аффикс—чегара маъносини ифодаловчи форма ясовчи аффикс, шу форманинг ўзи эса чегара формаси ҳисобланади.

Иккинчидан, *-гача* аффикси ёрдамида ясалувчи форма категориал форма ҳисобланади ва, ўз хусусиятига кўра, келишик формалари қаторига киради (чегара келишиги формаси бўлади).

**Эгалик категорияси** уч шахс, ҳар бир шахснинг бирлик ва кўплек формасига эга: *дўстим* (I шахс, бирлик)—*дўстинг* (II шахс, бирлик)—*дўсти* (III шахс, бирлик); *дўстимиз* (I шахс, кўплек)—*дўстингиз* (II шахс, кўплек)—*дўстлари* (III шахс, кўплек).

Отлар нутқда, маҳсус форма кўрсаткичига эга бўлиш-бўлмаслигидан қатъи назар, албаттa, сон формасида (бирлик ёки кўплек формасида), шунингдек, бирор қелишик формасида бўлади. Лекин эгалик формасида бўлиши шарт эмас. Маҳсус эгалик кўрсаткичи бўлган тақдирдагина отнинг эгалик формаси ҳақида гапириш мумкин. Масалан, *ўрик гуллади* гапидаги *ўрик* сўзи (от) сон нуқтаи назаридан бирлик формада, қелишик нуқтаи назаридан бош қелишик формасида. Лекин у эгалик формасига эга эмас. *Ўригимиз гуллади* гапида эса *ўрик* сўзи сон, қелишик ва эгалик формасига эга (бирлик, бош қелишик ва I шахс кўплек формасида).

### Нокатегориал формалар

Ўзбек тилига оид адабиётларда от туркумiga хос формалардан фақат категориал формалар ҳақидағина маълумот берилади. Отларнинг нокатегориал формалари деярли эътибордан четда қолиб келмоқда. Кичрайтиш билдирувчи *-ча* (*уйча*, *қушча*), қарашлилик билдирувчи *-ники* (*мактабники*, *колхозники*) ва бошқа бир қатор аффикслар ё сўз ясовчилар қаторида берилади, ёки улар ҳақида умуман ҳеч нарса дейилмайди. Лекин бундай аффикслар сўз ясовчи бўла олмаслиги ва отлар категориал бўлмаган формаларга ҳам эга экани профессор Шавкат Раҳматуллаев томонидан тўғри кўрсатилган<sup>1</sup>.

<sup>1</sup> Ш. Раҳматуллаев. От лексемага қўшиладиган баъзи форма ясовчилар. „Ўзбек тили ва адабиёти“ журнали, №2, 1975, 36-41-бетлар.

Бу типдаги формалар отнинг лексик маъносига маълум бир қўшимча маъно ифодалаш, отсўзни отларга хос бўлмаган бирор синтактик вазифага мослаш учун хизмат қилади.

Улар ўз маъно ва вазифаларига кўра бир неча тургага бўлинади: 1) *кичрайтиш формаси*; 2) *эркалаш формаси*; 3) *ҳурмат формаси*; 4) *қарашилилк формаси*; 5) *ўрин белгиси формаси*; 6) *ўхшатиш формаси*.

**Кичрайтиш формаси.** Отларнинг кичрайтиш формаси маҳсус аффикслар ёрдамида ясалади. Бу аффиксларнинг қўшилиши билан отнинг лексик маъноси ўзгармайди, балки шу лексик маънога қўшимча тарзда кичрайтиш маъноси ифодаланади.

-ча. Бу аффикс ёрдамида ясалувчи форма асосан кичрайтиш маъносини ифодалайди: *саватча, столча, қушча, тойча, сингилча, таёқча* каби: *Бу ерда сариқ оғат нималигини ҳозирча фақат шу йигитчагина унча-мунча масавур этарди.* (А. Мухтор.)

-ча аффиксли форма шахс билдирувчи сўзларга қўшилганида эркалаш билан бирга ҳурматлаш ёки камситиш маъноси ифодаланиши мумкин. Лекин бу маънолар маълум факторлар таъсирида кичрайтиш маъноси асосидан келиб чиқадиган маънолар бўлади: *Раҳбарликни хотинчалари Бибиойша уйдан туриб қила беради.* („Муштум“.) Кизиқ эртак экан *отинча, энди* сира зерикмайдиган бўлдим. (Ойбек.) Қарид қуюлмаган чол... Качонки *коринчалари* очиқса, шундагина эсларига тушаман. (С. Равшанов.) Оппок *каналакчалар* еру кўкни тўлдириб тўзиб кетган, кумуш *қанотчаларини* оҳиста силкитиб чарх уришади. (Э. Усмонов.)

Эслатма. 1. -ча аффиксли кичрайтиш формаси янги лексик маъно касб этиши, янги сўзга айланиши мумкин. Бунда кичрайтиш маъноси йўқолади: *шолча, кўрпача, боғча* (детсад) каби.

2. -ча омоним-аффикс ва кўп маъноли аффикс. Бу ўринда фақат кичрайтиш ифодаловчи -ча аффикси ҳақида гапирилди.

**-чоқ (-чак).** Бу аффикс *той, келин, қўзи* каби икки-уч сўздангина кичрайтиш маъносини ифодаловчи форма ясади: *Тойчоқ, қўзичоқ, келинчак, тугунчак* каби: *Бир кўн кўрмаганига саман йўрга уйда қолган тойчогини* эслаб кишинаяпти. (М. Муҳамедов.)

*Ўйинчи ёш қиз каби тароватли, келинчак каби  
жўркам, ёр каби дилдор эди. (М. Исмоилий.)*

### **Эркалаш формаси**

**-жон.** Шахс билдирувчи турдош отлар ёки шахсларнинг номини билдирувчи отларга қўшилиб эркалаш, сўзиш, ижобий муносабат ифодаловчи форма ясади: *укажон, ойижон, Рашиджон* каби.

*Ойижоним туфлигимни  
Доим мойлаб қўярди.  
Бувижоним папкам артиб,  
Эркаларди, суюрди.  
Акажоним дўппим қоқиб,  
Силар эди бошимни,  
Опажоним дастурхонга  
Келтиради ошимни.*

(A. Кўчимов.)

**-хон, -ой.** Булар ҳам киши исмини билдирувчи отларга қўшилиб эркалаш, ҳурматлаш маъносини билдиради: *Азизахон, Ҳалимахон, Ҳабибаҳон* каби.

**-жон** аффикси эркаклар исмини, **-хон, -ой** эса хотин-қизлар исмини билдирувчи сўзларга қўшилади.

Эслатма. **-жон, -хон, -ой** киши исмининг таркибий қисмига кириши, унинг ажралмас компоненти бўлиши мумкин. Бунда эркалаш, ҳурматлаш маъноси ифодаланмайди: *Дадажон Мамажонов, Роҳатой, Онахон, Ўғилой, Нурхон* каби.

**-(а) лоқ** аффикси *қиз, бўта* каби бир-икки сўз таркибида эркалаш маъносида қўлланади: *Қизалоқ қўғирчоқни машинага ўтқазди.* (Э. Усмонов.)

### **Ҳурмат формаси**

Бу форма **-лар** аффикси ёрдамида ясалади: *акамлар, тоғамлар* каби; *Оға соғ борсангиз, аввал, Дадамларга салом айтинг.* (*Ҳамза*.)

Ҳозирги ўзбек тилида **-лар** кўплик ифодаловчи аффикс сифатида сон категориясининг бирлик формасига қарама-қарши бўлган кўплик формасини (категориал формани) ясади. Ҳурмат ифодаловчи аффикс сифатида эса функционал формани ҳосил қиласди.

Ўзига мустақил форма сифатида **-лар** аффикси ёр-

дамида ясалувчи ҳурмат формаси кўплик формасидан фарқли хусусиятларга эга. Булар қўйидагилар:

1. Юқорида кўриб ўтдики, от туркумига оид сўз нутқда ҳамма вақт сон ва келишик формасида бўлади. Масалан, *студентларни кутиб олдик* гапида *студент* сўзи кўплик ва тушум келишиги формасида. Лекин у эгалик формасига эга эмас. Демак, эгалик формасига эга бўлмаган от кўплик формасига эга бўлаверади. Ҳурмат формасидаги от эса ҳамма вақт эгалик формасида ҳам бўлади, яъни эгалик формасиз ҳурмат формасини тасаввур этиш мумкин эмас. Қиёсланг: *у́лар* – уйнинг кўплиги (бунда ҳурмат ифодаланмайди), *у́лари* – кўплик ёки ҳурмат: 1) *қурувчиларнинг у́лари* (кўплик); 2) *тогамнинг у́лари* (ҳурмат). Бунинг сабаби, яъни ҳурмат формасидаги отнинг ҳамма вақт эгалик формасида ҳам бўлиши, ҳурмат маъносининг кўплик маъносидан эмас, шахс маъносидан ажралиб чиққанлигидадир.

Худди шу сабабга кўра ҳурмат билдирувчи *-лар* сўзга эгалик аффиксидан сўнг, кўплик кўрсаткичи *-лар* эса ундан олдин қўшилади: *акамлар* (ҳурмат) – *акаларим* (кўплик); *жавобларинг* (кўплик) – *жавобинглар* (ҳурмат); *Сайлов пунктинглар қаерда?* (С. Зуннунова.) Фақат ІІІ шахсда эгалик аффикси ҳурмат билдирувчи *-лар* аффиксидан сўнг қўшилиши мумкин: *Бу итни мен биламан – Қосим бойваччанинг итлари, ...* (А. Қаҳҳор.) *Тогамнинг байроқларини* қачон қайтиб берасиз? (А. Қаҳҳор.)

Эга-кесим муносабатидаги бирикувда ҳурмат ифодаловчи *-лар* кесимга қўшилади: *Меҳмон дам оляптилар*. *Дадам сўраяптилар* каби: *Куёв бола ўқларми* дейман, *тақ-туқлари эшишимайди*. (Р. Файзий.) Аҳмаджон Одиловга бораман, дейсиз, у киши сизни *танийдиларми?* (О. Ёқубов.)

### Қарашлилик формаси.

Қарашлилик формаси *-ники* аффикси билан ясалади ва бирор нарса (предмет) нинг *-ники* аффикси қўшилган сўз билдирган шахс ёки нарсага қарашлилигини билдиради: *китоб Аҳмадники*. *Бу боғлар колхозники* каби.

*-ники* аффикси аслида қаратқич келишиги кўрсаткичи *-нинг* ва *-ки* аффиксларининг бирикувидан ҳосил бўлган: *нинг+ки>ники*. Лекин ҳозирги ўзбек тилида

қўшма аффикслик хусусияти йўқолиб, содда аффикс ҳолига келган.

Қарашлилик формаси эгалик формасидан маъно жиҳатдан бутунлай фарқ қиласди. Биринчидан, эгалик формаси уч шахсдан бирини (I, II ёки III шахсни) кўрсатади ва шахснинг сонини ҳам кўрсатади. Қарашлилик формаси бундай хусусиятга эга эмас. Қиёсланг: *укам* (биринчи шахс, бирлик) – бўёқники (шахс ва шахснинг сони тушунчалари йўқ). Иккинчидан, эгалик формаси шу формадаги сўз билдирган нарсанинг бирор шахс ёки нарсага қарашлилигини билдиради. Қарашлилик формаси эса бошқа бирор нарсанинг *ники* аффиксли сўз билдирган шахс ёки предметга тегишлилигини билдиради. Қиёсланг: *Аҳмаднинг китоби* – *китоб Аҳмадники*.

Эгалик формаси билан қарашлилик формаси маъно ва вазифасига кўра бир-биридан тамомила фарқли формалар бўлганидан айнан бир сўз эгалик ва қарашлилик формасида қўлланиши мумкин бўлади. Бунда эгалик формаси ҳам ўз вазифасида, қарашлилик формаси ҳам ўз вазифасида бўлади: *укамники*, *дўстингники*, *курсошларимизники* каби.

Қарашлилик формасидаги сўз қарашли бўлган нарсани билдирувчи сўз билан қўлланса, ҳамма ваqt кесим вазифасида бўлади: *Китоб Эркинники*. *Бу боғ қўшинимизники* каби. Қарашли бўлган нарсани билдирувчи сўз нутқда қўлланмаслиги мумкин. Лекин у умумий ҳолатдан сезилиб туради. Шунинг учун қарашлилик формаси кесим вазифасида келганда, қарашли предметни билдирувчи сўзни тиклаш мумкин бўлади: *колхозники* (*бу машиналар колхозники*), *дўстимники* (*бу китоб дўстимники*).

Агар қарашлилик формасидаги сўз кесим вазифасида бўлмаса, қарашли (тегишли) бўлган нарсани билдирувчи сўзни қўллаб бўлмайди. Қарашли бўлган нарса нутқ ситуациясида маълум бўлиб тураверади. Масалан, *Тоғники кеч пишади* деганда, ниманинг кеч пишиши нутқ ситуациясида маълум бўлиб туради. Лекин шу гапдаги сўзларнинг формасини ўзгартмаган ҳолда, кеч пишадиган нарсани билдирувчи сўзни қўллаб бўлмайди. Агар бу сўз қўлланса, қарашлилик формаси ўрнида қаратқич-қаралмиш бирикмаси қўлланади: *Тоғники кеч пишади* – *Тоғнинг олмаси кеч пишади* (ёки *тоғнинг мевалари кеч пишади*).

Қарашлилик формасидаги сўз бош келишикдан бошқа келишик формаларида ҳам қўлланана олади. Бундай ҳолларда ҳам қарашли бўлган нарсани билдирувчи сўз қўлланмайди. Агар бу сўз қўлланса, қарашлилик формаси қаратқич-қаралмиш типидаги бирикма билан алмашади: *Ёлқин акамнинг ўртоқларини меҳмонхонага элтиб қўйдик-да, келин аямнинг амакисиникига кетдик.* (П. Қодиров.) Гапнинг умумий мазмунидан сезилиб турибдики, амакисининг уйига кетишган. Лекин бунда уй сўзини қўллаб бўлмайди. Уй сўзи қўлланса, қарашлилик формасини қўллаб бўлмайди (қаратқич ва қаралмиш формаси қўлланади): *амакисиникига кетдик—амакисининг уйига кетдик.* Яна қиёсланг: Укангницида ёза қол — укангнинг ручкасида ёза қол, укангницини кўрсат — укангнинг расмини кўрсат, акамницидан келди — акамнинг уйидан келди. Куйидаги мисолларда қаратқич-қаралмиш бирикуви билан қарашлилик формасининг қўлланишига эътибор беринг: *Буларнинг бирининг исми Олия, иккинчисиники—Зумрад.* (О. Мухторов.) *У вақтнинг одами бошқа, бу вақтники бошқа.* (Ойдин.) *Раиснинг боласига кўзини шахло қилиб, колхозчиникига бир кўзини юмиб қараганни яқин йўлатишмайди.* (Э. Усмонов.) *Эрининг ўлими Назокатни бир силкиб қалқитган бўлса, қизиники ерпарчин қилди.* (Шуҳрат.)

Кўринадики, қарашли (тегишли) нарса жуда аниқ (маълум) бўлса, уни нутқда ифодалаш шарт бўлмаса, қарашлилик формаси (-ники аффиксли форма) қўлланаверади. Қарашли нарса нутқда ифодаланадиган бўлса, қарашлилик формаси фақат кесим позициясидагина қўлланана олади (*китоб-дўстимники*), лекин гапнинг бошқа бўлаклари вазифасида қўлланана олмайди. Бундай ҳолларда қаратқич-қаралмиш типидаги бирикма қўлланади. Куйидаги мисолларда ҳам қарашли бўлган нарса аниқ бўлганидан, у ифодаланмай, қарашлилик формасининг ўзи қўлланаверади: ... юмушни *домланикагидек ёлғиз ўзи эмас, етим қиз Адолат билан бирга қиласди.* (Ё. Шукурев.) *Мўмин қўшичиники қишлоқнинг чеккасида эди.* (Л. Маҳмудов.) *Ўзимизнилардан биттаси йўлда учраганди.* (Ё. Шукурев.) *Шу нокни экканда ярми қўчаники, деб ният қилганман.* (Л. Маҳмудов.)

Қарашлилик формаси ясовчи -ники аффикси от

ўрнида қўлланадиган олмошлар ва отлашган сўзларга ҳам қўшилади: *сеники*, *уники*, *кимники*, *ўзиники*. **Бирники** мингга, *мингники туманга*. (*Мақол.*) **От кимники — минганики, Тўн кимники — кийганники.** (*Мақол.*)

Қарашлилик формаси ясовчи *-ники* аффикси сўзга кўплик, эғалик, шунингдек, ҳурмат формаси аффиксидан кейин, келишик қўрсаткичидан олдин қўшилади: *студентларникини*, *дўстларимизницидан*, *акамларникида* каби.

**Ўрин белгиси формаси.** Ўрин белгиси формаси *-даги* аффикси ёрдамида ясалади ва нарса-ҳодисанинг ўринга кўра белгисини билдиради: *шаҳардаги дўстларимиз*, *осмондаги булутлар*, *қирдаги лолалар* каби. Агар *-даги* аффикси қўшиладиган сўз пайт маъносига эга бўлса, бу форма нарсанинг пайтга нисбатан ўрнини билдиради: *ёздаги, қишдаги* каби.

*-даги* аффикси ўрин келишиги қўрсаткичи *-да* ва сифат ясовчи *-ги* аффиксларининг бирикишидан ҳосил бўлган қўшма аффиксdir. Бу аффиксда ўрин келишиги формаси (*-да* аффикси) ва сифат ясовчи *-ги* аффиксига хос хусусият маълум даражада сақланади. Мисол: *Бу шамол майсалардаги шабнамни ҳам, шабнамдаги изларни ҳам бирпасда ялаб кетди.* (*A. Мухтор.*) *Майсалардаги* ва *шабнамдаги* формасида, биринчидан, ўрин маъноси, иккинчидан, шу ўринга муносабат (*ўринга оидлик*) маъноси бор. Булардан биринчиси *-да* аффиксига хос, иккинчиси эса *-ги* аффиксига хос. Шунга кўра *-да* ва *-ги* аффикслари мустақил аффиксдек кўринади. Ҳақиқатда эса бундай эмас. Чунки *майсадаги, ёздаги* каби формада *-да* ва *-ги* аффиксларининг ўзига хос хусусияти жуда кучсизланган. Масалан, *-да* аффиксли от (*ўрин келишиги формаси*) ҳаракатнинг бажарилиш ўрнини билдиради ва бу от феълга боғланниб гапда ҳол вазифасида келади. *-даги* аффиксли от эса ҳамма вақт отга боғланади ва гапда аниқловчи бўлиб келади: *Йигитлар нарироқдаги тупроқ ўюми орқасида бир ниманинг вишиллаётганини энди пайкашиди.* (*A. Мухтор.*) Бугун куни билан Ҳадянинг каптардеккина ҳаво ранг *кўйлакдаги қомати кампирнинг кўз ўнгидан кетмади.* (*A. Мухтор.*) Ҳаёт ҳамма вақт *китобдаги* гапларга тўғри келавермайди. (*O. Ёқубов.*)

Шунингдек, -ги аффикси аслида сифат ясайди ва предметнинг -ги аффиксли сўз билдирган вақтга кўра белгисини билдиради: **кузги буғдой, эрталабки маш-фулот** қаби. Лекин -даги аффикси таркибидаги -ги сўз ясаш хусусиятини йўқотган. У фақат ўринга (вақтга) оидликни билдиради. Демак, -даги аффиксидаги -да ўрин келишиги формасини ясаш хусусиятини, -ги сўз ясаш хусусиятини йўқотиб, иккаласи бирликда бир маъно ва вазифа учун қўлланувчи аффиксга — предметнинг ўрин белгисини кўрсатувчи аффиксга айланган.

-даги аффикси сўзга сон формасидан сўнг, ёгалик аффикси, ҳурмат ифодаловчи -дар аффикси, шунингдек, қарашлилик ифодаловчи -ники аффиксидан ҳам кейин қўшилади: **даражатлардаги, китобларимдаги, опамлардаги, тоғамларнидаги (тоғаларимнидаги)** қаби.

-даги аффикси субстантив формани атрибутив форма мага айлантиради. Шунинг учун ҳам қарашлилик формаси келишик қўшимчасини олмайди. Агар бу формадаги сўз отлашса (ўзи боғланиб келган отнинг вазифасини ҳам ўз устига олса), у ҳолда -даги аффиксидан сўнг яна кўплик ва келишик аффикслари қўшилаверади: **колхозларимиздагиларга** қаби: *Кўчалар бўм-бўш, ҳовлилар жим-жит, бу ердагиларниң чигиртка тугул оламдан ҳам хабари йўққа ўхшарди.* (А. Мухтор.) Ушанда йўлда бўлган воқеани **тоғамнидагиларга** айтиб берганимда, ҳеч ким ишонган эмас. (Л. Маҳмудов.)

**Ўхшатиш формаси.** Ўхшатиш формаси -дек (-дай) аффикси ёрдамида ясалади ва нарса ёки шахсни ҳаракат, белги жиҳатдан -дек аффиксли сўз билдирган нарсага, шахсга ўхшатади, ўхшашлигини кўрсатади: **Баҳор қуёшининг заррин шувласи аксида симобдек йилтиллаб, ойнадай ярқираб оқмоқда.** (И. Раҳим). Бугун эса катта кўчада **байрамдагидек одам** кўп эди. (Ш. Рашибов.) У ҳам **Гулчехрадек** нима қилишини билмайди. (Ў. Умарбеков.)

Ўхшатиш билдирувчи -дек (-дай) аффикси асосан отларга, бундан ташқари олмош, сифат ва феълнинг сифатдош формасига ҳам қўшилади: **сендек, мендек, яроқсиздек, сезмагандек** қаби: **Хотиралардан қочмоқчилик** ўрнидан туриб кетди. (С. Зуннунова.) Тансик эшикдан ҳовлига қадам қўйиши биланоқ, **чўчиғандай** бир зум тўхтаб қолди. (Ойбек.) Овоз берга-

ни кетаётганлардан кўра қайтаётганлар кўпроқдек кўринди кўзимга. (С. Зуннунова.)

-дек аффиксининг маъноси каби кўмакчисининг маъносига ўхшайди: сендек — сен каби. Аҳмаддек — Аҳмад каби.

Ўхшатиш билдирувчи -дек (-дай) аффикси сўзга ҳар қандай форма ясовчилардан кейин қўшилади: дўстлардек, дўстларимиздек, дўстларимиздагидек, дўстларимизникидагидек каби.

Эслатма. -дек аффиксли сўз шу формада янги маъно касб этиши, янги сўзга айланиши мумкин: муздек (сув), қитдай (дори), жўжабирдай (жон) каби.

### АНАЛИТИК ФОРМАЛАР

Отнинг аналитик формаси от билан кўмакчи сўзниг бирикишидан ҳосил бўлади. Бу формалар восита, макон, вақт, сабаб, мақсад каби маъноларни ифодалайди. Аналитик форма ҳосил қилувчи кўмакчилар отнинг маълум бир келишик формасига бирикади: қалам билан (ёзмоқ), кун сайин (гўзаллашмоқ), дўсти учун (олмоқ), кечгаг томон (келмоқ) ва бошқалар.

### Жуфт ва такрорий формалар

Отнинг жуфт формаси умумлаштириш, жамлик маъноларини ифодалайди: қовун-тарвуз (қовун, тарвуз ва бошқа полиз маҳсулотлари), қозон-товоқ (қозон, товоқ ва уларга алоқадор бўлган бошқа асбоблар) каби.

Баъзи жуфт отлар маънони кучли оттенка билан ифодалайди: Ҳонпошибоимникидан киши келиб, тез юрасиз, деб ҳоли-жонимга қўймай олиб кетди. (Ҳ. Ҳакимзода.) Қудрат электрни дадасига гапиравериб, колхоз монтёри Андрейга зир югуравериб, уларнинг қўлоқ-миясини еди. (Ҳ. Назир.)

Отнинг такрорий формаси кўплек маъносини ифодалаш, шунингдек, маънони кучайтириш учун қўлланади: Колхозида омбор-омбор ғалласи... (Ҳабибий.) Унинг кўзларидан оппоқ соқолига қатра-қатра ёш томар. (А. Қаҳҳор.) Ўғит фўзанинг томир-томирларига сингсин. (Ойбек.) ...ҳорғинликдан ич-ичига кириб кетган маъюс кўзлари шуълада чўғдай йилтиллади. (Ҳ. Гулом.)

## СИФАТ ФОРМАЛАРИ

### Синтетик форма

Сифатларда ҳақиқий маънодагӣ форма ясалиши деб-роқ аффикси билан ясалувчи формани кўрсатиш мумкин: *яхшироқ*, *кучлироқ*, *ширинроқ*, *узунроқ* каби. -роқ аффикси сифатга хос даражакатегориясининг озайтирма даражада формасини ясайди. Демак, бу форма категориал форма ҳисобланади.

Сифатнинг -иши, -имтирип аффикси ёрдамида ясалувчи формаси ҳам бор. Бу форма ранг-туснинг сифат билдирган белгига (ранг-тусга) мойиллигини, шунга яқинликни билдиради: *оқиши*, *кўкиши*, *кўкимтирип* каби. Лекин бу аффикслар билан форма ясалиши универсал характерга эга эмас, балки ранг-тус билдирувчи саноқлии сифатлардагина учрайди.

Айрим ишларда белгининг ортиқ даражасининг *қип-қизил*, *қоп-қора*, *дум-думалоқ*, *ям-яшил* каби усул билан ифодаланиши морфологик усул деб кўрсатилади. Лекин бундай ясалишни морфологик усул деб бўлмайди, шунингдек, *бут-бутун*, *сан-сарик*, *кўм-кўк*, *ям-яшил*, *тўппа-тўғри* кабиларни сифатнинг синтетик формаси деб бўлмайди. Чунки буларда форма ясовчи аффикс йўқ. Булар белги даражасидаги ортиқликнинг фонетик усул билан ифодаланишидир.

### Аналитик форма

Сифатнинг аналитик формаси белгининг ортиқ даражасини ифодалайди. Бу форма икки компонентли бўлиб, биринчи компонентни чиқиш келишиги формасида қўллаш орқали ҳосил қилинади: *шириндан* *ширин*, *узундан* *узоқ*, *қўполдан* *қўпол* каби.

### Жуфт ва такрорий формалар

Сифатнинг жуфт формаси асосан антоним сўзлардан ташкил топади ва умумлаштириш маъносини билдиради: *яхши-ёмон* (гап), *катта-кичик* (иморатлар), *паст-баланд* (даражатлар) каби.

Сифатларнинг такрорий формаси предметнинг бирдан ортиқлигини, миқдорий кўплигини билдиради. Бунда белгини алоҳида таъкидлаш, кучайтириш ҳам бўлади. Сифат аниқлаб келган от ҳам, шу маънога мослашган ҳолда, асосан кўплек формасида қўлланади.

ди: *Турли шаҳар ва қишлоқлардан келганликлари турлича кийим ва шеваларидан билиниб турган ёш-ёш йигит-қизлар конференц залнинг ич-сиртини тўлдириб юборган эди.* (П. Қодиров.)

## СОН ФОРМАЛАРИ

Ўзбек тилида сон туркуми бирон-бир грамматик категорияга эга эмас. Бинобарин, соннинг категориал формаси ҳам бўлмайди.

Ўзбек тилида соннинг маъно ва грамматик хусусиятларига кўра бир-биридан фарқланувчи турлари бор. Бу турларнинг ҳар біри ўзига хос формага эга. Формалар махсус аффикслар ёрдамида ясалади: *беш* (саноқ сон формаси), *бешта* (дона сон формаси), *бештадан* (тақсим сон формаси), *бештана* (чама сон формаси), *бешинчи* (тартиб сон формаси), -ов (бешов, олтов), -лаб (юзлаб, минглаб), -ларча (юзларча, миллионларча), -ала (учала, тўртала) аффикслари ҳам форма ясовчилар ҳисобланади. Лекин буларнинг ҳар бири маълум сон (сўз)лар билангина қўлланади.

Демак, сон туркумидан аффикслар ёрдамида ясалувчи фақат нокатегориал формалар бор бўлиб, улар соннинг у ёки бу турини билдиради.

Бундан ташқари, баъзи сон турларига хос маънолар жуфт ёки такрорий форма орқали ҳам ифодаланади.

Соннинг жуфт формаси орқали чама, тахмин маъноси ифодаланади. Бунда кичик миқдорни билдирувчи сон биринчи ўринда, унга нисбатан катта миқдорни билдирувчи сон иккинчи компонент сифатида қўлланади ва шу икки сон билдирган миқдорлар атрофидаги тахминий миқдор ифодаланади: *беш-үн* (киши), *ўттиз-қирқ* (километр), *уч-тўрттіх* (қалам) каби.

Такрорий сон формаси маълум миқдорий тўда, гурӯҳ, бўлак маъносини билдиради: *учта-учта*, *етти-етти* (киши), *бешта-бештадан* каби.

## ФЕЪЛ ФОРМАЛАРИ

Феъл туркуми ҳам, худди от туркуми каби грамматик формаларга ниҳоятда бой. Булар ђишида категориал формалар ҳам, нокатегориал формалар ҳам анчагина миқдорни ташкил этади.

## Синтетик формалар

Феълнинг категориал ва кўпгина нокатериал формалари асосан аффикслар ёрдамида ясалади.

### Категориал формалар

Феъл туркуми қўйидаги грамматик категорияларга эга: 1) даражা категорияси, 2) бўлишлар-бўлишсизлик категорияси, 3) майл категорияси, 4) замон категорияси, 5) шахс-сон категорияси. Бу категорияларга хос маънолар махсус формалар ёрдамида ифодаланади. Формалар эса махсус аффикслар ёрдамида ясалади: ўқиди (ўтган замон)—ўқияпти (ҳозирги замон)—ўқийди (кеиласи замон), ўқиса (шарт майли)—ўқимоқчи (мақсад майли)—ўқисин (буйруқ-истак майли), ўқиганман (I шахс)—ўқигансан (II шахс)—ўқиган (III шахс). Демак, феълнинг бирор грамматик категориясига хос форма категориал форма ва бу формани ясовчи аффикслар категориал форма ясовчи аффикслар ҳисобланади.

### Нокатериал формалар

Феълнинг категориал формаларидан ташқари маълум бир грамматик маъно ифодаловчи, феълни маълум бир грамматик вазифага хословчи нокатериал формалар ҳам бор. Булар қўйидагилар: 1) ҳаракатнинг ҳаракетистикасини билдирувчи формалар, 2) ҳаракатноми формаси, 3) сифатдоши формаси, 4) равишдоши формаси.

1) Ҳаракатнинг ҳаракетистикасини билдирувчи формалар ҳаракатнинг такрорийлигини, кучли ёки кучсиз даражасини кўрсатади. Улар -кила-гила, -ғила, -қилла, -(и)мсира, -(и)нқира аффикслари ёрдамида ясалади: туртқиламоқ, тортқиламоқ, эзғиламоқ, кулимсирамоқ, йиғламсирамоқ, кўкаринқирамоқ, оқаринқирамоқ, совинқирамоқ қаби. Бу типдаги форма ясалиши жуда кам феъллар доирасида учрайди. Мисоллар: Эртайдан бўён Ермат бу кўчани дастакли супурги билан қиртишлайди, чуқурларга тупроқ солиб тенқилайди. (Ойбек.) Шамол қутуриб кўча ёқасидаги дарахт шохларини тортқилаб силкитар, улардан дув-дув ёмғир томчилари тўқиларди. (С. Абдуқаҳҳор.) Сайрамов „Казбек“ни чўнтағидан тез чиқариб, папиросни сал эзғилаб лабига қистирди.

(Ойбек.) Унинг томоғи пир-пир учар, қовоғи **шишин-қирагандай** кўринар эди. (А. Қаҳҳор.) Мана, Аҳмад Ҳусайн ориқ, қиёфаси ёқимли, пешанаси кенг жиснгалак соч дехқон йигитга **кулимсираб** қарайди, сўз очади. (Ойбек.)

Кўриб ўтилган **-кила** (-ғила, -қила), **-(и)мсира**, **-(и)нқира** аффикслари феълга қўшилганда, унинг лексик маъноси ўзгармайди (феъл билдириган ҳаракатдан бошқа ҳаракат ифодаланмайди), балки шу ҳаракатнинг такрорийлиги, даражасининг кучли ёки кучсизлиги ифодаланади. Шунга кўра, **тепкила**, **кулимсира**, **оқарин-қира** типидаги ясалишлар сўз ясалиши эмас, балки форма ясалиши ҳисобланади. Бу типдаги форма ясалиши яхлит бир системани ташкил этмаслиги (саноқли феъллар доирасида чекланганлиги) сабабли **турткила**, **иғламсира**, **оқарин-қира** типидаги форма категориал форма эмас, балки нокатериоал форма ҳисобланади.

2) Ҳаракат номи формаси ёзмоқ, ёзиш, ёзув ҳаракат бажарйлиши ва шу бажарилиш билан боғлиқ бўлган маъноларни (замон, шахс-сон) билдиримайди, балки ҳаракат-ҳолатнинг номини билдиради, ҳаракат-ҳолатнинг атамаси ҳисобланади. Шу сабабли у отларга хос формаларда (сон, келишик ва эгалик формаларида) қўллана олади ва гапда отларга хос вазифаларда кела олади: *Саратоннинг яхши келиши* сабзавот бригадаси учун қувончили бўлди. (И. Раҳим.) *Қўзибой ишга аralашувини ҳам, чиқиб кетувини ҳам билмай қолди.* (Х. Назир.) Овқатдан кейин сўрайди, **ётишда** сўрайди, **туришда** сўрайди. (М. Исмоилий.) Босмачиларнинг ваҳшийлиги ўртоқларга маълум: *Одамларни кесмоқ, осмоқ, тириклий куйдирмоқ...* (С. Айний.)

Демак, ҳаракат номи формаси феълнинг от каби хусусиятли, отга хос вазифаларга мословчи нокатериоал формасидир.

3) Сифатдош формасининг (**ёзган**, **ёзаётган**, **ёзадиган**, **ёзар**) вазифа доираси анча кенг бўлиб, „сифатдош“ деб аталиши уларнинг бир асосий хусусиятига кўра, яъни сифатлар каби предметнинг белгисини кўрсатишига кўрадир. Қиёсланг: *Яхши бола—ўқиган бола, ўқиётган бола, ўқийдиган бола.* Демак, **-ган**, **-ёт+ган**, **-ди+ган** аффикслари феълнинг сифатга хос хусусиятли формасини ясайди, бу форма феълни сифатга оид хусусиятга, сифат учун ҳарактерли бўлган ва-

зифага хослайди. Бу формалар худди шу хусусиятига (вазифасига) кўра нокатериал форма ҳисобланади.

Бундан ташқари, сифатдош ясовчи айрим аффикслар феълнинг маълум бир грамматик категорияга хос формасининг ясалишида ҳам иштирок этади. Масалан, -ган аффикси ёрдамида ўтган замон формаси, -(а)r аффикси ёрдамида кёласи замон формаси ясалади: *Бир замонлар дадлнгиз мени ҳам йўлга солиш тилагида анча уринган*. Мен бўлсан, ўжарлик қилиб ўз билганини **қилганман**. (Ш. Рашидов.) *Мана ўғлим, эртага ўзинг олиб ерсан мороженоени*. (О. Ёқубов.)

Демак, буларда -ган ва -(а)r аффикслари нокатериал формани эмас, балки категориал формани (замон формасини) ясовчи аффикслар, **қилганмн**, **ерсан** нокатериал форма эмас, категориал формалар (замон формалари) ҳисобланади.

4) Равиш дош формасининг вазифа доираси жуда кенг. Бу форма -(и)б, -а(й), -гач, -гунча, -гани аффикслари ёрдамида ясалади: **кўриб**, **кўра**, **кўргач**, **кўргунча**, **кўргани** каби. Бу формаларнинг „равиш дош“ деб аталиши уларнинг бир асосий хусусиятига кўра, яъни равишлиар каби ҳаракатнинг белгисини кўрсатишига кўрадир. Ҳаракатнинг белгиси эса пайт, мақсад ва шу каби жиҳатдан бўлиши мумкин: **кулиб гапирди**, **ишлай-ишлай чарчади**, **тура қувиб кетди**, **кўргани келди**. Демак, -(и)б, -а(-й), -гач, -гунча, -гани аффикслари феълнинг равишига хос хусусиятили формасини ясайди. Бу формалар худди шу белгиси асосида „равиш дош формаси“ деб юритилади.

Кўриб ўтилган аффикслардан -(и)б аффикси ўтган замон формасининг, -а(-й) аффикси ҳозирги-кёласи замон формасининг ясалишида ҳам иштирок этади: *Хўнариги катта йўл асфалът бўлибди*, *атробига бир қатор янги уйлар тушибди*. (П. Қодиров.) Қани энди комсомоллардан ҳам эшитайлик, қани комсомоллар бригадири, нега товуши **чиқмайди**. (Ш. Рашидов.) *Ишонтириб айтаманки, Кўкбулоқдан ҳам сув чиқади*. (Ш. Рашидов.)

Демак, буларда [-и]б ва [-а] -й аффикслари нокатериал форма ясовчи эмас, балки категориал форма ясовчи аффикслар; **бўлибди**, **чиқмайди**, **чиқади** формалари эса нокатериал форма эмас, балки категориал форма.

Ҳозирги ўзбек тилида -гудек аффикси билан ясалувчи форма ҳам кенг қўлланади. Бу форма ўз хусусиятига кўра равишдошларга кўпроқ яқин туради. Лекин, нокатегориал форма сифатида, унинг вазифаси фақат ҳаракат белгисини билдириш билан чегараланмайди:

1. Предметнинг белгисини билдиради: *Мақташга арзигудек ютуқларимиз кўп.* (Н. Сафаров.)

2. Ҳаракатнинг белгисини билдиради: *У перонинг учини синдиргудек босиб материалдаги „Сувон“ сўзига „жон“ қўшиб тузатди.* (С. Анорбоев.)

3. Сифат билдирган белгининг даражасини кўрсатади: *Йигит гапирганда овози унча туюлмаган эди, қийқириғи эса ерни титратгудек қаттиқ эшишилди.* (П. Қодиров.)

4. Гапда мустақил кесим вазифасида келади ва бундай ҳолларда ҳам шахс ёки предметнинг ҳаракат белгисини билдиради: *Бирор гўзасини бостирсан, бошимни ёргудай.* (И. Раҳим.)

### Аналитик формалар

Ҳозирги ўзбек тилида феъл туркуми аналитик формаларга ниҳоятда бой. Булардан айримлари категориал формалар қаторига кирса, жуда кўпчилиги нокатегориал формалар ҳисобланади.

### Категориал формалар

Ҳозирги ўзбек тилида қуйидаги ёрдамчи сўзлар феълининг аналитик категориал формаларини ясайди:

1. Ёт, тур, юр, ўтирилаб кўмакчи феъллари ҳозирги замон феълининг аналитик формасини ҳосил қиласди: ишлаб ётибман, ишлаб ётибсан, ишлаб ётибди; ишлаб турибман, ишлаб турибсан, ишлаб турибди; ишлаб юрибман, ишлаб юрибсан, ишлаб юрибди; ишлаб ўтирибман, ишлаб ўтирибсан, ишлаб ўтирибди каби.

2. Эди тўлиқсиз феъли орқали:

1) ўтган замон феълининг аналитик формалари ясалади: келган эди, келиб эди, келаётган эди, келар эди: *У минг хил хаёллар билан кичкина тугунчадан иборат бисотини қўлтиқлаб Икромжоннинг орқасидан ташқарига чиқди. Низомжонни чинакамига безгак тутган эди.* (Сайд Аҳмад.)

Оренбург сафарига кетаётганида Набига қараб: „Сен менинг ўзим бўла олмасанг ҳам кўзим бўл,

күзим!" деган гапини **эшиштган эдингми?** — Эшишиб эдим. (С. Айний.) Рота бир қатор бўлиб сўқмоқдан, баланд ўсган ўт-ўланлар орасида, гоҳ кўриниб, гоҳ кўринмай **кетмоқда эди.** (А. Қаҳҳор.) Кундуз кунлари қишлоқ бир оз тинч бўлса ҳам кечалари аллақаёқдан иши-сиғи овози келиб, тонгга қадар қўрқиб **ухолмай чиқар эди.** (Ғайратий.)

2) -(a)r), -mas аффиксли феълга бириқиб шартли майл формасини ясайди: *Шу қишлоқни кўрсам, мана шу кўчалардан бирига коровул бўлиб сув сепсам, беармон кетар эдим.* (А. Қаҳҳор.) Уша воқеа бўлмаганда, балки Абубакиров ҳам Ёдгорбекка бунча **ёпишмас эди.** (О. Ёқубов.)

3) Йўқ, эмас ёрдамчилари инкорнинг аналитик формасини ясайди: *келгани йўқ, келган эмас, сўраётгани йўқ, сўрамоқчи эмас* каби.

Феълнинг категориал формаси деб қарааш мумкин бўлган аналитик формалари ана шулар.

### Нокатериал формалар

Феълнинг аналитик нокатериал формаларини ясовчи ёрдамчи сўз (воситалар) кўп ва улар ифодалайдиган маъно ҳам хилма-хил. Аналитик нокатериал феъл формаларини, маъноларидағи умумийликка қараб, иккисосий турга бўлиш мумкин: 1. *Харакат процессининг характеристикасини билдирувчи формалар.* 2. *Модал маъно ифодаловчи формалар.*

1. *Харакат процессининг характеристикасини билдирувчи аналитик формалар,* умумий маъноларидан ташқари, қўйидаги хусусиятлари билан ҳам аналитик модал формалардан фарқланади: 1) форма ясовчи ёрдамчи сўзларнинг ҳаммаси феъллардан (*бошла, ёт, тур, юр, ўтири, бор, кел, бўл, битир, чиқ, ет, ўт, ол, бер, қол, қўй, кет, юбор, ташла, сол, туш, ўл, ёз*) иборат бўлади; 2) бу ёрдамчи феълларнинг ҳар бири тилда мустақил феъл сифатида ҳам қўлланади; 3) ёрдамчи феъллар етакчи феълга фақат равишдош формаси — (-и) б ёки -a(-й) аффиксли равишдош формаси орқали бирикади, яъни кўмакчи феъл бирикадиган етакчи феъл (-и) б ёки -a(-й) аффиксли равишдош формасида бўлади: *айта бошлади, айтиб ётибди, айтиб турибди, айтиб тур, айтиб*

юрибди, айтиб ўтирибди, айта борди, яқинлашиб келяпти, ёзиб бўлди, қуриб битди, ўқиб чиқди, пишаб етди, бўлиб ўтди, битириб олди, бора олди, ўйнаб берди, ўйнай берди, кўриб қолди, айта қолди, айтиб қўйди, қизарив кетди, йиқитиб юборди, эзив ташлади, йиқилиб тушди, йиқила ёзди каби; 4) кўмакчи феъллардан баъзилари ёрдамида ясалувчи аналитик формаларда етакчи феъл билан кўмакчи феъл бир хил формада бўлиши мумкин: *айтди-қўйди, ёзди-олди, қочди-кетди* каби; 5) шу типдаги аналитик форманинг баъзилари кўп маънолилик хусусиятига эга. Масалан: қол кўмакчи феъли билан ясалувчи аналитик форманинг маъноларига эътибор беринг: *кўриб қолди, ўрганиб қолди, осилиб қолди, қараб қолди;* 6) бундай аналитик форма ясовчи кўмакчи феълларнинг баъзилари етакчи феълга фақат -(и)б ёки -(а)-(и) равишдош формаси ёрдамида бирикади, айримлари эса равишдошнинг ҳар икки формасига бирика олади: *ёза бошлади, ишлаб тур, ишлай тур, ёзив борди, ёза борди* каби; 7) кўмакчи феъл бирдан ортиқ бўлиши мумкин. Ҳар бир кўмакчи феъл ўз маъноси билан қатнашади: *танишиб чиқа бошлади* (*танишиб чиқ* — танишиш ҳаракатининг бирор обьектда бошланиш пунктидан тугаш пунктигача давом этиши; *бошла* кўмакчи феъли шундай характердаги ҳаракатнинг бошланишини билдиради).

Ҳаракат процессининг характеристикасини кўрсатувчи формалар ҳаракатнинг бошланиши ёки давомлигини, ҳаракатнинг кучли ёки кучсиз даражаси каби характеристикасини кўрсатади. Уларни ана шундай умумий хусусиятларига кўра қўйидаги турларга бўлиш мумкин; 1) ҳаракатнинг бошланғич фазасини кўрсатувчи аналитик формалар; 2) ҳаракатнинг бажарилишидаги давомлиликни билдирувчи аналитик формалар; 3) ҳаракатнинг бажарилишига яқинлашган фазасини билдирувчи аналитик формалар; 4) ҳаракатнинг тугалланган фазасини кўрсатувчи формалар; 5) ҳаракатнинг юқори (интенсив) фазасини билдирувчи аналитик формалар; 6) ҳаракатнинг нормал даражага етмаган фазасини билдирувчи аналитик формалар; 7) ҳаракатнинг бажарилиши ва ҳолатнинг юзага келиши фазасини билдирувчи аналитик формалар; 8) ҳаракатнинг бир марталигини билдирувчи аналитик формалар; 9) ҳаракатнинг

бир лаҳзада (сезиларсиз вақт ичида) юз беринин билдирувчи аналитик формалар.

Ҳаракат процессининг характеристикасини билдирувчи формаларнинг ҳар бир тури, ўз ичида, етакчи ва кўмакчи феълнинг бирикиш формаси, маъно оттенкалари, қўлланишдаги хусусиятлари ва бошқа белгиларига кўра бир-биридан фарқланади.

1) Ҳаракатнинг бошланғич фазасини билдирувчи аналитик формалар *бошла, кел, кет* кўмакчи феъллари ёрдамида ясалади.

*Бошли* кўмакчи феъли етакчи феълга -*а* (-*й*) равишдош ясовчи ёрдамида бирикади: *кела бошлади, ишлай бошлади* каби. Бу форма ҳаракатнинг бошланниши маъносини билдиради. *Бошли* кўмакчи феъли деярли барча феъллардан шундай маънони ифодаловчи форма ясай олади: *ўқий бошлади, ёға бошлади, сўрай бошлади, ута бошлади*.

*Кел* кўмакчи феъли етакчи феълга (-*и*) б равишдош ясовчиси ёрдамида бирикади. У аста-секин, даражамада ража ривожланиб, сўнгра тўла (нормал) ҳолат юз берувчи ҳаракатни билдирувчи феъллардангина ҳаракатнинг бошланғич фазаси юзага келиши маъносини билдирувчи аналитик форма ясай олади: *Гапинг тўғрику, лекин колхозларинг дуруст бўлиб келаётиди.* (А. Қаҳҳор.)

*Кет* кўмакчи феъли баъзи феъллардангина ҳаракатнинг бошланғич фазасини билдирувчи аналитик форма ясай олади. Бу формада ҳаракатнинг бошланғич фазадаги давомлилиги оттенкаси ҳам бўлади: *Ўйин ҳам бир турли назокат касб этиб, Гулсиниби Ӣўргалай кетди.* (А. Кодирий..)

2) Ҳаракатнинг бажарилишидаги фазасини билдирувчи аналитик формалар *ёт, тур, юр, ўтири, бор, кел, бер* (*вер*) кўмакчи феъллари ёрдамида ясалади. Бу формалар, қайси замон ёки қайси майл формасида бўлмасин, ҳаракат—ҳолатнинг бажарилишидаги давомлилиги маъносини билдиради. Бу формалар ҳам ўзаро оттенкаси, қўлланиш доираси каби хусусиятлари билан фарқланади: *Дарёдан сув чиқаришга уриниб ётишибди.* (А. Қаҳҳор.) Элмурод... муҳим маълумотлар ва сўзларни қоғозга ёзиб ҳам турди. (П. Турсун.) Камол Каримийнинг ҳикоялари университетнинг сўнгги курсида ўқиб юрган йилларида ёқ

тўплам бўлиб чиқкан эди. (Сайд Аҳмад.) Бахрободдаги уй-жойини, қавм-қариндошини, ёр-дўстини ташлаб келиб, биз билан жафо чекиб ўтирибдими, баракалла! (А. Қаҳҳор.) Дафтарга каникулда қилган ишларимни ёзиб бормоқчиман. (Р. Файзий.) Неча йиллардан бери қалбидаги сақланиб келаётган эзгу армонлар унинг бутун асабларини уйғотиб юборган эди. (С. Зуннунова.) Эксказаторнинг ер қазий бериб оқариб кетган тишларида гина қуёшнинг қизғиши акси кўзга ташланиб қолади. (Р. Файзий.)

3) Ҳаракатнинг бажарилишига яқинлашган фазасини билдирувчи аналитик формалар қол ва ёз кўмакчи феъллари ёрдамида ясалади. Бу кўмакчи феъллар бирор ҳаракатнинг якунини, тугаш пунктини билдирувчи бўл, бит, ет каби феъллар билан бирикиб шундай маъноли форма ясай олади: битиб қолди, бита ёзди каби:

— Кўлдошвой, рўйхат нима бўлди?

— Рўйхат тамом бўла ёзди. (Ҳ. Шамс.)

4) Ҳаракатнинг тугалланган фазасини билдирувчи аналитик формалар бўл, бит, битир, чиқ, ет, ўт, ол, қўй, кет, юбор, ташла, сол, туш кўмакчи феъллари ёрдамида ясалади. Бу формалар ҳам ўзига хос маъно оттенкалари, қўлланишдаги хусусиятлари каби белгилари билан бир-бирларидан фарқланади: *Бундай пайтларда у, то қўлини ювиб бўлмагунча, касалга орқасини ўгириб турар* эди. (С. Зуннунова.) Кичикроқ водийнинг ҳар ер-ҳар еридан суюқ тутун кўтарилимоқда—қишлоқ батамом ёниб битган. (А. Қаҳҳор). Алимов, ўз одатича, кўзойнаги четидан ҳар бир болага синчиклаб зеҳн солиб чиқди. (Ҳ. Назир.) Аҳмад вазифасини яхши англаб етмаган бўлса-да, „хўп“ деб дафтарни олди. (Ҳ. Назир.) Қанча воқеалар бўлиб ўтди. (С. Аҳмад.) Менинг Саломатим билан Султоним ҳам саводини чиқариб олди. (Ҳ. Гулом.)... бир укаси бор экан,... ўзини эплаб кетади. (Ойбек.) Мактабдошим, балки мени унудиб юборгандирсан. (С. Аҳмад.) Раҳматилла гўё ғояларининг амалга ошувидан умид узган ва бу ғояларни кўнглидан чиқариб ташлаган (А. Қаҳҳор.) Рус, татар, яхудий савдогарларидан бу кун эшитган кўнгилсиз воқеаларни, подшоҳ ҳу-

*куматининг аҳволи анча танг эканини тўкиб солди.*  
*(Ойбек.)*

5) Ҳаракатнинг юқори (интенсив) фазасини билдирувчи аналитик формалар кет, юбор, ташла, ўл кўмакчи феъллари ёрдамида ясалади: Агар селитра кўп солинса, гўза **ғовлаб кетади-ю**, ҳосил тумгайди. (М. Жўра). Ҳадича аянг ... ўғлини **талтайтириб юборибди-да**. (Х. Назир). Отлик аскарларимиздан бир группаси Н. қишлоғидаги душман гарнизонини **бурдалаб ташлади**. (Н. Сафаров.) Шу бугун ўзим уйқудан қолиб мудраб ўляпман. (Х. Зиёхонова.)

6) Ҳаракатнинг нормал даражага етмаган фазасини билдирувчи аналитик форма қол кўмакчи феъли ёрдамида ясалади: Кечагина икки қуда учрашганларида болаларининг бўйи **иўзилиб қолганлигини гаплашишган** эди. (Шуҳрат).

7) Ҳаракатнинг бажарилиши ва ҳолатнинг юзага келиши фазасини билдирувчи аналитик формалар ол, қол, қўй кўмакчи феъллари ёрдамида ясалади: ... қўш ёнида дадил қадам ташлаб бораётган қора болани бир нафас кузатиб турди ва ерга чўнқайиб **ўтириб олди** (Х. Гулом). Газетадан кўз олмай, ўнг қўли билан тимирскилаб ёнидаги пиёлани топиб, илиб қолган чойни шимирди. (Сайд Аҳмад.)

— Қайтишда қўниб ўтинглар, каклик **тутуб қўяман**.

— Бирга тұтамиз, тузокни **тайёрлаб қўй**. (С. Анорбоев.)

8) Ҳаракатнинг бир марта бажарилганини билдирувчи аналитик формалар ол ва **қўй** кўмакчи феъллари ёрдамида ясалади: Терак орқасида қолган ой ҳам кучли елнинг кўмагида терак бошидан буларга **мўралаб олди**. (А. Қодирий.) Пирнафас aka билан Полвон бир-бирларига **қараб қўйдилар**. (Ж. Шарипов.)

9) Ҳаракатнинг бир лаҳзада (сезиларсиз вакт ичидаги) юз беришини билдирувчи аналитик формалар кет, юбор, туш кўмакчи феъллари ёрдамида ясалади: чўчиб кетди, чўчиб тушди: Раис зум ўтмай, ўзи ўйлаган фикрлардан ўзи **иўчиб кетди**. (Ш. Рашидов.) Нарзи тоға жўрттага ва қўйқисдан

*айтиб юборган* бу сўзидан ўзи ҳам хурсанд бўлиб, тишининг оқини кўрсатди. (Ш. Тошматов.)

2. Модал маъно ифодаловчи формалар сўзловчининг ҳаракатга бўлган муносабатини кўрсатади. Бундай формалар ҳам ҳозирги ўзбек тилида анчагина миқдорни ташкил этади.

Бу турдаги формалар ҳаракат процессининг ҳарактеристикасини кўрсатадиган аналитик формалардан фарқланувчи қўйидаги хусусиятларга эга: 1) модал маъно билдирадиган аналитик форма юқоридаги каби кўмакчи феъллар, тўлиқсиз феъл, ҳатто феъл бўлмаган ёрдамчи сўзлар ёрдамида ҳам ясалади: *келса керак, келсин эди* каби; 2) бу турдаги формани ясовчи ёрдамчи сўзлар асосий феълга равишдош формасидан бошқа формалар ёрдамида ҳам бирикади: *ўқиган бўлди* каби; 3) бу турдаги аналитик формада кўмакчи феълнинг етакчи феъл билан бир хил кўринишда (*айт-қўй* каби) қўлланиши учрамайди.

Модал маъно ифодалайдиган форма ясовчи маҳсус ёрдамчи сўзлардан ташқари юқоридаги кўриб ўтилган кўмакчи феъллар ҳам баъзи модал маъно ифодаловчи аналитик формалар ясайди. Ҳозирги ўзбек тилида модал маъно ифодаловчи қўйидаги аналитик формалар кенг қўлланади:

**-а/-й ол** формаси. Бу форма ҳаракатни бажаришга қодирлик маъносини билдиради: *бажара олади, ўта олади, ўқий олади* каби.

**-а/-й бил** формаси. Бу форма ҳам худди юқоридаги маънони билдиради: *ажратма билди, сўзлай билади*.

**(и)б бўл** формаси. Бу форма ҳаракатнинг бажарилиши учун объектив имкониятнинг мавжудлиги (мумкинлик) маъносини билдиради: *Ҳамма илми фақат савод орқалигина ўрганиб бўлади.* (П. Турсун.)

**(и)б қол** формаси. Бу форма ҳаракатнинг тасодифан, хоҳиш-ихтиёрга қарама-қарши, шунингдек, вақт ғаниматда бажарилиши каби маъноларни билдиради: *Нима бўлди-ю, Комилжон билан Жамила бир-бирларига дуч келиб қолишиди.* (Ж. Абдуллахонов.) Мехри хижсолат бўлиб, ўзини оқлашга тиришиди. — Баъзан **кетиб қолади-да**. (А. Каҳҳор.) Кечки паллада кўпроқ ишлаб қолиш учун бригада аъзолари зўр берардилар. (П. Турсун.)

**-а/-й қол**. Бу форма хайриҳоҳлик, илтимос, истак,

даяват каби маъноларни ифодалайди: ола қол, сўрай қол, бера қолинг, қани энди кўна қолса каби.

**-(и) б қўй.** Ҳаракатнинг хоҳиш-ихтиёрдан ташқари, билмаган ҳолда юз беришини билдиради: Гўзал қўлидаги гулдастани, адашиб қолдими она тили ўқитувчишига *бериб қўйди*. (Р. Файзий.)

**-а/-й бер (вер).** Ҳаракатнинг бажарилишига тўсиқ (монелик)нинг йўқлиги каби маъноларни билдиради: *келавердим, еяверади, олавер.*

**-а/ й кўр(ма).** Қатъий таъкид, огоҳлантиришни билдиради: *айта кўрма, сўзлай кўрмасин.*

**-(и)б кўр, -(и)б қара.** Синаш, билиш маъносини билдиради: *еб кўр, сўраб кўраман, ўқиб қара.*

**-(и)б боқ.** Худди -(и)б кўр, -(и)б қара формалари фодалайдиган маънони билдиради: *ўқиб боқ, ўтиб боқ.*

**-а-й тур.** Ҳаракатнинг вақтинча, бошқа бирор ҳарат-ҳодиса юз бергунча бажарилиши маъносини билдиради: *кўра тур, ишлай тур* каби.

**-(и)б юр, -(и)б ўтирип.** Ҳаракатнинг бажарилиши маъқул эмаслигини билдиради: *Тўй қизиганда яна бир балони бошлаб юрмасин.* (С. Анорбоев.) *Мен содда шунинг гапига ишониб ўтирибман.* (А. Қаҳҳор.)

**-ган бўл (ётган бўл).** Бўл ёрдамчи феъли сифатдош формаларидан фақат ўтган замон ва ҳозирги замон формаларига бириккандагина аналитик форма ҳосил қила олади. Лекин бўл ёрдамчисининг ўтган ва ҳозирги замон сифатдоши билан қўлланиши ҳамма вақт ҳам аналитик формани юзага келтиравермайди. Бунда икки ҳодиса бўлиши мумкин.

1. Аналитик форма ҳосил бўлади. Бу форма ҳаракатнинг астойдил эмас, номигагина бажарилиши, субъект ўзини шу ҳаракатни бажарган қилиб кўрсатиши маъносини билдиради: *Ҳар қалай, узил-кесил бўлмаса ҳамки, розилик берган бўлдим.* (Н. Сафаров.) *Шундан сўнг Бегимхон икки-уч кун мактабга қатнаган бўлди-ю, сўнгра қайнона, қайната ўртага тушди.* (И. Раҳим.) Чойфуруш бурчакда чой яшиклари билан *овора бўлган бўлди.* (А. Мухтор.) *Мастура жавоб бермасдан, ўтоқ қилишга уринган бўлди.* (Ойбек.) Омадингиз йўққа ўхшайди, меҳмон,— деди ҳоким *ачинган бўлиб.* (Ш. Саъдулла.)

2. Бўл ёрдамчиси боғлама вазифасида бўлади. Бунда бўл ёрдамчиси майл, замон ва шу каби маънолар-

нинг реаллашуви учун восита ролини ўтайди: *Мана бу кишининг ўзи келибди, агар кўрсатган адреси чатоқ бўлиб хат қайтган бўлса, ҳозир ўзига беринг.* (А. Қаҳҳор.) Қачон қарасанг, ё шеър ёзаётган бўласиз, ё Эшонбоевни танқид қиласман деб турган бўласиз. (П. Қодиров.)

Мисоллардан кўринаидики, бўл ёрдамчиси ёзаётган, деб турган феъл формалари билан келганда грамматик маъно ифодаламайди, балки шарт майли ва ҳозирги келаси замон кўрсаткичларининг қўлланиши, уларга хос маънонинг ифодаланиши учун восита ролини бажаради, холос.

Бўл ёрдамчиси феълнинг баъзи формалари, масалан, -диган, -моқчи аффиксли формалари билақ қўлланганда, фақат боғлама вазифасини бажаради, аналитик форма ҳосил қиласмайди: *борадиган бўлса, бормоқчи бўляпти* каби.

-са бўл. Бу форма қуидаги маъноларни ифодалайди:

1) Ҳаракатни бажариш мумкинлиги, ҳаракатнинг бажарилишига монеликнинг йўқлиги маъносини билдиради: *Биз ҳам одамга ўхшаб бемалол ўтириб гаплашсак бўлади-ку...* (О. Мухторов.) Аввало, муллажиринг керак, бошана, бир ватан керак. Кейин қайлиқ орзу қиласанг бўлади. (Ойбек.)

2) Ҳаракатнинг бажарилиши энг асосий мақсад экани маъносини билдиради. Бу маънонинг ифодаланишида бўл ёрдамчиси бўлди, бўлгани формасида қўлланади: *Ёлғиз ташлаб қўймасангиз бўлди.* (Ў. Үмарбеков.) Шомамат отани қутқарсанг бўлгани — келади-ю, ҳаммаларингни тузатади. (Ш. Саъдулла.)

3) Бўл ёрдамчиси бўладими формасида қўлланганда, ҳаракатнинг юз беришига бўлган кучли таажжуб ифодаланади: *Ҳеч кутмаганда Качал полвон бошини қимирлатса бўладими...* (Ш. Саъдулла.)

-ганим бўлсин. Бу форма ҳаракатни бажариш ёки бажармасликка қатъий қарор маъносини билдиради: *Бўлди, бўлди, янаги отпускада борганимиз бўлсин!*— Бу қатъий қарор билан Хуршидбек онасини хурсанд қилмоқчи эди. (С. Зуннунова.) Иккинчи бундай қилмаганим бўлсин. (С. Зуннунова.)

-ди дегунча. Шу формадаги феъл билдирган ҳаракат бажарилиши билан бошқа бир ҳаракатнинг бажарилишини билдиради: *Бойбува кўса ҳамма қўғирчоқлар*

**билин түй-томушаларга кетди дегунча, Качал полвон ҳам уйдан отилиб күчага чиқарди.** (Ш. Саъдулла.) **Сиз келдингиз дегунча, бир ёкка жүнайдилар.** (П. Турсун.)

**-а (-й) дейди (демайды).** Ҳаракатни бажаришга мойиллик, ҳаракатнинг бажарилиш белгиси бор-йўқлиги ифодаланади: *Ғуломжон ака эса ҳамон сўз қотмас, кўзойнагини бурнига кўтарганича ўз ишидан бош кўтарай демас,...* (М. Исмоилий.) Оёғим музлаб кетяпти. **Исий демайди.** (Э. Усмонов.)

**-а/-й де.** Бу форма ҳаракатнинг бажарилишига оз қолганлик маъносини билдиради: *Атрофда баланд тоғлар қад кўтарган, уларнинг қорми чўққилари осмонга тегай-тегай деб турагар эди.* (О. Ёкубов.) **Дарё томондан эсган изғирин бурунни учирив кетай дейди.** (А. Каҳҳор.) Бу кўчада қулаган ва қулагай деб турган деворлар... орасида режа билан солинган чиройли оқ иморатлар учрагар эди. (А. Каҳҳор.) **Кўзи сал илинай деганда, гўдакнинг чинқириғи қулогига ҷалинарди-ю, чўчиб уйғониб кетарди.** (С. Зуннунова.)

**-ги кел.** Бу формада шахс кўрсаткичлари асосий феълга, майл, замон, инкор қўшимчалари кел феълига қўшилади ва ҳаракатга бўлган истак маъноси ифодаланади. **Камолнинг қиздан кечирим сўрагиси, мулойим гаи билан уни ҳар қалай эркалаб қўйгиси келди.** (О. Мухторов.) **Егинг келса, олиб берай, — деди.** (Ш. Саъдулла.)

Бу формадаги кел ўрнида баъзан бор (бўлишли маънода) ва йўқ (инкор маънода) сўзлари ҳам қўлланади: *Ростини айтсан, менинг ҳам уч-тўрт йил ўқигим бор.* (Ў. Умарбеков.) Зумрад Қосим тўғрисида баъзан шундай йўсинда гапиравар, умуман бу йигитни ёдига олгиси ҳам, у тўғрида гаплашгиси ҳам йўқ эди. (О. Мухторов.)

Аналитик нокатегориал формаларнинг анчагина қисми тўлиқсиз феъллар ёрдамида ясалади.

**-син эди.** Буйруқ-истак майли билан эди тўлиқсиз феълининг бирикишидан ҳосил бўлган форма шу формадаги феъл англатган ҳаракат бошқа бирор ҳаракат-ходиса учун бажарилган бўлиши кераклигини, субъект шу ҳаракатни бажармагани учун айборлигини билдиради: *Бунақа экан, мажлиснинг охиригача ўтиринг, нимани ўйлаб Усмонжонни таклиф қилганлигинизни*

*коммунистларга айтинг эди.* (А. Қаҳхор.) Унақа олифта бўлса, *келмасин эди.* (А. Қаҳхор.)

-са эди. Бу форма ҳаракатнинг бажарилиш эҳтимоли йўқ эмаслиги, шу ҳаракат юз берса, яна нимадир бўлиши каби маъноларни билдиради: *Туман тарқаб кетса эди,* деб кўнглидан ўтказди. (С. Анербоев.) Бир кун „Элобод“ колхози сени бағримдан узмаса *эди*, — деди айёрча илжайиб раис. (Ойбек.) „Бугун яна ота билан орамиздан гап қоғмаса эди“ деган ташвишига тушди. (Х. Нуъмон.)

-ган экан (-ётган экан). Бу форма қуйидаги маъноларни билдиради:

1) Пайт ифодалаб, пайт эргаш гапнинг кесими вазифасида келади ва пайт эргаш гапни бош гапга боғлаш учун хизмат қилади: ...ҳовлига кираман деб эшик остонасига шундай қадам қўйган экан, бирор шақ этиб пешонасига урибди. (Ойбек.) Босмачилар ҳакида ҳар хил хабарлар кела бошлади: ... фалон қўрбоши йигитлари билан тог оралиғида келаётган экан, кўчкү босиб қолибди. (А. Қаҳхор.)

2) Сабаб маъносини билдиради ва сабаб эргаш гапнинг кесими вазифасида келади: *Партия ва ҳукумат шу колхозни менга ишониб топширган экан*, унда қаттиқ тартиб-интизом ўрнатишга мажбурман. (С. Анербоев.)

-*(а)*р экан. Бу форма қуйидаги маъноларни билдиради:

1) Пайт маъносини билдириб, пайт эргаш гапнинг кесими вазифасида келади: Ёз чоқлари Йўлчи далада ишларкан, улар тез-тез учрашиб туришар, жуда самимий сўзлашишар эди. (Ойбек.) Солдатнинг гапларига қулоқ соларкан, Турғун бу иш чўпонлардан кўра ҳам Саодат учун оғир эканини ўйлар эди. (О. Ёқубов.)

2) Сабаб маъносини билдиради ва сабаб эргаш гапнинг кесими вазифасида келади: Кечани кеча, кундузни кундуз демай тер тўкар эканмиз, турмушимиз ҳам фаровон бўлуви шарт. (Ш. Рашидов.)

3) Ҳаракатнинг бажарилиш тарзини, ҳолатини билдиради: Қўй-қўй, айтма, — деди Олия жилмайиб, унинг оғзини кафти билан ёпаркан. (Ж. Абдуллахонов.) Ҳа, ҳа, деди Йўлдошвой ғазабидан титрар экан. (Х. Нуъмон, А. Шораҳмедов.)

-са экан. Бу форма ҳаракатнинг бажарилиш-бажа-

рилмаслигини исташ, шунга тарафдорлик, ҳақиқатда эса шунга эришмаганлик маъносини билдиради: *Бирор-тасининг номини айтса экан, совчиликка борсам.* (С. Анербоев.) Эй, Рузронбуви, буям сизга ўхшаб ётиғи билан *гапирса экан.* (Яшин.)

**-моқчи экан.** Мақсад ҳаракатининг пайтини билдиради: ... хотин *кетмоқчи экан, Жамолбой унинг қўидан дадил ушлади-да, бир қўли билан бўш стулни ўз ёнига сурди.* (Ойбек.)

Кўпгина аналитик нокатериориал формалар феъл бўлмаган ёрдамчи сўзлар воситасида ясалади.

**-(и)ш билан.** Бу формада ҳам шахс кўрсаткичлари асосий феълга қўшилади ва шу формадаги феъл билдиран ҳаракат бажарилди дегунча бошқа бир ҳаракатнинг бажарилиши маъносини билдиради. Демак, у -ди дегунча типида ясалувчи форманинг синоними ҳисобланади: *Аҳмаджон пулемётини ўша томонга ўнглаб, тепкисини босиши билан белига бирор қаттиқ тепгандаи бўлди.* (А. Каҳҳор.) Дераза *очилиши билан Йўлчи бошини кўтарди.* (Ойбек.) Маърифатхон номи *айтилиши* билан сухбатга яна жон кирди. (А. Каҳҳор)

**-ған билан.** Бу форма тўсиқсизлик маъносини билдиради: *Майли, ... дод деганинг билан Равшан эшиштмайди.* (Л. Маҳмудов.) Ботқоқ жойларини қуритиши керак, дори *сёрган билан бўлмаяпти.* (А. Несин.)

**-(и)ш керак (лозим, зарур).** Бу форма ҳаракатнинг бажарилиши талаб этилишини, талабдаги ҳолатда эканини билдиради: *ишлаш керак, ишлаш лозим, ишлаш зарур; ўрганиш керак, ўрганиш лозим, ўрганиш зарур каби.*

**-га қарамай.** Бошқа бирор ҳаракатнинг бажарилишига тўсиқ бўла олмаслик (тўсиқсизлик) маъносини билдиради: *ишлашига қарамай, ялинишига қарамай.* *Қиши оқшоми бўлишига қарамай,* осмонда юлдузлар чарақляяпти. (С. Зуннунова.)

**-ганича (-гунча) йўқ.** Ҳаракатнинг тўла бажарилиб етмаганлиги маъносини билдиради: *Адвокат нима дейишни ўйлагунча йўқ, у заҳрини сошиб кетди.* (Шуҳрат.)

— Тушундим, тушундим...

— Йўқ, ҳали тушунганингизча йўқ. (Ж. Шарипов.)

-гандан кейин. Бу форма сабаб маъносини билдиради: Яшаганингдан кейин тирик эканингни сезиб, турмуш сирларини билиб яшасанг-да. (А. Несин.) Ўқитувчи бўлиб нон егандан кейин болаларни ўзига ром қилсин, босиб олсин-да. (А. Қаҳҳор.)

-са керак. Бу типда ясалувчи форма гумон, тахмин маъносини билдиради: Лекин ўзимча бу соатни Олия она Тошкентда олган бўлсалар керак, деб ўйладим. (О. Мухторов.) Лекин эртадан-кечгача ... бундай қуршовда ўтириш одамни тарашадай қотириб юборса керак. (А. Мухтор.)

Айнан бир феълнинг турли формада қўлланишидан ҳам аналитик нокатегориал формалар ҳосил бўлади.

-са... -син: ўқиса ўқисин, борса борсин каби. Бу форма ҳаракатнинг бажарилиши хоҳиш-ихтиёрга зид эмаслиги маъносини билдиради: Қийналса қийналсин, иккинчи пойламайдиган бўлади, деб ўйларди. (С. Зункунова.)

Биринчи компоненти -а, иккинчи компоненти -гунча аффиксли равишдош формасида қўлланган аналитик формадан давомлилик ифодаланади: Митянинг тақлифи ўзининг ҳам кела келгунча ўйлаб келган фикрларига мос эди. (М. Мұхамедов.) Лекин, биринчидан, бундай қўлланиш учтўртта феъллардагина учрайди. Иккинчидан, шу форма ўрнида -гунча аффиксли равишдошнинг ўзи қўлланса ҳам давомлилик ифодаланаверади. Аналитик форманинг қўлланишида маъно бир оз кучаяди, холос. Қиёсланг: боргунча — бора боргунча, ўлгунча — ўла ўлгунча, келгунча — кела келгунча каби.

-ган аффикси билан ясалган сифатдош формасининг турли формада такрор қўлланишидан ҳам аналитик форма ҳосил бўлади. Бу типдаги аналитик формада компонентларнинг қўлланиши икки хил кўринишга эга: 1) биринчи компонент шахс кўрсаткичи билан қўлланади. Бу формада „нуқул“, „доим“ деган маъно ифодаланади: ўртоқлари китобдан бош кўтармайди, нуқул ўқигани ўқиган. (А. Несин.) Ўқитувчилар ҳам уларга бригадир бўлиб, далада юргани юрган. (П. Кодиров.); 2) биринчи компонент чиқиш келишиги формасида, иккинчи компонент феълнинг бошқа (хоҳлаган)

формаларида қўлланади. Бу формада давомлилик маъноти ривожланиш, кучайиш оттенкаси билан ифодаланади: **Унинг пахтазорлари кенгайгандан кенгайди.** (Х. Гулом.) **Ел кучайгандан кучайиб борар ва шунисбатда мозор ичи ҳам яна бир қат қўрқинч ҳолга кирад эди.** (А. Қодирий.) **Ҳаш-паш дегунча область раҳбарлари олдида иккаласининг нуфузи ошгандан ошиб, айтгани айтган, дегани деган бўлиб қолди.** (Т. Пўлат.)

Аналитик феъл формалари, айниқса етакчи ва кўмакчи феълдан ташкил топган аналитик формалар, ташкинишидан сўз бирикмаси ва қўшма феълга ўхшаб кетади. Шу сабабли айrim ишларда уларни сўз бирикмаси ёки қўшма феъл деб таърифлаш ҳоллари учрайди. Лекин аналитик феъл формалари қўшма феъллардан ҳам, сўз бирикмаларидан ҳам тубдан фарқланади.

Сўз бирикмаси камида икки мустақил сўздан ташкил топади. Аналитик формада бир мустақил ва ёрдамчи (кўмакчи феъл) қатнашади. Масалан, **кулиб гапирди** (сўз бирикмаси), **кулиб қўйди** (аналитик форма).

Аналитик форма билан қўшма феълнинг (умуман қўшма сўзнинг) фарқли хусусиятлари сифатида қўйидагиларни айтиш мумкин.

1) Қўшма сўзларда (жумладан, қўшма феълларда) бирдан ортиқ сўзнинг бирикувидан янги маъноли бошқа бир сўз ҳосил бўлади. Масалан, *сотиб олмоқ* феъли *сотмоқ* ва *олмоқ* феълларидан фарқланувчи янги сўз—қўшма феъл. Етакчи ва кўмакчи феълдан ташкил топган аналитик формада биринчи феъл ўз маъносини сақлайди ва у асосий (етакчи) феъл ҳисобланади. Кейинги феъл эса унга қўшимча маъно беради. Шу сабабли у кўмакчи феъл ҳисобланади. Масалан, *ёзиб бермоқ* бирикуви *ёзмоқ* ва *бермоқ* феъллари маъносидан фарқланувчи тамомила янги маъно ифодаламайди, яъни бунда ёз ва бер феълларининг бирикуви учинчи бир феълни келтириб чиқармайди, балки *ёзмоқ* феъли ўз маъносини сақлайди, *бермоқ* кўмакчи феъли эса *ёзмоқ* феълининг маъносига қўшимча маъно беради (*ёзиш* ҳаракатининг ўзга учун бажарилиши маъносини билдиради).

2) Етакчи ва кўмакчи феълдан ташкил топган аналитик формаларда етакчи феъл билан кўмакчи феълнинг ўртасида юкламалар қўлланishi ҳам мумкин:

*Гап билан овора бўлиб, кеңириб ҳам қолибман.*  
(З. Фатхуллин.)

Қўшма сўз компонентлари ўртасида ҳеч қандай сўз қўлланмайди. Чунки қўшма сўз, неча компонентдан ташкил топишидан қатъи назар, бир сўз ҳисобланади.

3) Етакчи ва кўмакчи феъллардан ташкил топган аналитик формаларда етакчи феъл форма ясовчи қўшимчаларни қабул қилиши мумкин: а) бўлишсизлик формаси (-ма) билан қўлланади: *билмай қолди, келмай қўйди, ишламай юрди, сезмай турди* каби; б) даража ясовчи -роқ аффиксини қабул қила олади: *Ота чойни ерга қўйиб, ўрнашиброқ олди.* (Р. Файзий.)  
Чироқнинг пилигини *қўтариброқ қўйди.* (А. Қаҳҳор.)

Бирикув таркибидаги етакчи феълнинг ўзи алоҳида грамматик форма қабул қилиши ҳам етакчи ва кўмакчи феълдан ташкил топган бирикувларнинг қўшма феъл эмаслигини кўрсатади. Чунки қўшма сўзларда унинг компонентлари шу қўшма сўз доирасида сўз эмас, балки сўзнинг элементи ҳисобланади. Шу сабабли унинг компонентлари ҳеч вақт мустақил ҳолда грамматик форма қабул қилмайди. Ҳар бир сўз ўзича грамматик форма қабул қила олар экан, албатта, бу бирикув қўшма сўз бўлмайди, балки бирикувнинг ҳар бир компоненти алоҳида сўз ҳисобланади.

4) Етакчи ва кўмакчи феълдан ташкил топган аналитик формаларнинг етакчи қисми жуфт ёки такрорий сўзга тенг бўлиши мумкин: *Раҳимнинг майкаси ширтилиб, ҳамма ёғи тирналган, афт-ангари қизариб-бўзариб кетган эди.* (Х. Назир.) Шубҳа ва қўрқув билан атрофига *қараб-қараб қўяди.* (Ойбек.)

Агар етакчи ва кўмакчи феъллардан ташкил топувчи аналитик форма қўшма сўзлар (қўшма феъллар) қаторига киритиладиган бўлса, у ҳолда қўллаб-қувватлаб келмоқ, қараб-қараб қўймоқ каби етакчи қисми жуфт ёки такрорий сўзлардан ташкил топган бирикувларни ҳам қўшма феъллар қаторига киритиш лозим бўлади. Чунки булар ҳам етакчи ва кўмакчи қисмдан ташкил топади. Лекин бундай бирикувларнинг қўшма феъл бўла олмаслиги, яхлитлигича бир сўз (лексема) эмаслиги жуда аниқ.

5) Етакчи ва кўмакчи феълдан ташкил топган аналитик формаларнинг қўшма феъллардан фарқли асосий бўлгиси сифатида яна шуни айтиш мумкинки, бундай

бирикувларда бирдан ортиқ етакчи феълга бир күмакчи феъл қўшилиши мумкин, яъни етакчи феъл уюшиб келиши мумкин: *Ёруғ дунёдан бўлган умидимиз бу камбағалчилкни еб, кемириб ташлаётиди.* (А. Қаҳҳор.) Учрашиб, киноларга бориб, умуман яқинлашиб, дўстлашиб борарканман, Насибанинг ақлли ва босиқ бир қиз эканига ишончим орта борди. (О. Ёқубов.)

Бундай ҳолларда уюшиб келган етакчи феъллар орасида бошқа сўзлар ҳам қўлланиши мумкин: *Бу қадар балиқни сақлашинг сира иложи йўқ эди. Мўйноққа ташиш учун эса қайиқ етишмайди. Хона-донлар қуритиб ҳам, музлатиб ҳам, тузлаб ҳам, туйиб ҳам олдилар.* (А. Мухтор.) Иил сайнин совхознинг ери кенгайиб, техникаси кўпайиб, одамлари ўсиб бормоқда. (М. Жўра.) Бундай ҳодисани бошқа типдаги аналитик феъл формаларида ҳам учрашиш мумкин: *Камолнинг қизни қучгиси, ўлгиси, унинг соchlарига кўмилгиси, катта, ёруғ, бегубор кўзларига сингиб кетгуси келди.* (О. Мухторов.)

### Жуфт ва такрорий формалар

Феълнинг сифатдош ва равишдош формаларидан баязилари жуфт ёки такрорий сўз ҳолида қўлланиб, турли грамматик маъноларнинг ифодаланиши учун хизмат қиласиди.

-а/-й ва -(и)б аффиксли равишдошлар такрор ҳолда қўлланиб, шу формадаги феъл билдирган ҳаракатнинг такрорийлигини, давомлилигини билдиради: *Тоғ оралиғидаги қалин қор эрий-эрий одам бемалол кира оладиган гор бўлиб қолибди.* (С. Анорбоев.). Саратоннинг оловида *мехнат қила-қила ёшлиқдан чиник-қани* учун чол унча терламас эди. (Ойбек.) Колхозчилар унинг овқатини *мақтаб-мақтаб* ейшиади. (Х. Назир.)

Биринчи компоненти -(а)r, иккинчи компоненти -mas аффиксли формада (бўлишли-бўлишсиз форма) қўлланган феъл формаси шу формадаги феъл билдирган ҳаракат тўла юз бермасданоқ бошқа бир ҳаракатнинг бўлишини билдиради: *Поезд бир станция йўл босар-босмас ҳаммамиз танишиб олдик.* (Ў. Умарбеков.)

Баъзан биринчи компонентнинг -(и)б аффиксли формада, шунингдек, ҳар икки компонентнинг равиш

дош формасида қўлланиши ҳам учрайди: *Қишлоқчилик эмасми, у балоғатга етиб-етмасданоқ* катта ёшдаги одамлар сафига қўшилди. (О. Мухторов.) Биттаси бир-икки ёшга *етиб-етмай* оламдан ўтган экан. (Сайд Аҳмад.)

## РАВИШ ФОРМАЛАРИ

Равишларда синтетик форма -роқ даража аффикси билан ясалади: *тезроқ, секинроқ, эртароқ, кейинроқ*. Лекин бу йўл билан форма ясалиши чегараланган. Чунки жуда кўп равишлар билдирадиган белги объектив ҳолда турли даражага эга бўлмайди. Шунга кўра, бу белгиларни билдирувчи равишлар даража формасига эга эмас.

Равишларнинг такрорий формаси шу равишлар билдирган белги маъносига турли қўшимча маънолар ифодалаш учун хизмат қиласди.

Такрорий равишлар, аввало, ҳаракатнинг такрорий-лигини, давомлилигини билдиради: *Уни Москва ишчиларининг қайта-қайта тақрорланган иш ташлашлари, забастовкалари қутқариб қолди.* (И. Раҳим.) Қассобдан текин қолган мулк унга Қудратилла воғуруши билан яқинлашишга, *кейин-кейин* унга гумашта бўлиб олишга имкон берди. (А. Мухтор.)

Равишларнинг такрорий формаси шу равишга хос белгини кучайтиради. Бунда такрорийлик бўлиши ҳам, бўлмаслиги ҳам мумкин: *Бу йўлдан зинҳор-зинҳор тойма, ийлдан-ийлга пахтани кўпайтиравер.* (Ойбек.) Алиқул ёмғирда ивиган ва вахимага тушган кишининг сўзларйни *зўрга-зўрга тушунди.* (Ш. Рашидов.)

Такрорий равишларнинг маънони (белгини) кучайтириш хусусиятини шунда ҳам аниқ кўриш мумкинки, баъзи ҳолларда такрорий формани маънони кучайтирувчи бошқа форма билан алмаштириш мумкин бўлади: *Биринчи бор ҳомилалик нашъасини туйган, ой-куним яқин қолган кунлар сира-сира* эсимдан чиқмайди. (Сайд Аҳмад.) Ўртоқ Ҳожибековнинг гайратлари орқасида колхозимиз *энди-энди* оёқка туряпти. (С. Анорбоев.) Бу мисоллардаги *сира-сира* формасини ҳали ҳам, *сира* ҳам тарзида, *энди-энди* формасини эндигина формасида қўллаш мумкин, бу билан маънода ўзгариш бўлмайди.

## ХУЛОСА

1. Грамматик маъно сўзнинг лексик маъносига қўшимча тарздаги, лексик маънони ўзгартирмайдиган маънодир. Сўзнинг грамматик маъно ифодаловчи восита га эга бўлган шакли (кўриниши) унинг формаси ҳисобланади.

2. Грамматик категория грамматик маъно билан грамматик формалар бирлигидан иборат бўлади. Лекин бир грамматик маъно билан шу маънони ифодаловчи форма бирликда грамматик категория ҳосил қилмайди, бир-бири билан оппозиция ҳосил қиласидиган грамматик маънолар ва шу маъноларни ифодаловчи формалар бирлиги грамматик категория ҳосил қиласади.

3. Ясалиш усули, ясовчи воситаларига кўра сўз формалари уч асосий турга бўлинади: 1) синтетик формалар, 2) аналитик формалар, 3) жуфт ва такорий формалар.

4. Грамматик категорияга бўлган муносабатига кўра сўз формалари икки асосий турга бўлинади: 1) катего-риал формалар, 2) нокатегориал формалар.

Сўз формаси модал маънога эга бўлиши ёки субъектив баҳо ифодалаши мумкин. Лекин шунга қараб сўз формасини „модал формалар“ ёки „субъектив баҳо формалари“ каби турларга ажратишга асос йўқ.

5. Ҳар қандай сўз формаси майдум бир сўз туркумiga хос бўлади. Барча сўз туркуми учун умумий бўладиган сўз формаси йўқ. Сўз туркумлари бўйича умумий тарзда қўлланиш юкламаларга хос хусусият.

6. Ўзак ва аффиксал морфемалардан ташкил топган сўзларнинг структураси уч хил типга эга бўлиши мумкин: 1) морфема структураси (*пахта+кор+нинг*), 2) сўз ясалиш структураси (*пахта+кор—нинг*), 3) морфологик (форма ясалиш) структураси (*пахтакор+—нинг*). Сўзнинг морфологик структураси сўз формасининг ясалишида асос бўлувчи қисм ва шу формани ясовчи компонентдан иборат бўлади.

7. Грамматиканинг морфология баҳсида сўз туркумлари ва уларга хос формалар ўрганилади. Ҳар бир сўз туркумiga хос формаларнинг таҳлилида (агар бўлса) аввал категориал формалар (грамматик категориялар), сўнгра нокатегориал формалар баён этилгани маъқул.

# МУНДАРИЖА

Сўз боши . . . . . 3

## БИРИНЧИ БЎЛИМ

### Сўз формалари ҳақида

Грамматик маъно ва грамматик форма . . . . .	5
Грамматик маъно ва грамматик форманинг грамматик категорияга муносабати . . . . .	6
Форма ясалиш усули . . . . .	7
Синтетик форма . . . . .	8
Аналитик форма . . . . .	11
Жуфт ва такрорий форма . . . . .	14
Категориал ва нокатегориал формалар . . . . .	25
Сўзнинг морфологик структураси . . . . .	35

## ИККИНЧИ БЎЛИМ

Асосий сўз туркumlарida форма ясалиши . . . . .	41
От формалари . . . . .	41
Синтетик формалар . . . . .	41
Категориал формалар . . . . .	41
Нокатегориал формалар . . . . .	48
Аналитик формалар . . . . .	56
Жуфт ва такрорий формалар . . . . .	56
Сифат формалари . . . . .	57
Синтетик форма . . . . .	57
Аналитик форма . . . . .	57
Жуфт ва такрорий форма . . . . .	58
Сон формалари . . . . .	58
Феъл формалари . . . . .	59
Синтетик формалар . . . . .	59
Категориал формалар . . . . .	59
Нокатегориал формалар . . . . .	59
Аналитик формалар . . . . .	62
Категориал формалар . . . . .	62
Нокатегориал формалар . . . . .	63
Жуфт ва такрорий формалар . . . . .	77
Равиш формалари . . . . .	78
Хулоса . . . . .	79